

## **Siunnersuummut nassuiaatit**

### **Nassuiaatit nalinginnaasut**

#### **1. Aallarniut**

Inatsisartut 2018-imi ukiakkut ataatsimiinneranni, UKA 2018/226, Naalakkersuisut suliffeqarfittut innuttaasunik tapersersortarialinnik suliffissaqartitsisunik nalunaarsorsimasut pillugit inatsisissatut siunnersuummik Inatsisartut 2019-mi ukiakkut ataatsimiinneranni saqqummeeqqullugit, Inuit Ataqtigiit aalajangiiffigisassatut siunnersuummik saqqummiussipput. Aalajangiiffigisassatut siunnersuummut tunuliaqutaasoq ilaatigut tassaavoq suliffeqarfimmik ingerlatsisoqarneratigut inooqataanermi inuiaqatigiinnullu iluaqutaasunik immikkut siunertarisanik siuarsaanissaq. Aalajangiiffigisassatut siunnersuut malillugu ilaatigut suliffeqarnermik peqataatitsinerusumik pisariaqartitsisoqarpoq, tassani inuit imaluunniit inuit innarluutillit atugarliortut inuiaqatigiini allat assigalugit immikkut pisariaqartitaannut inissaqartitsisumik atugaqartillugit sulisinnaallutik. Aalajangiiffigisassatut siunnersuut malillugu suliffeqarfiit innuttaasunik ikiortarialinnik suliffissaqartitsisut atorfinitsitsinermikkut inersimasut atugarliortut tapersersorniarlugit sinneqartoorutimik ilai annertuut tamatumunnga atornerisigut ilaatigut tapersersuisinnaapput.

Suliffeqarfik innuttaasunik ikiortarialinnik suliffissaqartitsisoq aalajangiiffigisassatut siunnersuut malillugu aamma kultureqarnerup iluani suliniuteqarnermik, avatangiisitigut immikkut suliniuteqartutut imaluunniit pisortaqarfiit suliniutit suliassaqarfigigaluarlugit naammassiuminaatsitaannik siunertaqarlutik suliffeqarfiusinnaapput.

Aalajangiiffigisassatut siunnersuummi pingaarnertut siunertaq taamaalilluni tassaavoq, suliffeqarfiit innuttaasunik ikiortarialinnik suliffissaqartitsisut nalunaarsugaanerak pillugu Inatsisartut inatsisissaannik piareersaanissaq akuersinissarlu. Inatsisartut inatsisaat ataatsimut isigalugu Danmarkimi suliffeqarfinnik innuttaasunik ikiortarialinnik suliffissaqartitsisunik nalunaarsuisarneq pillugu inatsimmut naapertuutissaq, kisianni Kalaallit Nunaanni pissutsinut immikkut ittunut aamma inatsit malillugu aqqissuussinermut Kalaallit Nunaannik immikkut kissaatigineqartunut naleqqussagaassalluni. Naalakkersuisut inatsisissatut siunnersuummik taamaattumik piareersaanissamut taassumalu 2019-imi Inatsisartut ukiakkut ataatsimiinneranni saqqummiunnissaanik peqquneqarnerisigut, anguniakkap taassuma anguneqarnissaanut aalajangiiffigisassatut siunnersuut iluaqutaassaaq.

Aalajangiiffigisassatut siunnersuut Inatsisartunit akuerineqarpoq.

Inatsisartut inatsisissaatut siunnersuut manna aalajangiiffigisassatut siunnersuut tunngavigalugu piareersarneqarpoq. Siunnersuummi Danmarkimi suliffeqarfiit innuttaasunik ikiortarialinnik suliffissaqartitsisut nalunaarsorsimasut pillugu inatsit ataatsimut isigalugu aallaavigineqarpoq. Taamaattoq siunnersuut Kalaallit Nunaannut aamma pissutsinut Kalaallit Nunaanni atuuttunut immikkut ittunut naleqqussagaavoq. Tamatuma saniatigut siunnersuummi akuersissuteqartarnermut aaqqissuussineq aallaavigalugu, siunnersuut malillugu aaqqissuussineq ilaatigut allanngortinneqarpoq. Akuersissuteqartarnermut aaqqissuussineq taamaaqataa Danmarkimi suliffeqarfiit innuttaasunik ikiortarialinnik suliffissaqartitsisut pillugit inatsimmi atuuttumiinngilaq. Matuma kinguliani nassuiaatini nalinginnaasuni immikkoortoq 2.1-imi aamma siunnersuummi kapitali 1-imi aalajangersakkanut immikkut nassuiaatini, pingaartumik § 1-imi tamanna eqqartorneqarpoq.

Suliffeqarfinnik innuttaasunik ikiortarialinnik suliffissaqartitsinermik ingerlatsinerup siuarsarneqarnissaa, siunnersuummi siunertaavoq. Inuiaqatigiinni unamminartut amerlanerit Kalaallit Nunaanni innuttaasunut aamma Kalaallit Nunaanni inuiaqatigiinnut iluaqutaasunik suliffeqarfinnit innuttaasunik ikiortarialinnik suliffissaqartitsinikkut sapinngisamik aaqqiiffigineqartarnissaat imaluunniit annikillisarneqarnissaat, taamaalilluni siunnersuummi tunngavigineqarpoq. Tassunga atatillugu aamma nalinginnaanerusumik siunnersuummut siunertaavoq, suliffeqarfiit innuttaasunik ikiortarialinnik ingerlataqarnissaannik siuarsaanissaq aamma suliffeqarfinni innuttaasunik ikiortarialinnik suliffissaqartitsinermik siunertaqartuni innuttaasunik ikiortarialinnik suliffissaqartitsinermut siunertarineqartut naammassineqarnissaat.

Suliffeqarfiit innuttaasunik ikiortarialinnik suliffissaqartitsisut tassaapput suliffeqarfiit inuussutissarsiummik ingerlataqartut, sulinermikkut isertitaqarnermikkullu immikkut isumaginninnikkut siunertatigut siuarsaanermik siunertaqartut. Suliffeqarfik innuttaasunik ikiortarialinnik suliffissaqartitsisoq immikkut ingerlatsitseqatigiiffittut iluseqanngilaq. Suliffeqarfik innuttaasunik ikiortarialinnik suliffissaqartitsisoq assersuutigalugu tassaasinnaavoq aktiaatileqatigiiffik (A/S), ingerlatseqatigiiffik piginneqatigiiffiusoq (ApS), soqutigisaqatigiit ingerlatseqatigiiffiat (I/S), peqatigiiffik, aningaasaateqarfik allaluunniit sullissivik imminut pigisoq. Taamaalilluni suliffeqarfinnut innuttaasunik ikiortarialinnik suliffissaqartitsisunut immikkut ingerlatseqatigiiffeqanngilaq imaluunniit suliffeqarfinnut innuttaasunik ikiortarialinnik suliffissaqartitsisunut nalinginnaasumik nassuiaasumik imaluunniit maleruagassiisumik, Kalaallit Nunaannut immikkut inatsiseqarnani.

Taamaattumik siunnersuut suliffeqarfinnut innuttaasunik ikiortarialinnik suliffissaqartitsisunut nalunaarsuisarnermut aaqqissuussinermik eqquassinissamik siunertaqarpoq, takuuk siunnersuummi kapitali 2. Nalunaarsuinerimik aaqqissuussineq suliffeqarfiit innuttaasunik ikiortarialinnik suliffissaqartitsisut nalunaarsorsimasut pillugit

ataatsimoorussamik kikkuunerinut tunngavissisinnaavoq. Nalunaarsuineramik aaqqissuussinikkut, suliffeqarfiit siunnersuummi §§ 6-8 malillugit tamatumunnga atatillugu suliffeqarfiup ingerlatsineranut ammasumillu pissuseqarneranut piumasagaatit aalajangersimasut naammassisimagunikku, suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaalissapput. Suliffeqarfiit nalunaarsorsimasut suliffeqarfimmi ingerlatsineranut ammasumillu pissuseqarnermut siunnersuummi piumasagaatinik naammassisagaqarnerminnik pisortani oqartussanut, sullitaminnut, aningaasaliisunut, tunissuteqartartunut, allanullu ikiuisartunut allanullu suleqataasunut uppernarsaasinnaassapput. Atiminni nittarsaassinermilu suliffeqarfittut innuttaasunik ikiortarialinnik suliffissaqartitsisutut nalunaarsorsimasutut taaguutip atorneqarnissaanut kisermaassisussaataitanermik malitsigisaanik, takuuk siunnersuummi § 11, imm. 1, suliffeqarfiit nalunaarsorsimasut ilaatigut taamaalorsinnaapput.

Siunnersuummi nalunaarsuineranut aaqqissuussineq taamaalilluni suliffeqarfiit innuttaasunik ikiortarialinnik suliffissaqartitsisutut nalunaarsorsimasut nassuiaassutaannut, inatsisut akuerisaanermut maleruagassiinermullu iluaqutaassaaq. Siunnersuummi §§ 6-8 malillugit suliffeqarfiup ingerlatsineranut ammasumillu pissuseqarneranut piumasagaatit aalajangersimasut suliffeqarfiit naammassisimappasigit, siunnersuummi kapitali 4 naapertorlugu suliffeqarfiit innuttaasunik ikiortarialinnik suliffissaqartitsisut inissimalersinnaasut aammalu suliffeqarfinnut innuttaasunik ikiortarialinnik suliffissaqartitsisutut nalunaarsuiffimmi nalunaarsorneqarsinnaasut, kinaassusersinissaannut siunnersuut periarfissiivoq. Suliffeqarfiup innuttaasunik ikiortarialinnik suliffissaqartitsisutut nalunaarsugaasimasup taamaalilluni taaguut "suliffeqarfik innuttaasunik ikiortarialinnik suliffissaqartitsisoq" imaluunniit "SIIS", suliffeqarfiup siunnersuut malillugu suliffeqarfiit innuttaasunik ikiortarialinnik suliffissaqartitsisunut immikkut piumasagaatinik suliffeqarfiup naammassinninneranik immikkut allagartatut imaluunniit uppernarsaatitut atimi nittarsaanerminilu atorsinnaavaa.

Nalunaarsuisarnermut aaqqissuussinermi siunertaq tassaavoq, suliffeqarfiit innuttaasunik ikiortarialinnik suliffissaqartitsisutut nalunaarsorsimasut, sulinerminni suliffeqarfittut inunnik ikiortarialinnik suliffissaqartitsineranut siunertanik isumaginnittutut aamma inunnik ikiortarialinnik suliffissaqartitsinermik ingerlataqartutut tunngaveqartut, kikkuunerisa ersarissunngortinneqarnissaat.

Siunnersuut ingerlatseqatigiiffinnut aamma ingerlatseqatigiiffiit ilusaannut ilaalu ilanngullugit maleruagassiinissaq pillugu siunnersuutaanngilaq, kisiannili suliffeqarfinnik innuttaasunik ikiortarialinnik immikkut suliffissaqartitsineranut siunertanik isumaginnittunik aamma immikkut inuttaasunik ikiortarialinnik suliffissaqartitsinermik, aammalu taakkununnga atasunut tunngasunik ingerlataqartunik, nalunaarsuisarnissamat siunnersuutaalluni.

Tamatuma saniatigut siunnersuummi innuttaasunik ikiortarialinnik suliffissaqartitsinermi suliassaqarfik tamaat imaluunniit suliffeqarfiit isumaginninnikkut suliniuteqartut tamaasa, ilaatinnissaat aamma siunertarineqanngilaq. Siunnersuut taamaalilluni nalinginnaasumik taaguutip "innuttaasunik ikiortarialinnik suliffissaqartitsisut" atorneqarnissaanut kisermaassisussaataitanermik malitseqassanngilaq.

Kalaallit Nunaanni inuussutissarsiorneq pillugu inatsisip nutarterneqarneranut atatillugu siunnersuut suliarineqarpoq. Naalakkersuisut ukiuni kingullerni Danmarkimi oqartussat suleqatigalugit Kalaallit Nunaanni inuussutissarsiorneq pillugu inatsisit nutarternissaat suliaraat.

Nunat allat aamma suliffeqarfiit innuttaasunik ikiortarialinnik suliffissaqartitsisut pillugit maleruagassaqartitsipput. Ilaatigut Danmarkimi, Sverigemi, Finlandimi, Frankrigimi, Belgiami, Tuluit Nunaanni aamma USA-mi maleruagassiisoqarsimavoq. Maleruagassiinermi nalinginnaasumik suliffeqarfiit innuttaasunik ikiortarialinnut suliffissaqartitsisut pillugit immikkut ingerlatseqatigiiffittut imaluunniit suliffeqarfinnut pineqartunut nalunaarsuisarnermik aaqqissuussinertut ilusiliisoqarpoq.

Siunnersuut Kalaallit Nunaanni suliffeqarfiit innuttaasunik ikiortarialinnut suliffissaqartitsisut pillugit nalunaarsuinermik aaqqissuussinermut tungasuuvoq aammalu immikkut ingerlatseqatigiiffittut ilusiliinermut tunngasuunani. Taamaattumik suliffeqarfiit ingerlatseqatigiiffittut ilusaat allanngortinnagu, siunnersuummi suliffeqarfiit innuttaasunik ikiortarialinnut suliffissaqartitsisut pioreersut pineqartunut ilaatinneqarsinnaassasut, ilaatigut pingaartumillu tunngaviuvoq. Tamannami iluaqutissartaavoq, tassami suliffeqarfiit innuttaasunik ikiortarialinnik suliffissaqartitsisut ullumikkut ingerlatseqatigiiffiit pillugit inatsisini assigiinngitsorujussuarni aaqqissugaammata. Ilaatigut Danmarkimi taamaattoqarpoq. Ilaatigut piginnittuunermi pissutsit suliffeqarfiullu ingerlanneqarnissaanut kissaatigisanut tulluarnepaasunik ingerlatseqatigiiffiit ilusissaannik nalinginnaasumik suliffeqarfiit innuttaasunik ikiortarialinnik suliffissaqartitsisut killilersorneqarnatik toqqaanissamut nalunaarsuinermik aaqqissuussineq periarfissiivoq. Tassunga ilanngutissaaq suliffeqarfiit siunnersuummit takuneqarsinnaasunit allaanerusunik allanik tunngaveqarlutik innuttaasunik ikiortarialinnik suliffissaqartitsinermik ingerlataqarusuttut suli nalinginnaasumik nittarsaassinermi aamma ingerlataminnut atatillugu taaguutip suliffeqarfik innuttaasunik ikiortarialinnik suliffissaqartitsisut atorsinnaassallugu. Kisianni suliffeqarfiit innuttaasunik ikiortarialinnik suliffissaqartitsisut taamatut ittut suliffeqarfittut innuttaasunik ikiortarialinnik suliffissaqartitsisutut nalunaarsugaasumut taaguut atorsinnaassanngilaat imaluunniit siunnersuummi pineqartunut ilaasinnaanatik.

Siunnersuut malillugu nalunaarsuinermit aaqqissuussineq kajumissuseq naapertorlugu toqqagassaavoq. Suliffeqarfik innuttaasunik ikiortarialinnik suliffissaqartitsisooq,

siunnersuummi §§ 6-8-imi piunasaqaatinik naammassinnittoq, suliffeqarfiup tamanna kissaatigippagu, taamaalilluni suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsugaaneraniq nalunaarfigineqarnissamik qinnuteqarsinnaavoq. Suliffeqarfik, suliffeqarfittut innuttaasunik ikiortarialinnik suliffissaqartitsisutut nalunaarsugaanissamik qinnuteqarsimanngippat akuerisaasutullu nalunaarfigineqarsimanngippat, siunnersuut malillugu nalunaarsorneqarnissamut pisussaaffeqanngilaq. Kingullertut taaneqartoq siunnersuummi § 9, imm. 2 malillugu pisussaavoq.

Naalackersuisut sinnerlugit oqartussat suliffeqarfiulluunniit nalunaarsuiffimmik pilersitsinissaa ingerlatsinissaalu pillugu Kalaallit Nunaanni imaluunniit Danmarkimi pisortani oqartussanik imaluunniit pisortat suliffeqarfiutaannik Naalackersuisut isumaqatigiissuteqarnissaannut siunnersuut ilaatigut periarfissiivoq. Tamatuma saniatigut siunnersuut malillugu suliffeqarfiit innuttaasunik ikiortarialinnik suliffissaqartitsisutut suliffeqarfiit nalunaarsugaaneranni atugassamik oqartussat imaluunniit suliffeqarfiup nalunaarsuiffianik atuinissaq pillugu Kalaallit Nunaanni imaluunniit Danmarkimi pisortani oqartussanik imaluunniit pisortat suliffeqarfiutaannik Naalackersuisut isumaqatigiissuteqarnissaannut, siunnersuut periarfissiivoq. Allanneqartut Kalaallit Nunaata aamma Danmarkip akornanni piginnaatitaanerit agguagaanerannik allanngortitsinngillat. Takukkit nalinginnaasumik nassuiaatini immikkoortoq 2.5 aamma siunnersuummi § 17-imut immikkut nassuiaatit.

## **2. Siunnersuummi immikkoortut pingaernerit**

### *2.1 Suliffeqarfiup innuttaasunik ikiortarialinnik suliffissaqartitsisutut nalunaarsugaanissaa pillugu akuersisarnermik aaqqissuussineq*

Siunnersuummi suliffeqarfiup innuttaasunik ikiortarialinnik suliffissaqartitsisutut nalunaarsugaanissaa pillugu akuersisarnermik aaqqissuussineq atuutsinneqalerpoq.

Suliffeqarfik innuttaasunik ikiortarialinnik suliffissaqartitsisooq, siunnersuummi §§ 6-8-mi piunasaqaatinik naammassinnittoq, siunnersuut malillugu suliffeqarfiup innuttaasunik ikiortarialinnik suliffissaqartitsisutut nalunaarsugaanissaa pillugu akuersisarnermik Atuisartoqarnermut Unammilleqatigiinnermullu Aqutsisoqarfimmit nalunaarfigineqarnissaq pillugu qinnuteqarsinnaavoq, takuuk siunnersuummi § 1-imi, imm. 1.

Siunnersuut malillugu nalunaarsuinissamut aaqqissuussineq kajumissuseq naapertorlugu toqqagassaavoq. Suliffeqarfik innuttaasunik ikiortarialinnik suliffissaqartitsisooq, siunnersuummi §§ 6-8-imi piunasaqaatinik naammassinnittoq, suliffeqarfiup tamanna kissaatigippagu taamaalilluni suliffeqarfittut innuttaasunik ikiortarialinnik

suliffissaqartitsisutut suliffeqarfiup nalunaarsugaaneraniq nalunaarfigineqarnissamik qinnuteqarsinnaavoq. Suliffeqarfittut innuttaasunik ikiortarialinnik suliffissaqartitsisutut nalunaarsugaanissamik qinnuteqarsimangippat akuerisaasutullu nalunaarfigineqarsimangippat, siunnersuut malillugu nalunaarsorneqarnissamut suliffeqarfik pisussaaffeqanngilaq. Kingullertut taaneqartoq siunnersuummi § 9, imm. 2 malillugu pissaaq.

Suliffeqarfik §§ 6-8-mi piumasaqaatinik naammassinnippat, takuuk § 4, suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsugaaneraniq akuerineqarnissaanik nalunaarfigineqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Atugassarititaasut aalajangersimasut tunngavigalugit akuersineq nalunaarutigineqarsinnaavoq, ilanngullugu siunnersuummi §§ 6-8-mi piumasaqaatinik suliffeqarfiup naammassinninnera pillugu aamma akuersinermut piumasaqaatit attuumassuteqartut allat aamma akuersissutip atorunnaarsinnera utertinneralu pillugu, takuuk siunnersuummi § 4, imm. 2. Siunnersuummi §§ 6-8-mi piumasaqaatinik suliffeqarfik naammassinninngippat suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsugaaneraniq akuerineqarnissaaq pillugu suliffeqarfiup qinnuteqaataa Atuisartoqarnermut Unammilleqatigiinnermullu Aqutsisoqarfiup itigartissinnaavaa.

Suliffeqarfiup innuttaasunik ikiortarialinnik suliffissaqartitsisutut nalunaarsorneqarnissaanut suliffeqarfiup akuerineqarsimasup §§ 6-8-imi piumasaqaatinik naammassinninngippat tamanna ingerlaannartumik suliffeqarfiup Atuisartoqarnermut Unammilleqatigiinnermullu Aqutsisoqarfimmut nalunaarutigissavaa. Nalunaaruteqartussaataa nermit ilaapput suliffeqarfimmi qitiusumik aqutsisutut ilaasortat kikkulluunniit. Qitiusumik aqutsinermi oqartussat tassaapput suliffeqarfinni pisortaaneqartuni siulersuisoqartunilu siulersuisut. Suliffeqarfiit taamaallaat pisortaaneqartut qitiusumik aqutsinermi oqartussat tassaapput pisortaaneqarfik. Suliffeqarfinni pisortaaneqartut nakkutilliisutullu siunnersuisoqatigeeqartuni qitiusumik aqutsinermi oqartussat tassaapput pisortaaneqarfik.

Suliffeqarfiup §§ 6-8-imi piumasaqaatit naammassisimangippagit, suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsugaanissaata akuerineqarsimanerata utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Akuersissutip nalunaarutigineqarsimasup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfiup aalajangiinissaa sioqqullugu §§ 6-8-imi piumasaqaatinik naammassinninnissamut amigaataasut iluarsineqarnissaanut suliffeqarfimmut nalunaarsugaasimasumut piffissami naammaginartumik Atuisartoqarnermut Unammilleqatigiinnermullu Aqutsisoqarfik aalajangersaassaaq. Taamaaliortoqassaaq suliffeqarfik tamanna pillugu qinnuiginnippat aamma piffissap naammaginartup iluani suliffeqarfik iluarsisinnaassasoq Atuisartoqarnermut Unammilleqatigiinnermullu Aqutsisoqarfik naliliippat. Piffissaliussatut aalajangersarneqartup iluani §§ 6-8-imi

piumasaqaatinik naammassinninnissamik amigaataasunik suliffeqarfik iluarsinngippat, akuersinerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Tamanna siunnersuummi § 5, imm. 2 malillugu pisussaavoq.

## *2.2 Suliffeqarfiup innuttaasunik ikiortarialinnik suliffissaqartitsisutut nalunaarsugaanissaanut piumasaqaatit*

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut, suliffeqarfik innuttaasunik ikiortarialinnik suliffissaqartitsisutut Kalaallit Nunaanni suliffeqarfiit nalunaarsuiffianni nalunaarsorsimasutut normoqassaaq (CVR-normu) aamma Kalaallit Nunaanni najugaqassalluni, takuuk siunnersuummi § 6, imm.

1. Kisiannili suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut suliffeqarfik immikkut ingerlatseqatigiiffiunissaa pillugu piumasaqaateqarnani. Suliffeqarfik innuttaasunik ikiortarialinnik suliffissaqartitsisutut nalunaarsorsimasoq taamaalilluni assersuutigalugu aktiaatileqatigiiffiusinnaavoq (A/S), piginneqatigiilluni ingerlatseqatigiiffiusinnaavoq (ApS), soqutigisaqaqatigiinnikkut ingerlatseqatigiiffiusinnaavoq (I/S), peqatigiiffiusinnaavoq, aningaasaateqarfiusinnaavoq imaluunniit tassaasinnaalluni sullissivik alla imminut pigisoq. Siunnersuummi § 6, imm. 2 malillugu suliffeqarfik inummik ataatsimit pigineqartoq aamma suliffeqarfik piginneqatigiinnikkut pilersinneqarsimasoq, siunnersuut malillugu suliffeqarfittut inunnik ikiortarialinnik suliffissaqartitsisutut nalunaarsugaasinnaangilaq.

Suliffeqarfiit qanorluunniit iluseqartut tamarmik, suliffeqarfiit inummik ataatsimit pigineqartut aamma suliffeqarfiit piginneqatigiinnikkut pilersinneqarsimasutut eqqaassanngikkaanni, suliffeqarfiit aamma piumasaqaatit tulliuttut uku tamaasa naammassisimappatigit, taamaalillutik suliffeqarfittut innuttaasunik ikiortarialinnik suliffissaqartitsisutut nalunaarsugaasimasinnaapput, takuuk siunnersuummi §§ 7-9:

- 1) Suliffeqarfik innuttaasunut ikiortarialinnut siunertaqassaaq, aamma suliffeqarfiup innuttaasunut ikiortarialinnut siunertaqarnera suliffeqarfiup malittarisassaani imaluunniit malittarisassaqaanngippat pilersinneqarnerani uppersaamma takuneqarsinnaassaaq.
- 2) Suliffeqarfik inuussutissarsiornermik ingerlataqassaaq.
- 3) Suliffeqarfik pisortanut attuumassuteqassanngilaq.
- 4) Suliffeqarfik sulinermini akuutitsisuussaaq akisussaasuullunilu.
- 5) Suliffeqarfik sinneqartoorutiminik innuttaasunut ikiortarialinnut isumaginnissaaq.
- 6) Suliffeqarfittut innuttaasunut ikiortarialinnut suliffissaqartitsisutut suliffeqarfiup nalunaarsorneqarnissaa akuerineqarsimassaaq, takuuk § 4.
- 7) Akuersineq piffissaa akuersissutip atuuffissaa aalajangersimasoq pillugu atugassarititaasunik imaqarpat, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanut akuersissuteqarneq

atorunnaarsimassanngilaq, aamma Atuisartoqarnermut Unammilleqatigiinnermullu Aqutsisoqarfimmit utertinneqarsimassanani, takuuk § 5.

Immikkoortoq 5-imi sinneqartoorutini isumaginninnikkut passussinermut tunngatillugu, siunnersuut malillugu paasineqassaaq akileraaruteqareernermi ingerlatamut ataatsimut arlalinnulluunniit makkununga angusani suliffeqarfiup atussagai:

- 1) Nammineq suliffeqarfimmini aningaasaleeqqineq.
- 2) Suliffeqarfittut innuttaasunik ikiortarialinnik suliffissaqartitsisunut nalunaarsugaasimasunut allani aningaasaliineq imaluunniit tunissuteqarneq.
- 3) Nalinginnaasumik iluaqutaasussanik imaluunniit nalinginnaasumik ajunngitsuliornermik siunertaqartunut suleqatigiiffinnut tunissuteqarneq.
- 4) Suliffeqarfimmi piginnittunut iluanaarutiniq allatigulluunniit agguagarsiassanik killeqartumik tunniussineq.

Iluanaarutiniq allatigulluunniit agguagassarsianik killeqartumik tunniussineq siunnersuut malillugu paasineqassaaq, aallaqqaasiilluni aningaasaatit piffissami piginnittuuffiusimasumi ukiumut ernialiussanik naammaginartunik tapeqartillugit. Takukkit siunnersuummi § 8 tassungalu nassuiaatit.

Suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut akuerineqartoq suliffeqarfik nalunaarfigineqarpat, takuuk § 4, aamma siunnersuummi §§ 6-8-imi nalunaarsugaanissaq pillugu piumasaqaatit naammassineqarsimappata, siunnersuut malillugu suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsugaalersinnaavoq nalunaarsuiffimmiilerlunilu, takuuk § 9, imm. 1. Suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaa akuerineqartoq nalunaarfigineqarsimanngippat, takuuk § 4, imaluunniit §§ 6-8-imi nalunaarsorneqarnissamut piumasaqaatinik naammassinninngippat, siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsugaasinnaanngilaq, takuuk § 9, imm. 1.

Suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaa akuerineqartoq nalunaarfigineqarsimasoq, takuuk § 4, suliffeqarfik suliffeqarfiit innuttaasunik ikiortarialinnik suliffissaqartitsisunut nalunaarsuiffianni suliffeqarfittut innuttaasunik ikiortarialinnik suliffissaqartitsisutut nalunaarsorneqassaaq, takuuk kapitali 6. Tamanna § 9, imm. 2 malillugu pisussaavoq.

Suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut akuersissuteqarneq, piffissaq atuuffiusussaq aalajangersimasoq pillugu atugassarititaasumik imaqaarsinnaavoq. Taamaattoqarsimappat piffissaq akuersiffiusoq naappat akuersissuteqarneq



atorunnaassaaq.

Suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut akuersissuteqarneq atorunnaarpat imaluunniit § 5 malillugu Atuisartoqarnermut Unammilleqatigiinnermullu Aqutsisoqarfimmit utertinneqarpat, suliffeqarfiup tamatuma kingorna sapinngisamik piaarnerpaamik suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorsimanini allanngortissavaa, takuuk siunnersuummi kapitali 4, taamaalilluni suliffeqarfik tamatuma kingorna suliffeqarfittut innuttaasunik ikiortarialinnik suliffissaqartitsisutut nalunaarsugaajunnaassaaq, takuuk § 10. Suliffeqarfittut innuttaasunik ikiortarialinnik suliffissaqartitsisutut nalunaarsorsimasooq §§ 6-9-imi nalunaarsorneqarnissamut piumasaqaatinik tamanik naammassinnikkunnaarpat, suliffeqarfiup tamatuma kingorna sapinngisamik piaarnerpaamik suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorsimanini allanngortissavaa, taamaalilluni suliffeqarfik tamatuma kingorna suliffeqarfittut innuttaasunik ikiortarialinnik suliffissaqartitsisutut nalunaarsugaajunnaassalluni. Taamaattoq § 10, imm. 1 aamma 2 malillugit Atuisartoqarnermut Unammilleqatigiinnermullu Aqutsisoqarfimmit aalajangersarneqartup naammaginaratumik piffissaliussap iluani § 6-9-imi nalunaarsugaanermut piumasaqaatinik naammassinninnginneq suliffeqarfimmit iluarsineqarsinnaappat, suliffeqarfik taamatut nalunaarsorsimajunnaarnini isumagissanngilaa. Tamanna siunnersuummi § 10, imm. 1 malillugu pisussaavoq. Nalunaarsugaajunnaarnermik isumaginnittussatut akisussaasut tassaapput suliffeqarfittut innuttaasunik ikiortarialinnik suliffissaqartitsisutut nalunaarsugaasumi qitiusumik aqutsisutut oqartussat, takuuk siunnersuummi § 12, imm. 2. Qitiusumik aqutsinermi oqartussat ilaatigut qulaani immikkoortoq 1-imi eqqaaneqarput.

### *2.3. Suliffeqarfittut innuttaasunik ikiortarialinnik suliffissaqartitsisutut nalunaarsorsimasutut taaguutip atorineqarnissaanut kisermaassisussaatitaaneq*

Siunnersuummi tamanna pillugu aalajangersakkanut naapertuuttumik suliffeqarfittut innuttaasunik ikiortarialinnik suliffissaqartitsisunut nalunaarsuiffimmi suliffeqarfiit nalunaarsorsimasut taaguut "suliffeqarfik innuttaasunik ikiortarialinnik suliffissaqartitsisutut nalunaarsorsimasooq" imaluunniit "SIIS" atimi nittarsaanerminilu atornissaanut kisermaassisussaatitaapput, takuuk siunnersuummi § 11. Suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorsimasutut taaguutip atornissaanut suliffeqarfiup piginnaatitaanera, Atuisartoqarnermut Unammilleqatigiinnermullu Aqutsisoqarfimmit nalunaarsorneqarnissamut akuersissuteqarneq nalunaarutigineqarpat, takuuk § 4, aamma suliffinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorneqarpat, takuuk siunnersuummi kapitali 4, atuutilissaaq.

Suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsorsimanerata akuerineqarnera atorunnaarpat imaluunniit § 5 malillugu Atuisartoqarnermut Unammilleqatigiinnermullu Aqutsisoqarfimmit utertinneqarpat, suliffeqarfiup uliffeqarfittut innuttaasunik ikiortarialinnik suliffissaqartitsisutut nalunaarsorsimasutut taaguummik atuisinnaatitaanera atorunnaassaaq.

Suliffeqarfiup innuttaasunik ikiortarialinnik suliffissaqartitsisutut nalunaarsugaasimasup taamaalilluni taaguut "suliffeqarfik innuttaasunik ikiortarialinnik suliffissaqartitsisooq" imaluunniit "SIIS", suliffeqarfiup siunnersuut malillugu suliffeqarfiit innuttaasunik ikiortarialinnik suliffissaqartitsisunut immikkut piumasaqaatinik suliffeqarfiup naammassinninneranik immikkut allagartatut imaluunniit uppersaatitut atimi nittarsaanerminilu atorsinnaavaa.

#### *2.4. Suliffeqarfiit innuttaasunik ikiortarialinnik suliffissaqartitsisut nalunaarsorsimasut pisussaaffii*

Siunnersuummi § 12, imm. 1 malillugu pissutsinut inatsisartut inatsisaannut ilaasunut tunngasunik paasissutissanik pisortanut tunniussinermi paasissutissanillu nalunaarsuinermi paasissutissanik eqqortunik naammattunillu suliffeqarfiup tunniussinissaanut suliffeqarfimmi qitiusumik aqutsinermi oqartussat akisussaasuupput. Akisussaannermut ilaatigut ilaatinneqarput suliffeqarfittut innuttaasunik ikiortarialinnik suliffissaqartitsisutut nalunaarsugaanissamik akuerineqarnissamik nalunaarfigineqarnissaaq pillugu qinnuteqarnerani, suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi suliffeqarfittut innuttaasunik ikiortarialinnik suliffissaqartitsisutut nammineq nalunaarsornermini, inatsisartut inatsisaannut ilaasut pissutsit pillugit oqartussanut nalunaaruteqarnermi nalunaarusiornermilu aamma suliffeqarfimmik tassanilu pissutsinik ingerlatanillu oqartussat nakkutilliineranni paasissutissanik tunniussinermi suliffeqarfiup paasissutissanik tunniussinerani.

Pissutsit allangornerisa kingunerisaannik paasissutissat siusinnerusukkut tunniunneqarsimasut maannakkut eqqortuujunnaarpata naammakkunnaarpataluunniit, imaluunniit paasissutissat nutaat tunniunneqartariaqarpata paasissutissanik nutaanik pisariaqartunik suliffeqarfik sapinngisamik piaarnerpaamik tunniussissaaq. Pissutsit allangornerisa kingunerisaannik paasissutissat siusinnerusukkut tunniunneqarsimasut maannakkut eqqortuujunnaarpata naammakkunnaarpataluunniit, tamatuma kingorna sapinngisamik piaarnerpaamik nalunaarsuinernek nutaanik pisariaqartunik suliffeqarfik isumaginnissaaq.

Suliffeqarfiup nalunaarsugaasimasup qitiusumik aqutsinermi oqartussaasui aamma § 12, imm. 2 malillugu suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi suliffeqarfiup nalunaarsugaajunnaarnissaanut akisussaasuupput.

Suliffeqarfittut innuttaasunik ikiortarialinnik suliffissaqartitsisutut nalunaarsorsimasoq ukiumut naatsorsuutit pillugit inatsisit Kalaallit Nunaannut atortuulersinneri pillugu peqqussut kingusinnerusukkut allannguuteqarsimasut naapertorlugu ukiumut nalunaarusiamik tunniussissaaq minnerpaamillu naatsorsuuserinermi B pillugu malittarisassanik malinnissalluni. Tamanna atuuppoq apeqqutaatinnagu ukiumut naatsorsuutit pillugit inatsisit Kalaallit Nunaannut atortuulersinneri pillugu peqqussut malillugu suliffeqarfik ukiumut nalunaarusiamik tunniussinissamik pisussaaffeqarnersoq.

Ukiumut naatsorsuutit pillugit inatsisit Kalaallit Nunaannut atortuulersinneri pillugu peqqussut malillugu ukiumut nalunaarusiamut piunasaqaatit saniatigut suliffeqarfittut innuttaasunik ikiortarialinnik suliffissaqartitsisutut nalunaarsorsimasoq ukiut tamaasa aamma pissutsit arlallit allat pillugit nalunaaruteqartassaaq, siunnersuummi kapitali 2 malillugu, tassunga ilanngullugu pingaartumik siunnersuummi §§ 6-8, suliffeqarfiup ingerlanneqarneranut ammasumillu pissuseqarnissaanut piunasaqaatinik aalajangersimasunik suliffeqarfiup naammassinninneranik nakkutilliinerup qulakkeerseqarnissaanut iluaqutaasussat. Takukkit siunnersuummi § 13 aamma § 20, imm. 4 taakkunungalunassuiaatit.

Suliffeqarfiup nalunaarsugaasimasup ukiumut nalunaarutaa pissutsillu allat taaneqartut pillugit allat nalunaarusiat siunnersuummi kapitali 4 malillugu suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorneqassapput. Takukkit siunnersuummi § 14 tassungalu nassuiaatit.

### *2.5 Suliffeqarfinnut innuttaasunik ikiortarialinnik suliffissaqartitsisunut nalunaarsuinnermut nalunaarsuiffik*

Suliffeqarfinniit qinnuteqarnek malillugu aamma Atuisartoqarnermut Unammilleqatigiinnermullu Aqutsisoqarfimmit akuerineqarnermi suliffeqarfinnut innuttaasunik ikiortarialinnik suliffissaqartitsisunut nalunaarsuineq pillugu pisortat aqqissuussinerannut siunnersuummi aalajangersaasoqarpoq. Suliffeqarfinnik nalunaarsuinnermut atugassamik imaluunniit nalunaarsuinnermut atugassamik Kalaallit Nunaanni Danmarkimiluunniit nalunaarsuiffimmik pioreersumik atuinissaaq, ilanngullugu ingerlatsineq aserfallatsaaliinerlu, IT atorlugu nalunaarsuiffimmik pilersitsinissaaq, ingerlatsinissaaq aserfallatsaaliuinissarlu siunnersuutip pisariaqartilerpaa.

Siunnersuut malillugu suliffeqarfiit innuttaasunik ikiortarialinnik suliffissaqartitsisutut nalunaarsorneqarnerannut atugassamik nalunaarsuiffimmik Naalakkersuisut pilersitsillutillu ingerlatsissapput, takuuk § 17, imm. 1.

Oqartussap imaluunniit suliffeqarfiup Naalakkersuisut sinnerlugit nalunaarsuiffimmik pilersitsinissaa ingerlatsinissaalu pillugu Kalaallit Nunaanni imaluunniit Danmarkimi pisortani oqartussamut imaluunniit pisortat suliffeqarfiutaannut siunnersuummi § 17, imm. 2 malillugu Naalakkersuisut isumaqatigiissuteqarsinnaapput.

Naalakkersuisut assersuutigalugu Atuisartoqarnermut Unammilleqatigiinnermullu Aqutsisoqarfik nalunaarsuiffimmik pilersitsissasoq ingerlatsissasorlu pillugu imaluunniit nalunaarsuiffimmik taamaattumik Naalakkersuisunit pilersinneqarsimasumik Atuisartoqarnermut Unammilleqatigiinnermullu Aqutsisoqarfik ingerlatsissasoq, Kalaallit Nunaanni Atuisartoqarnermut Unammilleqatigiinnermullu Aqutsisoqarfimmut isumaqatigiissuteqarsinnaapput.

Siunnersuummi § 17, imm. 3 malillugu oqartussat suliffeqarfiulluunniit nalunaarsuiffiat suliffeqarfinnik innuttaasunik ikiortarialinnik suliffissaqartitsisunik nalunaarsuinermit atugassatut Naalakkersuisunit atorneqassasoq pillugu Kalaallit Nunaanni Danmarkimiluunniit pisortani oqartussanik imaluunniit pisortat suliffeqarfiutaannik Naalakkersuisut isumaqatigiissuteqarsinnaapput.

Siunnersuut malillugu, tamanna Naalakkersuisut kissaatigippassuk, suliffeqarfinnik innuttaasunik ikiortarialinnik suliffissaqartitsisunik nalunaarsuiffittut Erhvervsstyrelsip suliffeqarfiit pillugit nalunaarsuiffianik (CVR-mi nalunaarsuiffik) atuinissaq pillugu Danmarkimi Erhvervsstyrelsimik assersuutigalugu Naalakkersuisut isumaqatigiissuteqarsinnaapput.

Nalunaarsuiffimmik pilersitsineq ingerlatsinerlu tassungalu atatillugu pissutsit attuumassuteqartut allat tamaasa pillugit aalajangersakkanik erseqqinnerusunik Naalakkersuisut aalajangersaassapput, takuuk siunnersuummi § 18.

## *2.6 Digitalikkut attaveqatigiinneq*

Siunnersuummi § 19 Naalakkersuisunut Naalakkersuisuniillu imaluunniit pisortani oqartussaniit, pisortat suliffeqarfiutaannut imaluunniit siunnersuummut ilaasunut suliffeqarfinnut namminersortunut inunnullu siunnersuummut ilaasunut digitalikkut attaveqatigiinnermut tunngasuvoq. Allakkatigut attaveqatigiinnermut taarsiullugu digitalikkut attaveqatigiinneq pillugu aalajangersakkanik Naalakkersuisut aalajangersaasinnaapput. Digitalikkut nalunaarut, taanna nalunaarummut nassitsiffiusumit pissarsiarineqarsinnaalerpat, anngussimasutut isigineqassaaq.

## *2.7 Siunnersuut malillugu nakkutilliineq, suliassanik suliarinninneq allatigullu pisortatut suliarinninneq*

Suliffeqarfinnik innuttaasunik ikiortarialinnik suliffissaqartitsisunik nalunaarsuineq tassungalu atasut pissutsit inuussutissarsiornermut suliaasaqarfimmut, Naalakkersuisuni inuussutissarsiornermut naalakkersuisoqarfimmit isumagineqartunut nalinginnaasumik ilaasarput. Siunnersuut malillugu nalinginnaasumik allaffissornikkut oqartussaqaq tassaavoq Atuisartoqarnermut Unammilleqatigiinnermullu Aqutsisoqarfik. Taanna inuussutissarsiornermut suliaasaqarfimmut, Naalakkersuisuni inuussutissarsiornermut naalakkersuisoqarfimmit isumagineqartumut, ilaavoq. Atuisartoqarnermut Unammilleqatigiinnermullu Aqutsisoqarfik taamaalilluni siunnersuummut allaffissornikkut aqutsinissamut atortitsinissamullu piginnaatitaavoq, ilanngullugit siunnersuut malillugu nakkutilliineq, aalajangiinerit peqqusissutinillu nalunaaruteqarnerit.

Siunnersuummi § 20 malillugu suliffeqarfinnik innuttaasunik ikiortarialinnik suliffissaqartitsisunik nalunaarsorsimasunik aamma inunnik allanik suliffeqarfinnillu siunnersuummi pineqartunut ilaasunik siunnersuummullu ilaasunik taakku ingerlataannik pissutsinillu Atuisartoqarnermut Unammilleqatigiinnermullu Aqutsisoqarfik nakkutilliisuvoq. Atuisartoqarnermut Unammilleqatigiinnermullu Aqutsisoqarfik siunnersuutip peqqussummik, siunnersuut malillugu aalajangersarneqartut aalajangersakkanik akuersinermilu piumasagaatinik eqqortinneqarnissaa pillugu nalunaaruteqarsinnaavoq. Atuisartoqarnermut Unammilleqatigiinnermullu Aqutsisoqarfik aamma suliffeqarfinnik innuttaasunik ikiortarialinnik suliffissaqartitsisutut nalunaarsorsimasut aamma siunnersuummut ilaasut inuit allat suliffeqarfimullu Atuisartoqarnermut Unammilleqatigiinnermullu Aqutsisoqarfimmit pisariaqartutut isigineqartunik paasissutissanik tunniusseqqusinnaavai, tamannalu Atuisartoqarnermut Unammilleqatigiinnermullu Aqutsisoqarfiup pisariaqartut isigisaatut pissuseqartillugu iluseqartillugulu tunniutissallugu.

Atuisartoqarnermut Unammilleqatigiinnermullu Aqutsisoqarfik ilaatigut pissutsit Atuisartoqarnermut Unammilleqatigiinnermullu Aqutsisoqarfiup nakkutilliiffisai, tassungalu atasunik pissutsit pillugit aalajangiisinnaavoq. Tamanna ilaatigut tassaasinnaavoq suliffeqarfiup suliffeqarfittut innuttaasunik ikiortarialinnik suliffissaqartitsisutut akuerineqarneranik nalunaaruteqarnermut imaluunniit nalunaaruteqannginnermut aamma suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsorsimanerata akuerineqarnerata utertinneqarneranut tunngasut pissutsit pillugit aalajangiinerit.

Siunnersuummi § 20, imm. 4 malillugu siunnersuummut ilaasut suliffeqarfiit inuillu siunnersuummut ilaasut pissutsit ingerlatallu pillugit nalunaarusianik, taakku akuerineqarnerinik, ukiumut nalunaarusianik allanillu nalunaarusianik Atuisartoqarnermut Unammilleqatigiinnermullu Aqutsisoqarfimmut nassiussissapput. Atuisartoqarnermut Unammilleqatigiinnermullu Aqutsisoqarfik siunnersuut malillugu akuersissutini

aalajangiinernilu nalunaaruteqarnerit pillugit piumasagaatinik aalajangersaasinnaavoq. Nalunaaruteqarneq pillugu Naalakkersuisut erseqqinnerusumik aalajangersaasinnaapput.

Siunnersuummi § 22 malillugu Atuisartoqarnermut Unammilleqatigiinnermullu Aqutsisoqarfik ukiumoortumik Atuisartoqarnermut Unammilleqatigiinnermullu Aqutsisoqarfiup nakkutilliinera aalajangiisimanerilu pillugit ukiumut nalunaarusiamik Naalakkersuisunut nassiussissaaq. Ukiumut nalunaarusiaq ilaatigut Atuisartoqarnermut Unammilleqatigiinnermullu Aqutsisoqarfiup nakkutilliineranik aalajangiineranillu taakkunungalu atasunik pissutsinik annertuunik tunngaviusunillu eqikkaasumik eqqartuinernik imaqassaaq. Ukiumut nalunaarusiaq aamma suliffeqarfiit innuttaasunik ikiortarialinnik suliffissaqartitsisut nalunaarsorsimasut taakkulu ingerlataat siunnersuummut ilaasut pillugit paasissutissanik imaqassaaq. Siunnersuummi suliassaqarfiup iluani ineriartormernik malinnaanissamut aamma suliffeqarfiit innuttaasunik ikiortarialinnik suliffissaqartitsisut taakkulu Kalaallit Nunaanni ingerlataannik siuarsaasunik ingerlatanik ingerlatsisoqartariaqarneranik naliliinermut nalunaarusiaq Naalakkersuisunit atorqeersinnaavoq.

Naalakkersuisut aamma tamanna Naalakkersuisunit pisariaqartinneqarpat nalunaarusiat paasissutissallu allat pillugit Atuisartoqarnermut Unammilleqatigiinnermullu Aqutsisoqarfimmut qinnutigisinnaavaat.

Atuisartoqarnermut Unammilleqatigiinnermullu Aqutsisoqarfiup Naalakkersuisunut nalunaarusiortarnera pillugu aalajangersakkanik erseqqinnerusumik Naalakkersuisut aalajangersaasinnaapput.

## *2.8 Naammagittaalliuuteqarsinnaaneq pillaasarnermilu aalajangersakkat*

Siunnersuummi §§ 23-24 naammagittaalliorsinnaanermut tunngasuupput. Siunnersuut imaluunniit aalajangersakkat siunnersuut malillugu aalajangersagaasut malillugit Atuisartoqarnermut Unammilleqatigiinnermullu Aqutsisoqarfimmit aalajangiineq pillugu naammagittaalliuut, pineqartumut aalajangiinerup nalunaarutigineraniit kingusinnerpaamik sapaatit akunneri 4-t qaangiutsinnagit Atuisartut Pisisartullu Maalaarutaannit Aalajangiisartunut suliassanngortinneqarsinnaavoq. Taamaattoq § 5, imm. 2 imaluunniit § 10, imm. 2 malillugu iluarsisoqarnissaanik piffissaliussamik aalajangiineq pillugu naammagittaalliuut allaffissornikkut oqartussanut qaffasinnerusunut suliassanngortinneqarsinnaangilaq. Siunnersuut imaluunniit aalajangersakkat siunnersuut malillugu aalajangersagaasut malillugit Atuisartoqarnermut Unammilleqatigiinnermullu Aqutsisoqarfimmit aalajangiineq pillugu naammagittaalliuut allaffissornikkut oqartussanut allanut suliassanngortinneqarsinnaangilaq. Suliame naammagittaalliuutigineqartumi Atuisartut Pisisartullu Maalaarutaannit Aalajangiisartut aalajangiinerat pillugu

naammagittaalliut eqqartuussivinnut suliaassanngortinneqarsinnaavoq.

Siunnersuummi aalajangersakkat ilaannik aamma aalajangersakkat siunnersuut malillugu aalajangersarneqartut ilaannik unioqqutitsinermut akiliisitsinermik pineqaatissiisoqarsinnaanera pillugu aalajangersakkanik siunnersuummi § 25 imaqarpoq. Siunnersuut imaluunniit aalajangersakkat siunnersuut malillugu aalajangersarneqartut malillugit akiliisitsinernut aamma pinerluttulerinermi Kalaallit Nunaannut inatsimmi malittarisassat malillugit inatsisitigut pisinnaatitaasoq pisussaataaasorlu peqquneqarsinnaavoq.

### **3. Aningaasaqarnikkut allaffissornikkullu pisortanut sunniutaasussat**

Siunnersuummi pineqarpoq suliffeqarfinnit qinnuteqarnek malillugu Naalakkersuisullu tamatuminna akuersissuteqarnerisigut, suliffeqarfiit innuttaasunik ikiortarialinnik suliffissaqartitsisut nalunaarsorneqartarnerannut pisortat aaqqissuussinerat. Siunnersuummi taamaalilluni suliffeqarfinnik nalunaarsuinermi atugassamik IT atorlugu nalunaarsuiffimmik pilersitsinissaq, ingerlatsinissaq aserfallatsaaliuinissarlu imaluunniit nalunaarsuinermut atugassamik Kalaallit Nunaanni Danmarkimiluunniit nalunaarsuiffioreersumik atuinissaq, tassunga ilanngullugu ingerlatsineq aserfallatsaaliinerlu, pisariaqartinneqalerpoq. Takukkit siunnersuummi kapitali 4 tassungalu nassuiaatit. Tassunga aningaasartuutit ukiumut 200.000 kr.-inik annertussuseqarnissaat naatsorsuutigineqarpoq. Aningaasartuutit Atuisartoqarnermut Unammilleqatigiinnermullu Aqutsisoqarfinnut tassunga aningaasaliisoqarneratigut aningaasalersorneqassaaq.

Siunnersuutip atuutilernerani suliffeqarfiit suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaannut akuersissuteqartarnermut aaqqissuussinermik pilersitsisoqarpoq. Siunnersuut malillugu sulianik suliarinninnermi allatigullu pisortatut suliarinninnermi ilaatigut uku pineqarput: Suliffeqarfiit suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaasa akuerineqarnissaat pillugu qinnuteqaatinik suliarinninneq. Siunnersuut malillugu suliffeqarfiit nalunaarusiaannik paasissutissanillu nalunaarutigineqartunik allanik misissuineq, ilaatigut siunnersuummi kapitali 2 malillugu suliffeqarfiit innuttaasunik ikiortarialinnik suliffissaqartitsisutut nalunaarsorneqarnissamut suliffeqarfiit piumasaqaatinik naammassinninersut pillugit misissuinissaq siunertaralugu. Akuersissutinik nalunaarutigineqarsimasunik utertitsisoqarsinnaaneranut tunngatillugu sulianik suliarinninneq. Siunnersuummut ilaasunik inunnik suliffeqarfinnullu nakkutilliineq. Naatsorsuutigineqarpoq siunnersuut malillugu sulianik suliarinninneq allatigullu oqartussatut suliarinninneq allaffissornikkut sulisumut 1-imut ukioq naallugu sulisussamut taamaalillunilu ukiumut 600.000 kr.-inik annertussuseqartunik Atuisartoqarnermut Unammilleqatigiinnermullu Aqutsisoqarfinnut aningaasartuutit qaffaaneriniq kinguneqassasoq.

#### **4. Aningaasaqarnikkut allaffissornikkullu inuussutissarsiortunut sunniutaasussat**

Nalunaarsuinissamut aaqqissuussineq siunnersuut malillugu kajumissuseq naapertorlugu toqqagassaavoq. Taamaattumik tassunga atatillugu inuussutissarsiortut aningaasartuutaasa pisussaaffiisaluunniit qaffannissaannik pisussaaffiliisoqanngilaq. Taamaattumik naatsorsuutigineqarpoq siunnersuut inuussutissarsiortunut aningaasaqarnikkut allaffissornikkullu sunniuteqassanngitsoq.

#### **5. Avatangiisinut, pinngortitamut inuillu peqqissusaannut sunniutaasussat**

Siunnersuut avatangiisinut, pinngortitamut inuillu peqqissusaannut sunniuteqarnerlussasoq naatsorsuutigineqanngilaq.

Danmarkimi nunanilu allani misilittakkat takutippaat suliffeqarfiit innuttaasunik ikiortarialinnik suliffissaqartitsisut inuiaqatigiinni unamminartut ilaannik aaqqiinissamut nalinginnaasumik iluaqutaasartut, tassunga ilanngullugu ilaatigut suliffissaqarnek, inuit atugarliortut, peqqissuseq, atugarissaarneq avatangiisitigullu pissutsit eqqarsaatigalugit. Tamanna assersuutigalugu suliffeqarfiit innuttaasunik ikiortarialinnik suliffissaqartitsinerisigut toqqaannartumik pisinnaavoq, kisianni aamma pisortani oqartussat, pisortat suliffeqarfiutaat namminersortullu suliffeqarfiutaat inooqataanermut tunngasutigut allannguisinnaanerannik suliassaqarfiillu taaneqartut suliassaqarfiillu allat iluini anguniakkanik nutaanik qaffasinnerusunillu anguniagaqarnissaannut kaammattornerisigut.

Siunnersuut avatangiisinut, pinngortitamut inuillu peqqissusiannut nalinginnaasumik pitsaasumik sunniuteqassasoq naatsorsuutigineqarpoq, ilaatigut Kalaallit Nunaanni innuttaasunut aamma Kalaallit Nunaanni inuiaqatigiinnut pitsaasunik sunniuteqartumik suliffeqarfiit innuttaasunik ikiortarialinnik annertunerusumik suliffissaqartitsinerinut iluaqutaanissaa siunnersuummi siunertarineqarmat.

#### **6. Innuttaasunut sunniutaasussat**

Siunnersuut malillugu nalunaarsuisarnermik aaqqissuussineq tassaavoq suliffeqarfinnut aaqqissuussineq taamaattumillu innuttaasut pineqartunut ilaanatik. Taamaattoq siunnersuut nalinginnaasumik innuttaasunut pitsaasumik kinguneqassasoq naatsorsuutigineqarpoq, tassunga ilanngullugit ilaatigut innuttaasunut ikiortarialinnut pitsaasumik kinguneqartitsineq aamma avatangiisinut, pinngortitamut inuillu peqqissusiannut kinguneqartitsilluni. Immikkoortoq 5 qulaani takuuk.

#### **7. Sunniutaasussat annertuut allat**

Siunnersuut annertuunik allanik sunniuteqassasoq naatsorsuutigineqanngilaq.

#### **8. Oqartussaasunut, kattuffinnut il.il. tusarniaaneq**



Siunnersuut piffissami ulloq [...] [qaammat] 2019-imiit ulloq [...] [qaammat] 2019-imut Namminersorlutik Oqartussat tusarniaanermi nittartagaanni [www.naalakkersuisut.gl](http://www.naalakkersuisut.gl)-imi tamanut saqqummitinneqarpoq.

Siunnersuut piffissami tassani oqartussani kattuffinnilu ilaalu ilanngullugit ukunani tusarniaassutigineqarpoq: [...].

Inuussutissarsiornermut Nukissiuuteqarnermullu Naalakkersuisoqarfiup oqartussanit kattuffinnillu makkunangga tusarniaanermi akissuteqaatit tiguai: [...].

Avataniit tusarniaanerup nalaani tiguneqartut tusarniaanermut akissuteqaatit tulliuttuni sammineqarput. Oqaatigineqassaaq tusarniaanermut akissuteqaatit uingasumik allanneqarmata, tusarniaanermilu akissutit pingaaruteqarneranik nalilersuineq tunngavigalugu pingaarnertiguinnaq issuarneqarlutik.

Tusarniaanermi akissutit makkunangga [...]:

## **Inatsisissatut siunnersuummi aalajangersakkanut ataasiakkaanut nassuiaatit**

### *§ 1-imut*

Imm. 1-imut

Suliffeqarfik siunnersuummi §§ 6-8-mi piumasaqaatinik naammassinnittoq, siunnersuummi § 4 malillugu suliffeqarfiup innuttaasunik ikiortarialinnik suliffissaqartitsisutut nalunaarsugaanissaata akuerineqarnissaa pillugu Atuisartoqarnermut Unammilleqatigiinnermullu Aqutsisoqarfimmut qinnuteqarsinnaavoq.

Siunnersuummi § 1, imm. 1-imi aalajangersagaq malillugu nalunaarsuisarnermut aaqqissuussineq pisussaaffiunani nammineq kajumissutsimik atornerqarsinnaavoq. Suliffeqarfik innuttaasunik ikiortarialinnik suliffissaqartitsisoq, siunnersuummi §§ 6-8-imi piumasaqaatinik naammassinnittoq, taamaalilluni suliffeqarfiup tamanna kissaatigippagu, suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsorneqarnissaanik qinnuteqarsinnaavoq. Suliffeqarfik, suliffeqarfittut innuttaasunik ikiortarialinnik suliffissaqartitsisutut nalunaarsugaanissamik qinnuteqarsimanngippat akuerisaasutullu nalunaarfigineqarsimanngippat, siunnersuut malillugu nalunaarsorneqarnissamut pisussaaffeqanngilaq. Kingullertut taaneqartumi siunnersuummi § 9 malinneqassaaq.

Siunnersuut nalinginnaasumik akuersisarnermik aaqqissuussinermik tunngaveqarpoq. Akuersisarnermik aaqqissuussineq taamaaqataa Danmarkimi suliffeqarfiit innuttaasunik ikiortarialinnik suliffissaqartitsisut pillugit inatsimmi atuuttumiinngilaq. Suliffeqarfik suliffeqarfittut innuttaasunik ikiortarialinnik suliffissaqartitsisoq taamaalilluni siunnersuummi §§ 6-8-imi piumasaqaatinik naammassinnittoq aamma suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorsimanerata akuerineqarluni Atuisartoqarnermut Unammilleqatigiinnermullu Aqutsisoqarfimmit nalunaarfigineqarsimasoq, takuuk § 4, suliffeqarfiit innuttaasunik ikiortarialinnik suliffissaqartitsisunut nalunaarsuiffimmi suliffeqarfittut innuttaasunik ikiortarialinnik suliffissaqartitsisutut nammineq nalunaarsussaaq. Suliffeqarfik suliffeqarfittut innuttaasunik ikiortarialinnik suliffissaqartitsisutut nammineq nalunaarsortissaaq. Nalunaarsuineq siunnersuummi kapitali 4 malillugu immikkut nalunaarsuiffimmi pissaaq.

Taamaattorli suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanut aamma suliffeqarfittut innuttaasunik ikiortarialinnik suliffissaqartitsisutut nalunaarsorsimasutut taaguutip atimini nittarsaanermilu atornissaanut, akuersissuteqarnek tamatuma kingorna Atuisartoqarnermut Unammilleqatigiinnermullu Aqutsisoqarfimmit utertinneqarsimassanngitsoq, piumasaqaataalluni, takuuk siunnersuummi

§ 5.

Imm. 2-mut

Aalajangersagaq § 1, imm. 1-imut atatillugu nassuiarneqarlunilu atorneqassaaq. § 1, imm. 2-mi aalajangersagaq malillugu suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamik qinnuteqarnerani, suliffeqarfiup siunnersuummi §§ 6-8-imi piumasagaatit naammassisimagai uppersaataat nassiunneqassaaq.

Suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamik qinnuteqarnerani uppersaataat suut suliffeqarfiup Atuisartoqarnermut Unammilleqatigiinnermullu Aqutsisoqarfimmut nassiutissanerai aalajangersakkami erseqqinnerusumik allanneqarput. Suliffeqarfik nalunaarsorneqarnissamik qinnuteqarpat imaluunniit tassunga atatillugu uppersaataat taamaalillutik nassiunneqassapput.

Siunnersuummi § 1, imm. 2, nr. 1-7-imi allassimasut uppersaataat qinnuteqarnermi suliffeqarfimmit nassiunneqassapput.

Nr. 1-imut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut piumasagaataavoq Kalaallit Nunaanni suliffeqarfimmut nalunaarsuiffimmi suliffeqarfiup namminerisaminik nalunaarsugaanermi normoqarnissaa (CVR-normu), Kalaallit Nunaanni najugaqartuunissaa aamma inummit ataatsimit pigineqarluni suliffeqarfiunnginnissaa imaluunniit piginneqatigiinnikkut suliffeqarfiup pilersinneqarsimanginnissaa, takuuk siunnersuummi § 6. Suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaaq pillugu qinnuteqarnermi tamanna suliffeqarfiup uppersaataat. Suliffeqarfiup ilaatigut CVR-nalunaarsuiffimmiit suliffeqarfiup nalunaarsorsimasutut uppersaataatimi assilinerata nassiunneratigut tamanna uppersaataat, tassani suliffeqarfiup CVR-normua, ingerlatseqatigiiffittut ilusaa aamma suliffeqarfiup nalunaarsugaasimasup najugaa takuneqarsinnaallutik.

Namminerisamik CVR-normoqarnissamik piumasagaatip kingunerisaanik suliffeqarfimmi anginerusumi tunisassiorfik imaluunniit immikkoortortaq namminerisamik P-normulik suliffeqarfittut innuttaasunik ikiortarialinnik suliffissaqartitsisutut nalunaarsugaasinnaangilaq. Taamaattoq suliffeqarfiit namminerisamik suliffissuaqarfimmi CVR-normoqartut suliffeqarfittut innuttaasunik ikiortarialinnik suliffissaqartitsisutut nalunaarsugaasinnaapput. Suliffeqarfiup Kalaallit Nunaanni najugaqartuunissaata kingunerisaanik suliffeqarfik Kalaallit Nunaanni najugaqartutut nalunaarsugaasimassaaq.

Siunnersuummi § 6 malillugu suliffeqarfiup inummit ataatsimit ingerlanneqartuunnginnissaa

imaluunniit piginneqatigiinnikkut pilersinneqarsimasuunnginnissaa pillugu piumasaqaat, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorsimanissaanut immikkut ingerlatseqatigiiffittut iluseqassasoq piumasaqaateqarnermik kinguneqanngilaq. Suliffeqarfik innuttaasunik ikiortarialinnik suliffissaqartitsisutut nalunaarsorsimasoq taamaalilluni assersuutigalugu tassaasinnaavoq aktiaatileqatigiiffik (A/S), piginneqatigiilluni ingerlatseqatigiiffik (ApS), soqutigisaqatigiinnikkut ingerlatseqatigiiffik (I/S), peqatigiiffik, aningaasaateqarfik allaluunniit pisortat suliffeqarfiat imminut pigisoq.

#### Nr. 2-mut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsugaasimanissaanut piumasaqaat alla tassaavoq suliffeqarfiup innuttaasunik ikiuiniarnermik siunertaqarnissaa, takuuk siunnersuummi § 7, imm. 1, nr. 1. Taamaattumik suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanik qinnuteqarnerani, suliffeqarfiup innuttaasunut ikiuiniarnermik siunertaqarnera suliffeqarfiup malittarisassaani imaluunniit malittarisassaqaanngippat pilersinneqarnerani uppersaammitt takuneqarsinnaasoq, uppersarsassavaa.

Suliffeqarfik soqutigisaqatigiiffittut ingerlatseqatigiiffiuppat (I/S) malittarisassaqaarnissamut pisussaaffeqanngilaq. Suliffeqarfiup innuttaasunik ikiuiniarnermik siunertaqarnera taamaalilluni suliffeqarfiup pilersinneqarneranut uppersaataanit takuneqarsinnaassaaq.

#### Nr. 3-mut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimanissamut piumasaqaatit pingajuat tassaavoq, suliffeqarfik inuussutissarsiummik ingerlataqartuussasoq, takuuk siunnersuummi § 7, imm. 1, nr. 2. Tamanna isumaqarpoq suliffeqarfiup ingerlatai annertuut nioqqutissanik kiffartuussinernilluunniit tuniniaanermut tunngasuussasut. Tamanna pillugu erseqqinnerusut siunnersuummi § 7, imm. 1, nr. 2-mut nassuiaatiniittut takukkit. Suliffeqarfiup tamanna qinnuteqarnermini uppersarsassavaa. Suliffeqarfiup ukiumut nalunaarusiaata kingulliup assilinerata nassiunneqarneratigut ilaatigut suliffeqarfiup tamanna uppersarsarsinnaavaa. Suliffeqarfik ukiumut nalunaarusiaqaanngippat suliffeqarfiup ingerlataanik suliffeqarfik allaaserisaqarsinnaavoq tassungalu ilanngullugu nioqqutissanik kiffartuussinernilluunniit tunisanut tunngasut suliffeqarfiup kaaviiartitai qanoq annertutiginersut allallugu.

Suliffeqarfik aallarterlaajuppat suliffeqarfiup nioqqutissanik kiffartuussinernilluunniit sunik tunisaqaarnissamik naatsorsuutigisani aamma tunisinerup kaaviiartitanut naleqqiullugu qanoq annertutiginnissaanik suliffeqarfiup naatsorsuutigisaa allappagit naammassaaq.

Suliffeqarfik suliffeqarfittut innuttaasunik ikiortarialinnik suliffissaqartitsisutut

nalunaarsorneqarnissamik akuerineqarluni nalunaarfigineqarpat, siunnersuummi § 13-imi aalajangersakkat malillugit suliffeqarfik tamatuma kingorna ukiukkaartumik ukiumut nalunaarusiamik piareersaallunilu nassiussisassaaq.

Nr. 4-mut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimanissamut piumasaqaatit sisamaat tassaavoq suliffeqarfiup pisortanut attuumassuteqannginnissaa, takuuk siunnersuummi § 7, imm. 1, nr. 3. Tamanna isumaqarpoq suliffeqarfik suliffeqarfiup aqunneqarnerani ingerlanneqarneranilu annertuumik pisortanit sunnerneqarnani ingerlanneqassasoq. Tamanna pillugu erseqqinnerusut siunnersuummi § 7, imm. 1, nr. 3-mut nassuiaatini takukkit. Suliffeqarfiup tamanna qinnuteqarnermini uppersarsassavaa. Suliffeqarfiup ilaatigut suliffeqarfiup malittarisassaata imaluunniit taassuma pilersinneqarneranik uppersarsaatit assilineqarnerisa nassiunneqarnerisigut tamanna uppersarsassavaa, taakkunani takuneqarsinnaassalluni suliffeqarfimmi qitiusumik aqutsisutut oqartussat qanoq katitigaanersut, tassunga ilanngullugu qanoq siulersuisunik toqqaasoqartarnersoq.

Suliffeqarfiup qitiusumik aqutsinermi oqartussaasuinut taaguut, aktianik piginneqatigiinnikkullu ingerlatseqatigiiffiit pillugit inatsisip (ingerlatseqatigiiffinnut inatsit) Kalaallit Nunaannut atortuulersinnera pillugu peqqussummi § 5, imm. 1, nr. 4-mut naapertuuttumik nalinginnaasumik paasineqassaaq. Suliffeqarfimmi pisortaaneqarfeqartuni siulersuisoqartunilu qitiusumik aqutsinermi oqartussat tassaapput siulersuisut. Suliffeqarfiit taamaallaat ataasiinnarmik pisortaaneqarfillit tassaapput qitiusumik aqutsisoqarfimminnik aqunneqartut. Suliffeqarfimmi pisortaaneqarfeqartuni nakkutilliisutullu siunnersuisoqatigeeqartuni qitiusumik aqutsinermi oqartussat tassaapput pisortaaneqarfik.

Suliffeqarfik aamma pisortat suliffeqarfiup ingerlanneqarneranut ulluinnarnilu aqutsineranut qanoq annertutigisumik sunniuteqarneri pillugit paasissutissiissaaq. Suliffeqarfiup ingerlanneqarneranut imaluunniit ulluinnarni aqunneqarneranut pisortat sunniuteqanngitsut suliffeqarfik isumaqarpat, tamanna suliffeqarfiup allassavaa. Pisortat suliffeqarfiup ingerlanneqarneranut imaluunniit ulluinnarni aqunneqarneranut sunniuteqartut suliffeqarfik isumaqarpat, tamanna suliffeqarfiup allassavaa aamma tamatuma qanoq annertutiginera paasissutissiissutigalugu.

Suliffeqarfiup pisortanit isumalluuteqannginnera pillugu allaaserinninneq siunnersuummi § 13, imm. 3, nr. 4 malillugu ukiukkaartumik nalunaarusiornermut atatillugu nutarterneqartassaaq naammattumillu annertussuseqartumik allanngortinneqartassalluni.

Nr. 5-imut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut

nalunaarsorsimanissamut piumasaqaatit tallimaat tassaavoq suliffeqarfiup sulinermini akuutitsisuunissaa akisussaaffeqarnissaalu, takuuk siunnersuummi § 7, imm. 1, nr. 4. Suliffeqarfiup qinnuteqarnermini tamanna uppersassavaa.

Suliffeqarfik qanoq sulinermi akuutitsinersoq akisussaaffeqarnerlorlu allaaserisamik taamaalilluni suliffeqarfik suliaqarlunilu nassiussissaaq. Suliffeqarfiup siunnerfigisani, suleqatigisani allallu soqutigisaqartut ilanngutsinnerannut suliffeqarfiup periusaa ilaatigut suliffeqarfiup allaaserissavaa.

Suliffeqarfik pilersinneqaqqammerpat allaaserinninneq nalinginnaasumik tassaassaaq suliffeqarfik siunissami sulinermini akuutitsinerup akisussaaffeqarnerullu qanoq qulakkeerneqarnissaannut pilersaarut. Sulinermini akuutitsinermi akisussaaffeqarnermilu siunnersuut malillugu nalinginnaasumik paasineqassaaq suliffeqarfiup niuernikkut periusissiaani aamma niuernikkut ingerlataa innuttaasunik ikiuiniarnermi siunertanut naleqqiullugu suliffeqarfimmi atorfeqartut, sullitat, suleqatigisat soqutigisaqatigiillu suliffeqarfiup aqutsisuunit ilanngutinniarneqarneri. Tamanna pillugu erseqqinnerusut siunnersuummi § 7, imm. 1, nr. 4-mut nassuiaatini takukkit. Suliffeqarfimmi qitiusumik aqutsinermi oqartussaat taakkuupput suliffeqarfiup pingaarnertigut periusissatigullu aqunneqarneranik isumaginnittut aamma suliffeqarfiup illersorneqarsinnaasumik aaqqissugaaneramik qulakkeerisussat. Qitiusumik aqutsinermi oqartussat ilaatigut siunnersuummi § 1, imm. 2, nr. 4-mut qulaani nassuiaatini eqqartorneqarput.

Allaaserinninneq siunnersuummi § 13, imm. 3, nr. 4 malillugu ukiukkaartumik nalunaarusiornermut atatillugu nutarterneqartassaaq naammattumillu annertussuseqartumik allanngortinneqartassalluni.

Nr. 6-imut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimanissamut piumasaqaatit arfernat tassaavoq suliffeqarfik sinneqartoorutiminik innuttaasunik ikiortarialinnik isumaginnissasoq, takuuk siunnersuummi § 7, imm. 1, nr. 5.

Suliffeqarfiup akileraaruteqareernermini sinneqartoorutiminik siunnersuummi § 7, imm. 1, nr. 5, litra a-d naapertorlugit atuisartuq, suliffeqarfik qinnuteqaammi uppersassavaa. Suliffeqarfiup tamanna suliffeqarfiup kingullermik ukiumut nalunaarusiami assilinerata nassiunneratigut, uppersassavaa. Suliffeqarfik ukiumut nalunaarusiamik nassiussinnaangippat taarsiullugu akileraaruteqareernermi suliffeqarfiup sinneqartoorutai suliffeqarfik qanoq atuinersoq aamma siunissami qanoq atuinissamik pilersaaruteqarnersoq suliffeqarfik allaaserinnissaaq.

Suliffeqarfik suliffeqarfittut innuttaasunik ikiortarialinnik suliffissaqartitsisutut

nalunaarsorneqarnissamik akuerineqartoq suliffeqarfik nalunaarfigineqarpat, suliffeqarfiup iluanaarutininik akiliinerini imaluunniit piginnittut akornanni sinneqartoorutininik allatigut agguaassisoqarnerini tamani suliffeqarfik Atuisartoqarnermut Unammilleqatigiinnermullu Aqutsisoqarfimmut nalunaaruteqassaaq, takuuk siunnersuummi § 13, imm. 4.

Nr. 7-imut

Suliffeqarfik suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanik akuerineqarpat, suliffeqarfiup iluanaarutininik tunniussinerini imaluunniit piginnittut akornanni sinneqartoorutininik avitseqatigiinnermik allatut ilusilinnik ingerlataqarnerini tamatigut, suliffeqarfik Atuisartoqarnermut Unammilleqatigiinnermullu Aqutsisoqarfimmut nalunaarusiortassaaq, takuuk siunnersuummi § 13, imm. 4.

### *§ 2-mut*

Aalajangersagaq malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaaq pillugu suliffeqarfiup qinnuteqaataa Atuisartoqarnermut Unammilleqatigiinnermullu Aqutsisoqarfimmit piareersarneqartumik tamanullu saqqummiunneqarsimasumik qinnuteqarnermi immersugassamik atuilluni nassiunnissaa, aamma qinnuteqaatip emailip allatigulluunniit digitalikkut atassuteqaatit atorlugit nassiunneqarnissaa pillugu aalajangersakkanik Naalackersuisut aalajangersaasinnaapput.

Naalackersuisut aamma emailit allatigulluunniit digitalikkut attaveqaatit atornerisigut qinnuteqaatip nassiunneqarnissaa pillugu aalajangersakkanik aalajangersaasinnaapput. Taamatut aalajangersakkat ilaatigut tamanna pillugu nalunaarummi aalajangersarneqarsinnaapput.

### *§ 3-mut*

Imm. 1-imut

Aalajangersakkap kingunerisaanik suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaaq pillugu qinnuteqartoq qinnuteqaatip suliarineqarneranut suliamilu aalajangiinissamut pisariaqartunik paasissutissanik tamanik uppernarsaatinillu tamanik nalinginnaasumik nassiussinissamik pisussaaffeqarpoq. Aamma takujuk siunnersuummi § 20, imm. 3.

Qinnuteqaatip tamakkiisuunissaa aamma qinnuteqaammi paasissutissat eqqortuunissaat qinnuteqartup taamaalilluni nammineq akisussaaffigai. Siunnersuummi §§ 6-8-imi piunnaasaqatiginik qinnuteqartup naammassininnera, tamatumalu qinnuteqaammit takuneqarsinnaanerata qulakkeerneqarnissaa taamaalilluni qinnuteqartup nammineq akisussaaffigaa.

Imm. 2-mut

Imm. 2-mi aalajangersagaq suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorsimasutut akuerineqarnissamik qinnuteqartoq, paasissutissanik uppersaatinillu qinnuteqaatip suliarineqarnerani suliamilu aalajangiinnermi pisariaqartutut Atuisartoqarnermut Unammilleqatigiinnermullu Aqutsisoqarfimmit isigineqartunik suliffeqarfiup nassiussinissaanut peqqusinissamut Atuisartoqarnermut Unammilleqatigiinnermullu Aqutsisoqarfimmut tunngavissiivoq. Aalajangersagaq malillugu suliffeqarfik paasissutissanik uppersaatinillu Atuisartoqarnermut Unammilleqatigiinnermullu Aqutsisoqarfimmit pissuseqarnissaanik iluseqarnissaanillu pisariaqartutut isigineqartunik nassiusseqqullugu, Atuisartoqarnermut Unammilleqatigiinnermullu Aqutsisoqarfiup peqqusinnaallugu. Aamma takujuk siunnersuummi § 20, imm. 3. Qinnuteqarnermi suliap suliarinerani aalajangiiffigineranilu atugassanik qanoq iluseqartunik paasissutissanik nassiussinissaq uppersaatinillu nassiussinissaq pisariaqarnersoq pillugu Atuisartoqarnermut Unammilleqatigiinnermullu Aqutsisoqarfik aalajangiisussaavoq.

Nalinginnaasumik ingerlatsinermi inatsisini malittarisassat tunngavigisallu naapertorlugit pisuni ataasiakkaani pissutsinik attuumassuteqartunik tamanik aalajangersimasumik naliliinerup kingorna paasissutissanik nalunaaruteqarnissaq aamma uppersaatinik nassiussinissaq pillugu Atuisartoqarnermut Unammilleqatigiinnermullu Aqutsisoqarfik aalajangiisaaq.

Atuisartoqarnermut Unammilleqatigiinnermullu Aqutsisoqarfik assersuutigalugu paasissutissanik nalunaaruteqarneq imaluunniit uppersaatinik nassiussineq pappiliangorlugit imaluunniit elektroniskimi, tassunga ilanngullugu USB-imi pissasoq suliffeqarfimmut peqqusinnaavoq. Elektroniskimik uppersaaitit immikkut angissuseqartillugit pissarsiarineqarsinnaassasut Atuisartoqarnermut Unammilleqatigiinnermullu Aqutsisoqarfiup assersuutigalugu aamma piumasarisinnaavaa, ilanngullugu Microsoft Word-imi imaluunniit PDF-inngorlugit, imaluunniit paasissutissat uppersaaitillu oqaatsit aalajangersimasut atorlugit pissasut, tassunga ilanngullugu danskisut imaluunniit tuluttut.

Suliffeqarfittut innuttaasunik ikiortarialinnik suliffissaqartitsisusut suliffeqarfiup nalunaarsugaanissaata akuerineqarnissaa pillugu qinnuteqaat pillugu suliamik suliarinninnermut aalajangiinnermullu atatillugu aqutsisoqarfiup atugassanik paasissutissanik uppersaatinillu tamanik Atuisartoqarnermut Unammilleqatigiinnermullu Aqutsisoqarfiup noqqaasinnaanerata qulakkeerneqarnissaanut aalajangersagaq nalinginnaasumik siunertaqarpoq.



Qinnuteqaat pillugu suliamik suliarinninnermut aalajangiiniarnermullu atatillugu qinnuteqartumiit paasissutissat uppersaatilluunniit amigaataasinnaasut pillugit noqqaanissamut Atuisartoqarnermut Unammilleqatigiinnermullu Aqutsisoqarfimmut pisussaaffeqarnermik aalajangersagaq kinguneqartitsingilaq.

#### *§ 4-mut*

##### *Imm. 1-imut*

Aalajangersagaq malillugu suliffeqarfik §§ 6-8-imi piumasaqaatinik naammassinnissimappat, suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaa akuerineqassasoq, Atuisartoqarnermut Unammilleqatigiinnermullu Aqutsisoqarfik aalajangiisinaavoq.

Taamaalilluni siunnersuut malillugu Atuisartoqarnermut Unammilleqatigiinnermullu Aqutsisoqarfik allaffissornikkut oqartussaasuvoq, aamma siunnersuummik aqutsisuusut aamma siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimasutut akuerineqarnera pillugu nalunaaruteqarnissamik imaluunniit nalunaaruteqannginnissamik aalajangiinissamut piginnaatitaalluni.

Suliffeqarfik siunnersuummi §§ 6-8-imi piumasaqaatinik qinnuteqartoq naammassinnippat, aamma suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaaq pillugu qinnuteqaammik naammattumik eqqortumillu tunniussisimappat, suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut akuerineqarnissamik pisinnaatitaaffeqarpoq.

Suliffeqarfik siunnersuummi §§ 6-8-imi piumasaqaatinik naammassinninngippat imaluunniit tamanna naammattumik uppersarsimangippagu, suliffeqarfittut innuttaasunik ikiortarialinnik suliffissaqartitsisutut nalunaarsorsimasutut akuerineqarnissaaq pillugu suliffeqarfiup qinnuteqaataa itigartinneqassasoq Atuisartoqarnermut Unammilleqatigiinnermullu Aqutsisoqarfik aalajangiisaaq.

##### *Imm. 2-mut*

Imm. 2-mi aalajangersagaq malillugu siunnersuut malillugu akuersissuteqarneq atugassarititaasut aalajangersimasut tunngavigalugit nalunaarutigineqarsinnaavoq, ilanngullugit §§ 6-8-imi piumasaqaatinik suliffeqarfiup naammassinninnissaa pillugu aamma akuersissuteqarnermut atugassarititaasut attuumassuteqartut allat aamma akuersissuteqarnerup atorunnaarsinneqarnissaa utertinneqarnissaalu pillugit.

Aalajangersagaq taamaalilluni suliffeqarfittut innuttaasunik ikiortarialinnik suliffissaqartitsisutut nalunaarsorsimasutut akuerineqarnissami pissutsit attuumassuteqartut

tamaasa pillugit atugassarititaasunik aalajangersaanissamut Atuisartoqarnermut Unammilleqatigiinnermullu Aqutsisoqarfik nalinginnaasumik inatsimmi tunngavissamik imaqarpoq. Pisuni ataasiakkaani pissutsinik tamanik aalajangersimasumik nalilersuineq naapertorlugu aamma nalinginnaasumik ingerlatsinermi inatsisini malittarisassat tunngavigisallu naapertorlugit akuersinissamut piumasaqaatinik Atuisartoqarnermut Unammilleqatigiinnermullu Aqutsisoqarfik aalajangersaasinnaavoq, ilanngullugit kinaassusersiunnginnissaq, annertoqqatigiimmik pinninnissaq assigiimmillu suliarinninneq pillugit tunngaviusut.

Siunnersuummi §§ 6-8-imi piumasaqaatinik suliffeqarfiup naammassinninnera pillugu piumasaqaatinik aamma akuersissuteqarnermut atugassarititaasunik allanik attuumassuteqartunik aamma akuersissuteqarnerup atorunnaarnera utertinneqarneralu pillugit ilaatigut Atuisartoqarnermut Unammilleqatigiinnermullu Aqutsisoqarfik aalajangersaasinnaavoq. Suliffeqarfiup suliffeqarfittut innuttaasunik ikiortarialinnik suliffissaqartitsisut nalunaarsugaanera immikkut nalunaarsuiffimmi nalunaarsorneqarnissaa tassungalu atasunik pissutsit aamma nalunaarsugaajunnaarnissamut pisussaaffik pillugu piumasaqaatinik ilaatigut Atuisartoqarnermut Unammilleqatigiinnermullu Aqutsisoqarfik aamma aalajangersaasinnaavoq. Pissutsit taaneqartut akuersissuteqarnermi atugassarititaasinnaasutut naleqqussinnaasunut taamaallaat assersuutaapput. Akuersinermi pissutsinit taaneqartunit allaanerusunik pissutsit allat pillugit atugassarititaasunik taamaalilluni aamma Atuisartoqarnermut Unammilleqatigiinnermullu Aqutsisoqarfik aalajangersaasinnaavoq.

### *§ 5-imut*

#### **Imm. 1-imut**

Aalajangersakkami pineqarpoq suliffeqarfiit innuttaasunik ikiortarialinnik suliffissaqartitsisutut nalunaarsorsimasut nalunaaruteqarnissamut pisussaaffeqarnerat. Suliffeqarfik suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsorneqarnissaanik akuerineqarsimasoq siunnersuummi §§ 6-8-imi piumasaqaammik ataatsimik arlalinnilluunniit naammassinninngippat suliffeqarfiup ingerlaannartumik tamanna Atuisartoqarnermut Unammilleqatigiinnermullu Aqutsisoqarfimmut nalunaarutigissavaa.

Suliffeqarfik siunnersuummi §§ 6-8-imi piumasaqaatinik tamaginnik naammassinngitsoq suliffeqarfimmi qitiusumik aqutsinermi oqartussani ilaasortamit ataatsimit ilisimaneqalernerata imaluunniit ilisimaneqartariaqalernerata kingorna ingerlaannaq nalunaaruteqarnissamut pisussaaffik atuutilissaaq.

Nalunaaruteqartussaannermut suliffeqarfimmi qitiusumik aqutsisutut ilaasortat kikkulluunniit pineqartunut ilaapput. Taaguut suliffeqarfiup qitiusumik aqutsinermi oqartussai aktianik

piginneqatigiinnikkullu ingerlatseqatigiiffiit pillugit inatsisip Kalaallit Nunaannut atortuulersinnera pillugu peqqussummi (ingerlatseqatigiiffinnut inatsit) § 5, imm. 1, nr. 4-mut naapertuuttumik nalinginnaasumik paasineqassaaq. Suliffeqarfinni pisortaaneqarfeqartuni siulersuisoqartunilu qitiusumik aqutsinermi oqartussat tassaapput siulersuisut. Suliffeqarfiit ataasiinnarmik pisortaaneqarfillit aamma siulersuisullit tassaapput siulersuisunit qitiusumik aqutsisoqarfillit. Suliffeqarfinni pisortaaneqarfeqartuni nakkutilliisutullu siunnersuisoqatigeeqartuni qitiusumik aqutsinermi oqartussat tassaapput pisortaaneqarfik.

Pissutsit iluarsineqarsimangippata, imaluunniit piffissaliussap Atuisartoqarnermut Unammilleqatigiinnermullu Aqutsisoqarfimmit aalajangersarneqartup iluani suliffeqarfik pissutsinik iluarsisimangippat, siunnersuummi § 5, imm. 2 malillugu akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Siunnersuummi § 10, imm. 1 malillugu suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorsimanini suliffeqarfiup sapinngisami piaarnerpaamik allanngortissavaa, takuuk kapitali 4, taamaalilluni tamatuma kingorna suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaarluni.

Imm. 2-mut

Siunnersuummi §§ 6-8-imi piumasaqaatinik suliffeqarfik naammassinninngippat, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanut akuersissuteqarnerup utertinneqarnissaa pillugu, aalajangersagaq malillugu Atuisartoqarnermut Unammilleqatigiinnermullu Aqutsisoqarfik aalajangiissaaq.

Akuersissuteqarsimanerup utertitsinneqarnissaa pillugu Atuisartoqarnermut Unammilleqatigiinnermullu Aqutsisoqarfiup aalajangiinissaa sioqqullugu, suliffeqarfik tamatuminnga qinnuiginnippat, aamma iluarsineq piffissaliussap naammaginartup iluani suliffeqarfimmit iluarsineqarsinnaanersoq Atuisartoqarnermut Unammilleqatigiinnermullu Aqutsisoqarfik naliliippat, siunnersuummi §§ 6-8-imi piumasaqaatinik naammassinninnginneq iluarsitinniarlugit suliffeqarfimmut nalunaarsorsimasumut piffissaliussamik naammaginartumik Atuisartoqarnermut Unammilleqatigiinnermullu Aqutsisoqarfik aalajangersaassaaq. Akuersissuteqarnerup utertinneqarneranik kinguneqarsinnaasunik pissutsinik iluarsiinissamat suliffeqarfik innuttaasunik ikiortarialinnik suliffissaqartitsisutut nalunaarsorsimasoq piffissamik naammaginartumik qulakkeerunneqarnissaanut siunnersuut taamaalilluni tapertaavoq. Piffissaliussatut aalajangersarneqartup iluani §§ 6-8-imi piumasaqaatinik naammassinninnissamik amigaataasunik suliffeqarfik iluarsiinngippat, akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq.

Pisoqarsinnaavoq, siunnersuummi §§ 6-8-imi piumasaqaammik ataatsimik arlalinnilluunniit

naammassinnginneq annertuumik pingaaruteqarluni imaluunniit annertuujulluni, suliffeqarfik taamatut piffissalernerqarnissamik qinnuiginnissimagaluartoq, pissutsit iluarsineqarnissaannut suliffeqarfimmut piffissaliussamik aalajangersaanissaq tulluanngitsoq Atuisartoqarnermut Unammilleqatigiinnermullu Aqutsisoqarfik naliliisinnaalluni.

Aamma imaassinnaavoq utertitsinissaq pillugu aalajangiinissaq sioqqullugu Atuisartoqarnermut Unammilleqatigiinnermullu Aqutsisoqarfik siunnersuummi § 20, imm. 1 malillugu pissutsinik iluarseeqqullugu peqqussummik suliffeqarfimmut nalunaaruteqarsimasoq, peqqussummilu pissutsit iluarsineqarnissaannut suliffeqarfimmut piffissaq naammaginartoq aalajangersarneqarsimalluni. Tamatuma saniatigut aamma imaassinnaavoq utertitsinissaq pillugu aalajangiinissaq sioqqullugu Atuisartoqarnermut Unammilleqatigiinnermullu Aqutsisoqarfik siunnersuummi § 10, imm. 2 malillugu siunnersuummi §§ 6-8-imi piumasaqaatinik naammassinnginnerup iluarsineqarnissaanut suliffeqarfimmut nalunaarsugaasimasumut piffissamik naammaginartumik suliffeqarfik nalunaarfigineqarsimasoq. Pisuni taamaattuni akuersinerup utertinneqarnissaa pillugu aalajangiinnermut atatillugu nutaamik iluarsiinissamut piffissaliussamik aalajangersaanissaq taamaaqataanik tulluassanngilaq.

Iluarsiinissamut piffissamut killiliussamik aalajangersaasoqassasoq suliffeqarfik qinnuiginnippat, pisuni ataasiakkaani pissutsinik attuumassuteqartunik tamaginnik, ilanngullugit pissutsip imaluunniit pissutsit annertussusaat qanoq ittuunerallu ilaalu ilanngullugit, aamma pisortat ingerlatsineranni maleruagassat nalinginnaasut tunngaviusullu, ilanngullugit kinaassusersiunnginnissaq, annertoqqatigiimmik pinninnissaq naligiimmillu suliarinninnissaq pillugit tunngaviusooq, iluarsiinissamut piffissamut killissaliussamik Atuisartoqarnermut Unammilleqatigiinnermullu Aqutsisoqarfik aalajangersaassanersoq, aamma piffissamut killilissaq taamaattoq qanoq sivisutigissanersoq, ataasiakkaatigut naliliinerup kingorna aalajangerneqassaaq.

Tamanna pillugu suliffeqarfik qinnuiginnippat, iluarsiinissamut piffissamut killissaliussamik Atuisartoqarnermut Unammilleqatigiinnermullu Aqutsisoqarfik aallaaviatigut aalajangersaasariaqarpoq. Piffissamut killissaliussaq aallaaviatigut ullut 14-it missaaniittariaqarpoq. Tassani aallaaveqarnej ilitsersuissutaasoq pineqarpoq. Iluarsiinissamut imaluunniit assersuutigalugu ulluni 30-imi iluarsiinissamut piffissaliinermik aalajangersaasoqarnissaa pillugu periarfissiisoqarnani akuersissuteqarnerup utertinneqarnissaa pillugu pisuni ataasiakkaani Atuisartoqarnermut Unammilleqatigiinnermullu Aqutsisoqarfik taamaalilluni aalajangiisinnaavoq.

Siunnersuutip allaffissornikkut aquneqarneranut atuutitsinermullu ilaatillugu siunnersuummi §§ 6-8-imi piumasaqaammik ataatsimik arlalinnilluunniit naammassinnginneq aamma Atuisartoqarnermut Unammilleqatigiinnermullu Aqutsisoqarfiup ilisimalersinnaavaa,

ilanngullugu suliffeqarfiit nalunaarsorsimasut innuttaasunik ikiortarialinnik suliffissaqartitsisutut nalunaarsorsimanissamut piumasaqaatinik eqqortitsinersut pillugu nakkutilliinermi misissugassanik tigussilluni misissuinermik suliaqarnermi.

Siunnersuut malillugu akuersissuteqarnerup utertitsinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiippat, tamatuma kingorna suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorsimasinnaanngilaq imaluunniit suliffeqarfittut innuttaasunik ikiortarialinnik suliffissaqartitsisutut taaguut atimini nittarsaassinermi atorsinnaanagu, takuuk siunnersuummi § 9 aamma § 11. Taamaattoq suliffeqarfik siunnersuummi § 1, imm. 1 malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut nutaamik akuerineqarnissamik Atuisartoqarnermut Unammilleqatigiinnermullu Aqutsisoqarfimmu qinnuteqarsinnaavoq.

Suliffeqarfiup siunnersuummi § 5, imm. 2 malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanut akuersissuteqarnek utertinneqassasoq Atuisartoqarnermut Unammilleqatigiinnermullu Aqutsisoqarfik aalajangiisimappat, utertitsinissaq pillugu aalajangiinerup nalunaarutigineqarnerata suliffeqarfimmu anngunnerata kingorna sapinngisamik piaartumik, suliffeqarfimmi qitiusumik aqutsinermi oqartussat nammineerlutik suliffeqarfik nalunaarsorsimajunnaasissavaat. Aalajangiisuusaaq piffissaq nalunaarutip suliffeqarfimmu annguffia, ilanngullugu allakkerisarfikkoortumik allakkatigut imaluunniit e-mail-ikkut allakkat isertarfiatigut imaluunniit allatut elektroniskimik nalunaaruteqartarfimmi suliffeqarfiup tigussisarfia.

#### *§ 6-imut*

##### *Imm. 1-imut*

Suliffeqarfiit suut siunnersuut malillugit suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaanersut, siunnersuummi § 6, imm. 2-imut peqatigitillugu aalajangersakkami ilaatigut allanneqarpoq.

Aalajangersagaq malillugu suliffeqarfik sunaluunnit Kalaallit Nunaanni suliffeqarfinnut nalunaarsuiffimmi nalunaarsorsimalluni nammineq normoqartoq (CVR-normu), aamma Kalaallit Nunaanni najugaqartoq, siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaavoq. Siunnersuummi § 6, imm. 2-imi aalajangersagaq malillugu suliffeqarfiit inummit ataatsimit pigineqartut aamma suliffeqarfiit piginneqatigiinnikkut pilersinneqarsimasut siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaanngillat.

Siunnersuummi taamaalilluni suliffeqarfittut innuttaasunik ikiortarialinnik suliffissaqartitsisutut nalunaarsorsimasut immikkut suliffeqarfittut iluseqarnissaannik piunasaqaateqanngilaq. Suliffeqarfik innuttaasunik ikiortarialinnik suliffissaqartitsisutut nalunaarsorsimasoq assersuutigalugu tassaasinnaavoq aktiaatileqatigiiffik (A/S), piginneqatigiilluni ingerlatseqatigiiffik (ApS), soqutigisaqaqatigiiffik (I/S), peqatigiiffik, aningaasaateqarfik imaluunniit sullissivik alla imminut pigisoq.

Namminerisamik CVR-normoqarnissamik piunasaqaateqarnerup malitsigisaannik suliffeqarfiup aaqqissuussaananerani anginerusumi tunisassiorneq imaluunniit immikkoortortaq namminerisamik P-normulik suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaanngilaq. Taamaattoq suliffeqarfiit namminerisamik suliffissuaqarfimmi CVR-normoqartut suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaapput.

Suliffeqarfik innuttaasunik ikiortarialinnik suliffissaqartitsisutut nalunaarsorsimasoq Kalaallit Nunaanni nunaqavissuussasoq, aalajangersakkami allanneqarpoq. Nunaqavisoq nalinginnaasumik paasineqassaaq, suliffeqarfik Kalaallit Nunaanni najugaqartutut nalunaarsorsimasoq.

Tamatuma saniatigut siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut siunnersuummi §§ 6-8-imi piunasaqaatit tamarmik naammassineqarsimassapput. Aalajangersagaq taamaalilluni aamma siunnersuummi § 9-imut peqatigitillugu nassuiarneqarlunilu atorneqassaaq. Suliffeqarfik siunnersuummi §§ 6-8-imi piunasaqaatinik naammassinnippat suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaavoq. Siunnersuummi erseqqissumik allamik allassimasoqanngippat, piffissami nalunaarsorsimaffiusumi piunasaqaatit tamarmi naammassineqarsimassapput.

Imm. 2-mut

Suliffeqarfiit ilusaat ataasiakkaat siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimasuusinnaanngitsut, aalajangersakkami allanneqarput.

Siunnersuut malillugu suliffeqarfiit inummit ataatsimit pigineqartut aamma suliffeqarfiit piginneqatigiinnikkut pilersinneqarsimasut siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimasinnaanngillat.

Suliffeqarfik piginneqatigiinnikkut pilersinneqarsimasoq nalinginnaasumik paasineqassaaq tassaasoq suliffeqarfik, inuk ataaseq arlallilluunnit peqatigiillutik suliffeqarfimmi pigisanik nalilinnik ataasiakkaanik pigisaqartuullutik.

Inuit marluk peqatigiillutik suliffeqarfimmik piginnittuullutik soqutigisaqaqatigiit ingerlatseqatigiiffii (I/S), siunnersuummi § 6, imm, 2-mi pineqartunut ilaangillat. Soqutigisaqaqatigiit ingerlatseqatigiiffiat taamaalilluni siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimasinnaavoq.

Suliffeqarfiit inummit ataatsimit pigineqartut aamma suliffeqarfiit piginneqatigiinnikkut pilersinneqarsimasut suliffeqarfiit ilusaanni kisiartaallutik siunnersuut malillugu nalunaarsorsimasinnaangillat. Tamatumunnga pissutaavoq suliffeqarfiit ilusaanni taamatut ittuni nalinginnaasumik piginnittup pisuussutaasa aamma suliffeqarfiup pisuussutaasa akornanni nalinginnaasumik immikkoortitsisoqarsinnaanginnera.

### *§ 7-imut*

#### *Imm. 1-imut*

Suliffeqarfiup siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanut piomasagaatit arlallit aalajangersakkami allanneqarput.

Aalajangersagaq siunnersuummi §§ 6-imut aamma 8-9-imut peqatigitillugu nassuiarneqarlunilu atorneqassaaq. Suliffeqarfik siunnersuummi §§ 6-8-imi piomasagaatinik naammassinnippat, suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaavoq nalunaarsorsimasinnaallunilu. Siunnersuummi ersarissumik allamik allassimasoqanngippat, piffissami nalunaarsorsimaffiusumi tamarmi piomasagaatit naammassineqarsimassapput.

#### *Nr. 1-imut*

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut piomasagaat tassaavoq, suliffeqarfik innuttaasunik ikiuiniarnermik siunertaqassasoq, takuuk siunnersuummi § 7, imm. 1, nr. 1. Innuttaasunik ikiuiniarnermik siunertaqarnissaq pillugu piomasagaat nalinginnaasumik nassuiarneqassaaq atituumillu atorneqassalluni. Suliffeqarfik taamaalilluni innuttaasunik ikiuiniarnermik, suliffissaqartitsiniarnermik, peqqissutsikkut, avatangiisitigut imaluunniit kulturikkut siunnerfeqartumik inuiaqatigiinnut iluaqutaasumik pingaarnertut siunertaqassaaq imaluunniit pingaarnertut siunertaqassalluni.

Danmarkimi nunanilu allani suliffeqarfiit innuttaasunik ikiortarialinnik suliffissaqartitsisut siunnerfigineqartunut aalajangersimasunut imaluunniit suliamut aalajangersimasumut suliaqartut aamma suliffeqarfiit innuttaasunik ikiortarialinnik suliffissaqartitsisut siunnerfigineqartunik aalajangersimasunik suliaqartut, nalinginnaasumik

immikkoortinneqartarput. Tassa imaappoq suliffeqarfiit innuttaasunik ikiortarialinnik suliffissaqartitsisut siunnerfigineqartut aalajangersimasut atugaannik imaluunniit suliame aalajangersimasumi pitsanngorsaannissamik suliaqartut aamma suliffeqarfiit innuttaasunik ikiortarialinnik suliffissaqartitsisut, assersuutigalugu suliffeqarnermi suliffissaqarnissamut periarfissaqarnerulersitsillutik siunnerfigineqartunik aalajangersimasunik suliaqartut, nalinginnaasumik immikkoortinneqartarput. Taamaattoq suliffeqarfiit innuttaasunik ikiortarialinnik suliffissaqartitsisut taakku immikkoortut marluk akornanni killiliussassaq aalajangersimasuunngilaq.

Suliffeqarfik innuttaasunik ikiortarialinnik suliffissaqartitsisoq siunnerfigineqartunut aalajangersimasunut imaluunniit suliame aalajangersimasumut suliaqarpat, immikkut siunnerfigineqartunut pissutsinik inuunerissaarnissamullu pitsaanerulersitsiniarluni imaluunniit suliaq immikkut inuiaqatigiinnut iluaqutaasussaq siuarsarniarlugu suliffeqarfik nalinginnaasumik siunertaqassaaq. Tamanna assersuutigalugu suliffeqarfiup ingerlataasigut, nioqutaasigut, kiffartuussineratigut imaluunniit akileraaruteqareernermini sinneqartoorutit innuttaasunik ikiuiniarnermik siunertanut atorneqarnerisigut pisinnaavoq. Assersuutigalugu suliffeqarfik innuttaasunik ikiortarialinnik suliffissaqartitsisoq qaammarsaanermik ingerlataqarsinnaavoq, ikiuutunik tunisassiorluni, inuit atugarliortut pillugit tapersersuiniarluni aaqqissuussinernik aaqqissuussinnaavoq imaluunniit suliffeqarfiup akileraarutit akilereerlugit sinneqartoorutai innuttaasunik ikiuiniarnermik immikkut siunertat tapersersorniarlugit tunniussinnaallugit.

Suliffeqarfik innuttaasunik ikiortarialinnik suliffissaqartitsisoq siunnerfigineqartunik suliaqarpat, suliffeqarfik amerlanertigut suliffissaqartitsiniarnikkut siunertaqarsimassaaq. Suliffeqarfiup taamaalilluni suliffissaqartitsinikkut sulinermi inuit atugarliortut toqqaannartumik akuutittarpai, ilanngullugu immikkut piginnaannngorsaannermik ingerlataqarneq. Taamatut aallaaveqarneq taaneqartoq aamma "Work Integration Social Enterprise"-mik imaluunniit "WISE"-imik taaneqartarpoq aammalu suliffeqarfinnut innuttaasunik ikiortarialinnik suliffissaqartitsisunut, piginnaannngorsaannikkut, sulilersitsinikkut suliffissaqartitsinikkullu inuit atugarliortut suliffeqarfinni akuutinnerisigut suliffeqarfimmu inissaqartitsisumut iluaqusiiniartuullutik.

Siunnersuummi suliffeqarfiit innuttaasunik ikiortarialinnik suliffissaqartitsisut taakku assigiinngitsut taaneqartut marluk pineqartunut ilaapput.

Siunnersuummi § 7, imm. 1, nr. 1 malillugu innuttaasunik ikiuiniarnermik siunertaqarneq taamaalilluni assersuutigalugu siunertat makku arlarisinnaavaat:

1) Innuttaasunik ikiuiniarnermik siunertaqarneq, ilanngullugu assersuutigalugu inunnut atonerluinermik ajornartorsiuteqartunut imaluunniit meeqqanut atugarliortunut



tapersersuineq, akuutitsineq, pinerluttuliornaveersaartitsineq aamma nunani tamalaani ineriartortitsineq.

2) Peqqissutsikkut siunertat, ilanngullugu assersuutigalugu inunnut timikkut tarnikkulluunniit anniaateqartunik paaqqutarinninneq tapersersuinerlu, napparsimasut kattuffii aamma tamanut peqqissuseq pillugu qaammarsaaneq.

3) Avatangiisitigut siunertat, ilanngullugu assersuutigalugu pinngortitaq, avatangiisit silallu pissusaa pillugu isiginninniarnaq qaammarsaanerlu, ilanngullugu pinngortitami pissuseqatigiinneq atoqqiisarnerlu.

4) Kulturikkut siunertat, ilanngullugit assersuutigalugu eqqumiitsulianik kulturimillu aamma nunat inoqqaavisa pisinnaatitaaffiunik ilisimasaqarnermik tapersersuineq.

5) Suliffissaqartitsiniarnikkut siunertat, ilanngullugit assersuutigalugu inunnik atugarliortunik piginnaangorsaaneq, ilinniartitaanikkut suliniutit, atorfimmi sungiusarnerq, atorfinnik pilersitsineq suliffissaqartitsinerlu.

Assersuutit taaneqartut siunnersuummi pineqartunut ilaasunut innuttaasunik ikiuiniarnermik siunertanut taamaallaat assersuutaapput. Taagorneqartut tamakkiisuunngillat. Siunertat siunertanit taaneqartunit allaaneruset allat taamaalillutik aamma siunnersuummi pineqartunut ilaallutik innuttaasunik ikiuiniarnermik siunertaqarsinnaapput.

Nr. 2-mut

Siunnersuut malillugu suliffeqarfittut innuttaasunik ikiortarialinnik suliffissaqartitsisut nalunaarsorneqarnissamat piomasagaat alla tassaavoq, suliffeqarfik inuussutissarsiummik ingerlataqartuussasoq, takuuk siunnersuummi § 7, imm. 1, nr. 2. Tamanna nalinginnaasumik isumaqarpoq, nioqqtissanik imaluunniit kiffartuussinernik tunisineq suliffeqarfiup ingerlataannut annertuumik ilaatinneqassasoq. Nioqqtissanik kiffartuussinernillu tunisineq inuinnarnut, inuussutissarsiornermik ingerlataqartunut imaluunniit pisortani oqartussanut taakkuluunniit ataqatigiissinerinut, pisinnaavoq.

Suliffeqarfiit innuttaasunik ikiortarialinnik suliffissaqartitsisut assigiinngitsorujussuarnik isertitassanut tunngaveqarsinnaapput. Inuussutissarsiummik ingerlatsinermiit isertitat saniatigut isertitaqarfinit allarpassuarniit ingerlatsinermi aningaasaatinik suliffeqarfiit pissarsisinnaapput, ilanngullugu assersuutigalugu tunissutinit, namminersortut imaluunniit pisortat aningaasaateqarfiinit, pisortat ikiorsiinermik aaqquissuussinerinit aamma aningaasanoorutinit immikkoortitani aningaasat ilaalu ilanngullugit.

Suliffeqarfiup inuussutissarsiummik ingerlataqartuunissaa pillugu piomasagaat taamaalilluni paasineqassanngilaq, suliffeqarfiup isertitaasa annersaat nioqqtissanik kiffartuussinermilluunniit tunisinermiit pissasut. Inuussutissarsiummilli ingerlataqarneq suliffeqarfiup ingerlataani kaaviiartitaanillu annertuujussalluni. Suliffeqarfik taamaalilluni pisortanit namminersortunillu tapiissutinik tunissutinillu suli tigusaqartarsinnaavoq,

suliffeqarfik isertitaqarfiit taaneqartut saniatigut nioqqutissanik imaluunniit kiffartuussinernik tunisaqarpat, taakkua suliffeqarfiup ataatsimut kaaviiartitaanit annikitsuussanatik.

Suliffeqarfik nioqqutissaminik imaluunniit kiffartuussinernik sullitamut ataatsimut arlalinnulluunniit tunisisinnaanersoq tunisisarnersorlu, ilanngullugu suliffeqarfiup sullitatuua pisortanit oqartussaaneernersoq, suliffeqarfiup inuussutissarsiornermik ingerlataqartuuneranik naliliiniarnermut pingaaruteqanngilaq.

Nr. 3-mut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimanissamut piumasaqaatit pingajuat tassaavoq, suliffeqarfik pisortanut attuumassuteqassanngitsoq, takuuk siunnersuummi § 7, imm. 1, nr. 3. Tassa imaappoq suliffeqarfiup aqunneqarneranut ingerlanneqarneranullu pisortat annertuumik sunniuteqartinneqaratik, suliffeqarfik ingerlanneqassasoq.

Siunnersuut malillugu pisortat nalinginnaasumik paasineqassapput tassaasut Naalakkersuisut, naalakkersuisoqarfiit, aqutsisoqarfiit aamma Naalakkersuisuni immikkoortut allat, kommunit aamma suliffeqarfiit peqataasunit taaneqartunit ataatsimit arlalinnilluunniit pigineqartut akisussaaffigineqartullu.

Suliffeqarfiup aqutsisui ingerlatsineraluunniit pisortanit annertuumik sunniuteqarfigineqartussaaneersoq, imaluunniit suliffeqarfik pisortanut attuumassuteqannginnersoq, pillugu pisuni ataasiakkaani attuumassuteqartunut tunngasunik tamaginnik ataasiakkaatigut naliliineq tunngavigalugu tamanna aalajangiiffigineqassaaq. Ilaatigut pisortat nakkutilliinerat imaluunniit nakkutilliineq aamma pisortani oqartussaniit aningaasaqarnikkut nakkutigineqarneq pissutigalugu Kalaallit Nunaanni aningaasaateqarfiit pillugit inatsimmi pineqartunut ilaanginneq, siunnersuut malillugu pisortat annertuumik sunniuteqarnerat namminerme naammangilaq. Suliffeqarfiup pisortanut pilersuisuunera taamaallaat pissutigalugu, siunnersuut malillugu pisortat annertuumik aamma sunniuteqanngillat. Tamanna aamma atuuppoq, suliffeqarfiup nioqqutissani tamaasa imaluunniit kiffartuussinini pisortani oqartussanut atatsimut arlalinnulluunniit tunisaralarpagit.

Kisiannili suliffeqarfiup annertunersaa pisortanit pigineqarpat, imaluunniit suliffeqarfiup aqutsisuisa amerlanersaat pisortanit toqqarneqarsimappata, pisortat annertuumik sunniuteqarsimassapput. Annertunersaa paasineqassaaq 50 procentinit annertunersoq.

Aamma aktiatigut pigineqataaffiusullu ingerlatseqatigiiffiit pillugit inatsisip Kalaallit Nunaanni atortuulersinnera pillugu peqqussummi (ingerlatseqatigiiffinnut inatsit) § 7-imi nassuiarneqartutut, pisortat suliffeqarfimmi aalajangiisumik oqartussaappata pisortat

annertuumik sunniuteqarsimassapput. Ingerlatseqatigiiffiit pillugit inatsimmi § 7 malillugu suliffeqarfimmi taasisinnaatitaasut affai sinnerlugit (50 procent) suliffeqarfimmi pigisami pisortat toqqaannartumik imaluunniit toqqaannangitsumik pigisaqarpata, aalajangiisumik sunniuteqarneq aallaaviatigut pisarpoq.

Tamatuma saniatigut ingerlatseqatigiiffiit pillugit inatsimmi § 7 malillugu pisuni ukunani aalajangiisumik sunniuteqartoqassaaq:

- 1) Aningaasaliisunik allanik isumaqatigiissuteqarneq pissutigalugu taasisinnaatitaasut affai sinnerlugit (50 procent) pisortat aalajangiisinnaatitaappata.
- 2) Malittarisassat imaluunniit isumaqatigiissut naapertorlugu suliffeqarfimmi aningaasatigut ingerlatsinikkullu pissutsinik aqutsinissamut pisortat pisinnaatitaappata.
- 3) Qitiusumik aqutsinermi oqartussani ilaasortat amerlanersaannik toqqaanissamut imaluunniit soraarsitsinissamut pisortat pisinnaatitaappata, oqartussallu taakku suliffeqarfimmi aalajangiisuullutik oqartussaallutik.
- 4) Ataatsimeersuarnermi imaluunniit taamaaqataanik oqartussani taasinerit amerlanersaannut pisortat oqartussaappata taamaalillutillu suliffeqarfik pillugu aalajangiisumik sunniuteqarlutik.

Suliffeqarfimmi innuttaasunik ikiortarialinnik suliffissaqartitsisumi aqutsineq ingerlatsinerlu annertunngitsumik pisortanit sunniuteqarfineqarluni ingerlanneqarnersoq taamaalilluni pisortanut attuumassuteqannginnersoq, pisuni ataasiakkaani pissutsinik attuumassuteqartunik tamaginnik aalajangersimasumik naliliisoqarneratigut aalajangiiffineqartariaqarpoq.

Nr. 4-mut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut piumasagaatit sisamaat tassaavoq, suliffeqarfik sulinermini akuutitsisuussasoq akisussaaffeqassasorlu, takuuk siunnersuummi § 7, imm. 1, nr. 4.

Sulinermini akuutitsisuussasoq akisussaaffeqassasorlu, siunnersuut malillugu nalinginnaasumik paasineqassaaq, suliffeqarfimmi sulisunik, sullitanik, suleqatigisartakkanik soqutigisaqartunillu suliffeqarfiup aqutsisui ilanngutsitsiniartartut aammalu tassunga imaluunniit suliffeqarfiup niuernerme periusissiaanut niuernermilu ingerlataannut tunngatillugu innuttaasunik ikiuiniarnermik siunertaqarnermut naleqqiullugu akisussaassuseqarnermik takutitsilluni. Qitiusumik aqutsinermi oqartussat, suliffeqarfiup pingaarnertigut periusissiatigullu aqutsinermik isumaginnittussaapput aamma suliffeqarfiup isumannaatsumik aqqissugaanissaanik qulakkeerissallutik.

Suliffeqarfinni ataatsimik pisorta qarfilinni aamma siulersuisulinni, qitiusumik aqutsinermi oqartussaapput siulersuisut. Suliffeqarfinni ataatsimik pisorta qarfilinni, qitiusumik

aqutsinermi oqartussaavoq suliffeqarfiup pisorta qarfia. Suliffeqarfinni pisorta qarfeqartuni nakkutilliisutullu siunnersuisoqatigeeqartuni, qitiusumik aqutsinermi oqartussaavoq suliffeqarfiup pisorta qarfia.

Suliffeqarfik sulinermini akuutitsisuunersoq akisussaasuunersorlu pisuni ataasiakkaani pissutsinik attuumassuteqartunik tamanik aalajangersimasumik naliliisoqarneratigut tamanna aalajangiiffigineqartariaqarpoq. Nalilersuinermini ilaatigut, suliffeqarfiup malittarisassai imaluunniit pilersitsinermut uppenarsaat, suliffiup ilunani najoqqutassiat, anguniakkat, periusissiat allallu uppenarsaatit suliffeqarfiup qanoq sulineranik nassuiaavusut, pingaartinneqarsinnaapput.

Suliffeqarfiup sulinermini akuutitsineranut akisussaananerullu uppenarsaaneq siunnersuummi § 13, imm. 3, nr. 4 malillugu ukiumut nalunaarusiamik nassiusinermut atatillugu ukiukkaartumik nalunaarutigineqartassaaq.

Nr. 5-imut

Siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimanissamut piumasaqaatit tallimaat tassaavoq, suliffeqarfik akileraaruteqareernermini sinneqartoorutiminit innuttaasunik ikiortarialinnik iliuuseqarfiginninnermik suliaqassasoq, takuuk siunnersuummi § 7, imm. 1, nr. 5. Suliffeqarfiup taamaalilluni siunnersuummi § 7, imm. 1, nr. 5, litra a-d-imut naapertuuttumik akileraaruteqareernermini angusaminik atuissaaq. Tassunga ilaapput nammineq suliffeqarfigisami aningaasaleeqqinneq, suliffeqarfinnut innuttaasunik ikiortarialinnik suliffissaqartitsisunut allanut aningaasaliinerit imaluunniit tunissuteqarnerit, nalinginnarmik iluaqutaasumik imaluunniit nalinginnarmik ajunngitsuliornermik siunertaqartumut suliniaqatigiiffinnut tunisinerit aamma suliffeqarfimmik piginnittunut killeqartumik annertussuseqartunik iluanaarutininik tunniussineq imaluunniit allatigut piginnittut akornanni sinneqartoorutininik avitseqatigiinneq.

Illuartitat taamaalillutik nammineq suliffeqarfimmi aningaasaleeqqinnermut atorneqarsinnaapput, takuuk siunnersuummi § 7, imm. 1, nr. 5, litra a, imaluunniit siunnersuummi § 7, imm. 1, nr. 5, litra b-d-imut ilaasunut siunertamut ataatsimut arlalinnulluunniit. Taaguineq tamakkiisuunngilaq. Taamaattumik suliffeqarfik siunertanut allanut, siunertanik siunnersuummi § 7, imm. 1, nr. 5, litra a-d-mi allanneqartunit allaanerusunut, akileraaruteqareernermini sinneqartoorutininik atueqqussaannngilaq.

Suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsorsimanerata akuerineqarnera pillugu suliffeqarfik nalunaarfigineqarsimappat, suliffeqarfik iluanaarutininik akiliinera allatigulluunniit piginnittut akornanni sinneqartoorutininik avitseqatigiinnerit tamaasa suliffeqarfik Atuisartoqarnermut Unammilleqatigiinnermullu

Aqutsisoqarfimmut nalunaaruteqartassaaq, takuuk siunnersuummi § 13, imm. 4.

Siunnersuummi § 10 malillugu suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsugaajunnaarnerani, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorsimanerata nalaani suliffeqarfiup isertitarisimasaanik sinneqartoorutit ilaannik siunnersuummi § 7, imm. 1, nr. 5 malillugu suliffeqarfik innuttaasunik ikiuiniarnikkut isumaginninnissamut pisussaaffeqarpoq, takuuk siunnersuummi § 16, imm. 4.

Siunnersuummi § 7, imm. 1, nr. 5, litra b malillugu suliffeqarfimmut innuttaasunik ikiortarialinnik suliffissaqartitsisunut allanut aningaasaliinerit taamaallaat siunnersuut malillugu suliffeqarfimmut innuttaasunik ikiortarialinnik suliffissaqartitsisunut allanut pisinnaavoq. Suliffeqarfik aningaasaliiffigineqartoq siunnersuummi § 4, imm. 1 malillugu akuerineqarsimassaaq, aamma kingusinnerpaamik aningaasaliinerup peqatigisaanik siunnersuummi kapitali 4 malillugu immikkut nalunaarsuiffimmi nalunaarsorsimassalluni.

§ 7, imm. 1, nr. 5, litra c-mi aalajangersakkap kingunerisaanik suliffeqarfittut innuttaasunik ikiortarialinnik suliffissaqartitsisutut nalunaarsorsimasooq inuiaqatigiinnut iluaqutaasunik siunertanik suliaqartunut suliniaqatigiiffimmut allanut aningaasanik taamaallaat tunniussisinnaavoq. Suliniaqatigiiffimmut taaguummi, siunnersuut malillugu pineqartunut ilaapput peqatigiiffiit nalinginnaasut, aningaasaateqarfiit, sullissiviit imminut pigisut allat pilersitsiffiusimasullu ilaalu ilanngullugit, inatsisitigut pisinnaatitaallutik pisussaaffeqarlutillu namminersortinneqartut. Aamma takukkit qulaani siunnersuummi § 6 imm. 1-imut nassuiaatit.

Siunertaq nalinginnarmik ajunngitsuliortutut imaluunniit nalinginnarmik iluaqutaasutut isigineqarsinnaanersoq, pisuni ataasiakkaani pissutsinik attuumassuteqartunik tamaginnik ataasiakkaatigut naliliinikkut aalajangiiffigineqartariaqarpoq.

Suliffeqarfittut innuttaasunik ikiortarialinnik suliffissaqartitsisutut nalunaarsugaasimasup siunertaa, siunnersuummi § 7, imm. 1, nr. 1-imi killissaliussat iluanniittut aamma suliniaqatigiiffinni suliffeqarfiup innuttaasunik ikiortarialinnik suliffissaqartitsisup siunnersuut malillugu sinneqartoorutiminik tunisiffissaata siunertaata akornanni nalinginnaasumik immikkoortitsisoqassaaq. Nalinginnarmik ajunngitsuliornermik siunertaqarnermut aamma nalinginnarmik iluaqutaasussamik siunertaqarnermut taaguutit, siunnersuummi § 7, imm. 1, nr. 1 malillugu innuttaasunik ikiuiniarnermik siunertamit nalinginnaasumik annertunerutillugit, siunnersuummi § 7, imm. 1, nr. 5 malillugu nassuiarneqassapput. Taamaattumik siunnersuummi § 7, imm. 1, nr. 5, litra c-mi innuttaasunik ikiuiniarnermik siunertaqartunit allaanerusunik suliniaqatigiiffiit amerlanerusut aamma pineqartunut ilaapput aamma siunnersuummi § 7, imm. 1, nr. 1 malillugu

suliffeqarfittut innuttaasunik ikiortarialinnik suliffissaqartitsisutut nalunaarsugaasimassallutik.

Siunertaq nalinginnarmik ajunngitsuliornertut isigineqarsinnaassappat, siunnersuut malillugu nalinginnaasumik tunngavigineqassaaq, siunertaq inuit aningaasaqarnikkut pisariaqartitsisut imaluunniit aningaasaqarnikkut ajornartorsiuteqartut amerlanerusut atugaannik pitsaanerulersitsiniarnermut tunngasuusoq. Siunertaq nalinginnaasumik inuiaqatigiit isumaat malillugu iluaqutaasutut isigineqarsinnaappat, siunnersuut malillugu nalinginnarmik iluaqutaasussatut isigineqassaaq. Nalinginnarmik iluaqutaasussatut siunertaq assersuutigalugu tassaavoq innuttaasunik ikiuiniarnermik siunertaq, eqqumiitsuliornermik allatigullu kulturikkut siunertaq, avatangiisitigut siunertaq, ilisimatuussutsikkut siunertaq, ilanngullugu ilisimatusarnermi imaluunniit nappaatinik akiuiniarnermik siunertaq, inunnik ikiuiniarnermik siunertaq, atuartitsineramik siunertaq, upperisarsiornikkut siunertaq imaluunniit inuiaqatigiinni siunertaq. Timersoqatigiiffiit uumasunillu illersuinaqatigiiffiit nalinginnaasumik aamma nalinginnarmik iluaqutaasussanik siunertaqartutut isigineqarsinnaapput.

Kisiannili suliniaqatigiiffiit, politikikkut, aningaasarsiornikkut inuussutissarsiornikkulluunniit soqutigisanik isumaginnittut, siunnersuut malillugu nalinginnarmik iluaqutaasussaasutut isigineqarsinnaangillat.

Suliniaqatigiiffiup ingerlatai inunnut arlalissuarnut imaluunniit suliffeqarfinnut arlaatigut iluaqutaasussaasut, suliniaqatigiiffimmi aningaasanik tunniussiffiusumi siunertaq nalinginnarmik ajunngitsuliornertut allatigulluunniit nalinginnarmik iluaqutaasussatut isigineqarsinnaassappat, piumasarineqarpoq. Inuit amerlanerusut siunnersuut malillugu paasineqassaaq, aningaasanik tunniussineq najukkami sumiiffiup iluani inuinnarnut allatigulluunniit sumiiffimmut annertuumik killeqartumut tunngasuunngitsut, kisiannili suliffeqarfinnut inunnulluunniit amerlanerujussuarnut iluaqutaalluni, ilanngullugu assersuutigalugu Kalaallit Nunaat tamaat imaluunniit Kalaallit Nunaata annertunersaa. Nalilersuinermi ilaatigut sumiiffimmi pineqartumi innuttaasut amerlassusaat ilanngunneqassaaq, ilanngullugu assersuutigalugu illoqarfimmi nunaqarfimmiluunniit.

Suliniaqatigiiffik malittarisassai malillugit assersuutigalugu suliffeqarfimmut aalajangersimasumut attuumassuteqartunut inunnut aningaasanik taamaallaat agguaassisinnaasoq imaluunniit ingerlataqarsinnaasoq, inunnut amerlanerusunut aningaasanik agguaassisannigilaq imaluunniit ingerlatanik isumagisaqarani. Kisiannili suliniaqatigiiffiup inuk ataaseq suliffeqarfilluunniit ataaseq taamaallaat isumagisussaagaluaraa, inuk imaluunniit sullissivik pineqartoq inuppasuit imaluunniit suliffeqarfippasuit akornanni toqqarneqaannartussaappat, suliniaqatigiiffik assersuutigalugu nalinginnarmik iluaqutaasussanik siunertaqarsimasinnaavoq.

Siunnersuut malillugu aningaasanik tunniussineq aamma nunami sumiiffinni killilersugaasoq tunngavigalugu pisinnaavoq, suliniaqatigiiffik aningaasanik pissarsisussa, piumasaqaatit kinaassusersiunnngitsut malillugit nunami killeqartumi siunertaqarpat naammalluni. Suliffeqarfik innuttaasunik ikiortarialinnik suliffissaqartitsisutut nalunaarsorsimasoq assersuutigalugu illoqarfinni minnerusuni nunaqarfinnilu imaluunniit allami sumiiffimmi killeqartumi inoqarfiuinnarnissaanik tapersiisussatut, aningaasanik tunniussisinnaavoq, ilanngullugu assersuutigalugu najukkami timersoqatigiiffimmut, najukkami katersugaasivimmut assigisaanulluunniit tapiissuteqarnikkut. Tamanna Kalaallit Nunaanni nunaniluunniit allani ingerlanneqarnersoq, siunertaq nalinginnarmik ajunngitsuliornerunersoq allatigulluunniit nalinginnarmik iluaqutaasussaansoq nalilersuinnermut pingaaruteqanngilaq.

Suliffeqarfiup innuttaasunik ikiortarialinnik suliffissaqartitsisutut nalunaarsorsimasup akileraaruteqareernermini angusani siunnersuummi § 7, imm. 1, nr. 5, litra d malillugu suliffeqarfimmi piginnittut akornanni iluanaarutininik tunniussinermut allatigulluunniit sinneqartoorutininik agguaassinermut atorpagit, aningaasanik tunniussineq suliffeqarfimmut innuttaasunik ikiortarialinnik suliffissaqartitsisutut nalunaarsugaasumut allamut pissanngippat, siunnersuummi § 8 malillugu killilersuineq malinneqassaaq.

Taamaalilluni siunnersuut malillugu suliffeqarfiit nalunaarsorsimasut akornanni suliffeqarfissuarnik pilersitsinissamut periarfissanik killiliinissaq, siunnersuummi § 7, imm. 1, nr. 5, litra d-mi aamma § 8-mi siunertarinqanngilaq. Ingerlatseqatigiiffik aningaasaateqartoq, suliffeqarfittut innuttaasunik ikiortarialinnik suliffissaqartitsisutut nalunaarsorsimasoq aamma ingerlatseqatigiiffimmi aningaasaateqartumik allamik siunnersuut malillugu nalunaarsorsimasumik pigisaqartoq, taamaalilluni siunnersuummi § 8-mi killiliineq malittussaannikkaluarlugu assersuutigalugu siullertut taaneqartumit ingerlatseqatigiiffimmit aningaasaateqartumit iluanaarutininik tigusaqarsinnaavoq. Tamanna aamma siunnersuummi § 7, imm. 1, nr. 5, litra b-mik malillugu pisussaavoq. Nalinginnaasumik siunnersuummi § 8 tassungalu nassuiaatit takukkit.

#### *§ 8-mut*

##### *Imm. 1-imut*

Inatsisit suliffeqarfiup pineqartup malitassai sukkuluunniit atuuttut malillugit suliffeqarfimmut sinneqartoorutininik piginnittunut nuussisinnaasunut tamanut aalajangersagaq atuuppoq.

Aalajangersakkami allassimavoq suliffeqarfimmi innuttaasunik ikiortarialinnik suliffissaqartitsisutut nalunaarsorsimasumik piginnittut, aningaasaliissutaqqaartut annertoqataannik aningaasaliissutaqqaartut ukiumut naammaginartumik erniaqartinneranut naapertuuttunik, suliffeqarfimmi piffissami pigisimasaminni ataatsimut ajunngitsorsiasanik taamaallaat tigusinnaatitaasut.

Suliffeqarfiup innuttaasunik ikiortarialinnik suliffissaqartitsisutut nalunaarsorsimasup iluanaarutitik qanoq annertutigisunik suliffeqarfiup piginnittuinut tunniussisinnaaneramik killeqartitsinissaq, aalajangersakkami siunertaavoq. Aalajangersagaq taamaalilluni ilaatigut pingaartumillu siunnersuummi § 7, imm. 1, nr. 5-imut atatillugu nassuiarneqarlunilu atorneqassaaq.

Aalajangersakkami siunertaavoq, suliffeqarfiit iluanaarutitik tunniussisarnikkut aningaasaliisartunik pilerilersitsinissamut suli periarfissaqassasut, kisianni innuttaasunik ikiuiniarnermik siunertaq pilliutigalugu piginnittunut aningaasaliisunullu sapinngisamik annertunerpaamik iluanaaruteqartitsiniarlutik suliffeqarfiit ingerlanneqannginnissaat, killiliinermi qulakkeerneqassalluni.

Siunnersuummi § 8 malillugu agguagarsisitsineq nalinginnaasumik paasineqassaaq, suliffeqarfimmik piginnittut akornanni sinneqartoorutitik qanoq iliornikkulluunniit agguaassisarneq. Ingerlatseqatigiiffinnut aningaasaatilinnut, ilanngullugit aktiaatileqatigiiffiit (A/S) aamma piginneqatigiilluni ingerlatseqatigiiffiit (ApS), pingaartumik tassaassapput agguagarsiassat imaluunniit iluanaarutitik tunniussineq. Taamaattoq aalajangersakkami pineqarput suliffeqarfimmiit suliffeqarfiup piginnittuinut imaluunniit aningaasaliisuinut agguagarsititsinerit imaluunniit aningaasanik tunniussinerit suulluunniit, taaguut sunaluunniit atorneqartoq apeqqutaatinnagu. Tamanna assersuutigalugu taamaalilluni aamma suliffeqarfimmiit piginnittumut ataatsimut arlalinnuunniit taarsigassarsianik tunniussinermit atuuppoq.

Suliffeqarfimmik piginnittoq, piginnittup pineqartup aningaasaliissutigisimasaanut (aallaqqaammut aningaasaliissutigineqarsimasut) piffissami piginnittuuffiusimasumi ukiumut naammaginarumik ernialersuinermit tapeqartillugu annertussuseqartunik suliffeqarfimmiit agguagarsianik imaluunniit iluanaarutinit annertunerpaamik tigusaqarsinnaavoq. Agguagarsinissaq imaluunniit tunniussinerup pinissaa sioqqullugu piffissaq, iluanaarutitik naatsorsuinermit ilaatinneqanngilaq, aammalu piffissaq agguagarsiffiusoq imaluunniit piffissaq aningaasanik tunniussiffiusoq tikillugu piffissaq piginnittuuffiusoq kisimi naatsorsuinermit ilanngunneqassalluni. Agguagarsineq imaluunniit iluanaarutitik tunniussineq taamaalilluni piffissami tassani assingusumik aningaasaliinernut assersuunneqarsinnaavoq.

Ernialersuineq naammaginaruunersoq, pisuni ataasiakkani pissutsinik attuumassuteqartunik tamanik aalajangersimasumik nalilersuineq, tassani apeqqutaassaaq. Nalilersuinermit ilaatigut taamaaqataanik aningaasalersuinermit nalinginnaasumik ernialersuineq, piffissami iluanaarutitik naatsorsuinermit aningaasatigut niuerfinni nalinginnaasumik ineriartorneq aamma suliffeqarfimmi aningaasaliinermut atasut annaasaqarsinnaanerit pingaartinneqassapput. Suliffeqarfiup innuttaasunik ikiuiniarnermit siunertaq pilliutigalugu



aqutsisut iluanaarutininik killiliinermik avaqqussinninnissaat allatigulluunniit imminnut atorfeqartulluunniit allat pisuunnngorsarnissaat qulakkeerniarlugu aalajangersagaq iluaqutaasussaavoq. Siunnersuut malillugu ernialersuineq qaqugu naammaginartuussanersoq, qaffasinnerpaaffissamik siunnersuummi § 8, imm. 2-mi aalajangersaasoqarpoq. Aalajangersagaq taanna aamma tassunga nassuiaatit innersuussutigineqarput.

Imm. 2-mut

Aalajangersakkami siunnersuut malillugu ernialersuineq qaqugu naammaginartuussanersoq qaffasinnerpaaffissaliinermik aalajangersaasoqarpoq. Aalajangersagaq siunnersuummi § 8, imm. 1-imut naapertuuttumik nassuiarneqarlunilu atorfeqassaaq, tassani allassimalluni suliffeqarfimmi innuttaasunik ikiortarialinnik suliffissaqartitsisutut nalunaarsorsimasumik piginnittut, aallaqqaammut aningaasaliissutaasimasut annertoqataannik aallaqqaammut aningaasaliissutaasimasut ukiumut naammaginartumik erniaqartinneranut naapertuuttunik suliffeqarfimmi piffissami pigisimasaminni ataatsimut ajunngitsorsiassanik taamaallaat tiguisinnaatitaasut. Allatigut aalajangersagaq taanna tassungalu nassuiaatit innersuussutigineqarput.

Siunnersuut malillugu piumasagaatit makku marluk arlaat ataasiinnaq naammassineqarsimappat, ernialersuineq naammaginarsimassanngilaq:

- 1) Ukiumut ernialersuineq, pisortatigoortumik erniamut kisitsisiliussaq sukkulluunniit aalajangersagaasoq 15 procentimik tapeqartillugu, annertussuseqarpat.
- 2) Iluanaarutininik tunniussineq akileraaruteqareernerme suliffeqarfiup angusaanit 35 procentit sinnerlugit annertussuseqarpat.

Aningaasaatinik piginnittunut ataasiakkaanut ukiumut ernialersuinerup ernianut kisitsisiliussaq 15 procentinik tapeqartillugu killeqartinnera, ukiumut ataatsimut aningaasalersuiffiusimasumut, piginnittumut iluanaarutininik tunniussiffiusimanngitsumut naatsorsorneqarpoq. Naammaginartumik ernialersuinerup naatsorsorneqarnerani aningaasaliinerit ataasiakkaat malinneqarput, taamaalilluni piffissani assigiinngitsuni piginnittoq taanna suliffeqarfimmit ataatsimi arlaleriarluni aningaasaliisarsimappat, aningaasaliinernut ataasiakkaanut naammaginartumik ernialersuineq assigiinngissinnaalluni. Siunissami piffissatut aningaasaliiffiusussatut naatsorsuutigisaaq imaluunniit piffissamut aningaasaliiffiusumut iluanaarutininik akiliiffioreersimasooq ilanngullugit naatsorsorneqarsinnaanngillat. Aningaasaliisimanerup ukiuata aappaata naanerata kingorna aningaasaliinermut ataatsimut piginnittoq iluanaarutininik akilernerqarsimappat kingumullu aningaasaliinerup ukiuata tallimaata naanerata kingorna aningaasaliiffiusumik ukioq 0-2-mi iluanaarutininik akiliineq siulleg naammaginartumik ernialersorneqassaaq, ukiulli 5-t kingorna akiliineq ukiumi 3-5-imi aningaasaliineq naammaginartumik ernialersorneqassalluni. Ukiunut arlalinnut aningaasaliinernut iluanaarutininik akiliinernut tunngatillugu ukiuni

attuumassuteqartuni ulloq 31. decembarimi erniat kisitsisaattut pisortat aalajangigaat aallaavigalugu ernialersuineq ukiumut naatsorsorneqassaaq.

Akileraruteqareernermi suliffeqarfiup angusaasa 35 procentiinut killiliineq, aningaasaliisimasunut tamanut suliffeqarfiup innuttaasunik ikiortarialinnik suliffissaqartitsisutut nalunaarsorsimasup ukiumoortumut ataatsimut katillugu iluanaarutitik tunniussinerinut atuuppoq. Procentip kisitsisita a ukiumi iluanaarutit tunniunneqarnerini atuuppoq, aningaasaliisimasunut ataasiakkaanut iluanaarutitik tunniussinerit ukiumut arlalinnut tunngasuuneri apeqqutaatinnagu.

Siunnersuummi § 8, imm. 2 malillugu killiliineq aamma toqqaannangitsumik iluanaarutitut atuuppoq, ilanngullugu assersuutigalugu suliffeqarfik innuttaasunik ikiortarialinnik suliffissaqartitsisutut nalunaarsorsimasooq aningaasaatinik piginnittuniit aningaasaatini piginneqataassutiminik pisippat.

Imm. 3-mut

Aalajangersagaq malillugu iluanaarutitik tunniussisoqassappat, inatsisit allat suliffeqarfiup malitassai, malittarisassai imaluunniit pilersitsinermut uppersaatai, immaqalu tamanna pillugu isumaqatigiissut malillugit iluanaarutitut aalajangersakkanut naapertuuttumik tamanna pissaaq.

Aalajangersagaq taamaalilluni ingerlatseqatigiiffinnut aningaasaliiffiusunut agguagassarsiat imaluunniit iluanaarutitik akiliisarneq pillugu ingerlatseqatigiiffiit pillugit inatsimmi malittarisassanik imaluunniit ingerlatseqatigiiffiit allat pillugit malittarisassanik atuuttunik allannguissamik siunertaqanngilaq, ilanngullugit ingerlatseqatigiiffiit inatsisini imaluunniit isumaqatigiissutini malitassani malittarisassaliornernut naleqqiullugu sinneqartoorutiminnik piginnittunut nuusseqqusaanngitsut. Assersuutigalugu tassaasinnaapput peqatigiiffiit, tassani malittarisassa at malillugit ilaasortat akornanni sinneqartoorutit agguarneqarsinnaanatik. Aamma ingerlatseqatigiiffiusinnaavoq killeqartumik akisussaaffeqartoq (SMB), tassani malittarisassat malillugit sinneqartoorutit piginnittunut nuunneqarsinnaanatik. Aalajangersagaq aningaasaateqarfinnut attuumassuteqanngilaq, tassammi aningaasaateqarfiit piginnittoqanngimmata.

#### § 9-mut

Imm. 1-imut

Aalajangersakkami aalajangersarneqarpoq, suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorsimasutut aatsaat akuersissuteqarfigineqarsimappat, takuuk § 4, suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarsinnaasoq.

Suliffeqarfiup §§ 6-8-imi piumasaqaatit naammassisimappagit, suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaa akuerineqartoq suliffeqarfik nalunaarfigineqassasoq, Atuisartoqarnermut Unammilleqatigiinnermullu Aqutsisoqarfik aalajangiissaaq.

Suliffeqarfiup nalunaarsorneqarnissaa akuerineqartoq Atuisartoqarnermut Unammilleqatigiinnermullu Aqutsisoqarfiup suliffeqarfik nalunaarfigippagu, suliffeqarfik aatsaat suliffeqarfittut innuttaasunik ikiortarialinnik suliffissaqartitsisutut nalunaarsortissinnaasoq, siunnersuummi § 9, imm. 1-imi aalajangersakkami aalajangersarneqarpoq. Suliffeqarfik suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanik akuerineqarsimasoq, takuuk siunnersuummi § 4, siunnersuummi kapitali 4 malillugu suliffeqarfinnut innuttaasunik ikiortarialinnik suliffissaqartitsisunut nalunaarsuiffimi suliffeqarfittut innuttaasunik ikiortarialinnik suliffissaqartitsisutut nalunaarsortissaaq, takuuk siunnersuummi § 9, imm. 2.

Imm. 2-mut

Aalajangersagaq suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaarnissaanut tunngasuvoq. Aalajangersagaq malillugu suliffeqarfik suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamik akuerineqarsimasoq, takuuk § 4, siunnersuummi kapitali 4 malillugu suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi innuttaasunik ikiortarialinnik suliffissaqartitsisutut suliffeqarfik nalunaarsortissavaa.

Suliffeqarfik akuersissuteqarfigineqarsimasoq taamaalilluni siunnersuummi kapitali 4 malillugu suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi suliffeqarfittut innuttaasunik ikiortarialinnik suliffissaqartitsisutut suliffeqarfiup nalunaarsorneqarnissaa nammineq akisussaaffigaa.

Suliffeqarfiup qitiusumik aqutsisutut oqartussai suliffeqarfiup nalunaarsuiffimmi nalunaarsorneqarnissaanut, aamma oqartussanut paasissutissanik tunniussinermi suliffeqarfiup paasissutissanik eqqortunik naammattunillu tunniussinissaanut aamma pissutsinut siunnersuummi pineqartunut ilaasunut tunngasunik paasissutissanik nalunaarsuinissamut, akisussaasuupput. Suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi suliffeqarfiup nalunaarsorneqarnerani paasissutissanik suliffeqarfiup tunniussinissaa, akisussaasuunermut ilaatigut ilaavoq, takuuk siunnersuummi § 12. Aalajangersagaq taaneqartoq tassungalu nassuiaatit innersuussutigineqarput.

Siunnersuummi § 9, imm. 2-mi aalajangersagaq malillugu nalunaarsuiffimmi suliffeqarfiup nalunaarsornerani ilaatigut suliffeqarfittut innuttaasunik ikiortarialinnik suliffissaqartitsisutut nalunaarsorneqarnissap akuerineqarnerata assilnera, suliffeqarfiup tamanut saqqummiutissavaa.

### *§ 10-mut*

Imm. 1-imut

Aalajangersagaq suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaartinnissaanut tunngasuvoq. Aalajangersakkamit takuneqarsinnaavoq suliffeqarfik siunnersuummi §§ 6-8-imi nalunaarsorneqarnissamut piunasaqaatinik tamanik naammassinnikkunnaarpat, suliffeqarfiup suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorsimanini allanngortissagaa nalunaarsugaajunnaarsillugulu. Aalajangersagaq taamaalilluni ilaatigut siunnersuummi §§ 6-8-mut atatillugu nassuiarneqarlunilu atorneqassaaq.

Siunnersuummi § 10, imm. 1-imi aalajangersagaq taamaalilluni suliffeqarfittut innuttaasunik ikiortarialinnik suliffissaqartitsisutut nalunaarsorsimasooq siunnersuummi §§ 6-8-imi piunasaqaammik ataatsimik arlalinnilluunniit naammassinnikkunnaarpat, tassunga attuumassuteqarpoq, siunnersuummi § 5, imm. 2 malillugu akuersissuteqarneq Atuisartoqarnermut Unammilleqatigiinnermullu Aqutsisoqarfiup suli uterteqqusimannginneraa apeqqutaatinnagu.

Suliffeqarfik siunnersuummi §§ 6-8-imi piunasaqaammik ataatsimik arlalinnilluunniit naammassinnikkunnaarpat, suliffeqarfiup ingerlaannartumik tamanna siunnersuummi § 5, imm. 1 malillugu Atuisartoqarnermut Unammilleqatigiinnermullu Aqutsisoqarfimmut nalunaarutigissavaa.

Suliffeqarfik siunnersuummi §§ 6-8-imi nalunaarsorneqarnissamut piunasaqaatinik tamanik naammassinninngippat, § 10, imm. 1-imi aalajangersakkap tamatuma saniatigut malitsigisaanik, suliffeqarfiup innuttaasunik ikiortarialinnik suliffissaqartitsisutut nalunaarsorsimasup, suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nammineerluni nalunaarsugaajunnaarnissamut pisussaaffeqarpoq. Siunnersuummi § 5, imm. 2 malillugu suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamik akuerineqarsimanerata utertinneqarnissaa pillugu Atuisartoqarnermut Unammilleqatigiinnermullu Aqutsisoqarfiup suli aalajangiisimanninnera apeqqutaatinnagu, aalajangersagaq atorneqassaaq.

Suliffeqarfik innuttaasunik ikiortarialinnik suliffissaqartitsisooq siunnersuummi §§ 6-8-imi piunasaqaammik ataatsimik arlalinnilluunniit naammassinnikkunnaartoq, suliffeqarfittut

innuttaasunik ikiortarialinnik suliffissaqartitsisutut nalunaarsorsimaannarsinnaanngitsoq tassungalu atasunik iluaqutissartaasut atuinnarsinnaanngikkai, qulakkeeriniarnermut aalajangersagaq iluaqutaassaaq.

Aalajangersagaq malillugu suliffeqarfiup siunnersuummi §§ 6-8-imi piumasagaammik ataatsimik arlalinnilluunniit naammassinnikkunnaarnerata kingorna sapinngisamik piaarnerpaamik nalunaarsorsimajunnaarnissaaq pissaaq.

Suliffeqarfimmi innuttaasunik ikiortarialinnik suliffissaqartitsisutut nalunaarsorsimasumi qitiusumik aqutsinermi oqartussat nalunaarsorsimajunnaarnerup isumaginissaanut akisussaapput, takuuk § 12, imm. 2. Siunnersuummi § 12, imm. 2 tassungalu nassuiaatit takukkit.

Imm. 2-mut

Aalajangersagaq siunnersuummi § 10, imm. 1-imut atatillugu nassuiarneqarlunilu atorpeqassaaq, tassani takuneqarsinnaalluni suliffeqarfik siunnersuummi §§ 6-8-imi nalunaarsorneqarnissamut piumasagaatinik tamanik naammassinnikkunnaarpat, suliffeqarfiup suliffeqarfimmut innuttaasunik ikiortarialinnik suliffissaqartitsisunut nalunaarsuiffimmi nalunaarsorsimanini suliffittut innuttaasunik ikiortarialinnik suliffissaqartitsisutut nalunaarsorsimasup, nalunaarsorsimanini allanngortissagaa.

Aalajangersagaq malillugu siunnersuummi §§ 6-8-imi nalunaarsorneqarnissamut piumasagaatit naammassineqarnissaannut amigaataasut piffissap naammaginatup, Atuisartoqarnermut Unammilleqatigiinnermullu Aqutsisoqarfiup aalajangersarneqartup, iluani suliffeqarfimmit iluarsineqarsinnaappata aamma iluarsiniarniarpagit, taamatut nalunaarsorsimajunnaarnerup isumaginissaanut taamaattoq suliffeqarfik pisussaaffeqanngilaq. Taamatut pisoqartillugu siunnersuummi § 5, imm. 1 malillugu tamanna pillugu Atuisartoqarnermut Unammilleqatigiinnermullu Aqutsisoqarfimmit suliffeqarfik taamaalilluni nalunaarfigineqassaaq, aamma siunnersuummi §§ 6-8-imi piumasagaatinik naammassineqanngitsunik iluarsinissamut suliffeqarfik nalunaarsorsimasooq piffissamik naammaginatumik periarfissinneqarnissamut Atuisartoqarnermut Unammilleqatigiinnermullu Aqutsisoqarfimmut qinnuteqarluni.

Akuersinerup utertinneqarneranik kinguneqarsinnaasunik pissutsinik iluarsinissamut suliffeqarfik innuttaasunik ikiortarialinnik suliffissaqartitsisutut nalunaarsorsimasooq piffissamik naammaginatumik qulakkeerunneqarnissaanut siunnersuut taamaalilluni iluaqutaassaaq.

Suliffeqarfiup piffissaliussamut killissaliussap aalajangersarneqartup iluani §§ 6-8-imi piumasagaatit naammassineqanngitsut iluarsinngippagit, siunnersuummi § 5, imm. 2

malillugu akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Nalinginnaasumik siunnersuummi § 5, imm. 2 tassungalu nassuiaatit innersuussutigineqarput.

Pisoqarsimasinnaavoq siunnersuummi §§ 6-8-imi piumasaqaammik ataatsimik arlalinnilluunniit naammassinnginneq pingaaruteqarluni imaluunniit annertuujulluni, taamatut piffissaliinissamik suliffeqarfik qinnuiginnikkaluortoq, pissutsit iluarsineqarnissaannut suliffeqarfimmut piffissamik aalajangiinissaaq tulluanngitsoq Atuisartoqarnermut Unammilleqatigiinnermullu Aqutsisoqarfik naliliisariaqarluni.

Iluarsiinissamat piffissaliussamik aalajangersaasoqassasoq suliffeqarfik qinnuiginnippat, pisuni ataasiakkaani pissutsinik attuumassuteqartunik tamaginnik, ilanngullugu pissutsip imaluunniit pissutsit annertussusaat qanoq ittuunerilu ilaalu ilanngullugit, aamma nalinginnaasumik pisortat ingerlatsineranni maleruagassat tunngaviusullu, ilanngullugit kinaassusersiunnginnissaaq, annertoqqatigiimmik pinninnissaaq aamma naligiimmik suliarinninnissaaq pillugu tunngaviusooq, Atuisartoqarnermut Unammilleqatigiinnermullu Aqutsisoqarfik iluarsiinissamat piffissaliussamik aalajangersaassanersoq, aamma taamatut piffissaliussaaq qanoq sivistigissanersoq, ataasiakkaatigut naliliinerup kingorna aalajangerneqassaaq.

Aallaaviatigut tamanna pillugu suliffeqarfik qinnuiginnippat, iluarsiinissamat piffissaliussamik Atuisartoqarnermut Unammilleqatigiinnermullu Aqutsisoqarfik aalajangersaassaaq. Piffissaliussaaq aallaaviatigut ullut 14-it missaaniissaaq. Tassani ilitsersuissutitut aallaaviusooq pineqarpoq. Iluarsiinissamat periarfissiisoqarnani imaluunniit assersuutigalugu ulluni 30-imi iluarsiinissamat piffissaliinermik aalajangersaanissamat periarfissiinani, akuersissuteqarnerup utertinneqarnissaa pillugu pisuni aalajangersimasuni Atuisartoqarnermut Unammilleqatigiinnermullu Aqutsisoqarfik taamaalilluni aalajangiisinnaavoq.

Suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamik akuerineqarsimaneranut atatiinnarnissaanullu piumasaqaatit naammassinngippagit, tamanna pillugu ingerlaannartumik Atuisartoqarnermut Unammilleqatigiinnermullu Aqutsisoqarfimmut ilisimatitsinissamat, takuuk siunnersuummi § 5, imm. 1, ingerlaannarlu pissutsit iluarsinissaannut, suliffeqarfik pisussaaffeqarpoq. Suliffeqarfiup ingerlaannartumik imaluunniit Atuisartoqarnermut Unammilleqatigiinnermullu Aqutsisoqarfimmit piffissaliunneqartup iluani pissutsit iluarsisimanngippagit aamma siunnersuummi §§ 6-8-imi piumasaqaatinik tamaginnik naammassinngippat, suliffeqarfiup tamatuma kingorna namminerisaminik sapinngisamillu piaarnerpaamik suliffeqarfiit innuttaasunik ikiortarialinnik suliffissaqartitsisut nalunaarsuiffianni nalunaarsorsimanini allanngortissavaa, taamaalilluni tamatuma kingorna suliffeqarfik suliffeqarfittut innuttaasunik

ikiortarialinnik suliffissaqartitsisutut nalunaarsorsimajunnaarluni.

Imm. 3-imut

Aalajangersakkami allassimavoq, qitiusumik aqutsinermi oqartussat akisussaaffiini pisussaaffiinilu aamma suliffeqarfiup suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaarsinnissaanut pisussaaffeqarneq aamma ilaatinneqartoq, takuuk kapitali 5.

Aalajangersakkami siunertaavoq, suliffeqarfiup innuttaasunik ikiortarialinnik suliffissaqartitsisutut nalunaarsorsimasup, suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorsimanissamut siunnersuummi piumasaqaatinik naammassinninnissaanik qulakkeerinissamut, iluaqusiinissaq. Aalajangersakkami aamma siunertaavoq, suliffeqarfimmi qitiusumik aqutsinermi oqartussat, suliffeqarfiup innuttaasunik ikiortarialinnik suliffissaqartitsisutut nalunaarsorsimasup siunnersuummi piumasaqaatinik naammassinninnissaanut akisussaasuusut, erseqqissarneqarnissaa.

#### *§ 11-mut*

Imm. 1-imut

Aalajangersakkami aalajangersarneqarpoq, suliffeqarfiit siunnersuut malillugu nalunaarsorsimasut atiminni nittarsaanominnilu suliffeqarfittut innuttaasunik ikiortarialinnik suliffissaqartitsisutut nalunaarsorsimasutut taaguutip atornissaanut kisermaassisussaataitasut. CVR-nut nalunaarsuiffimmi Danmarkimi suliffittut innuttaasunik ikiortarialinnik suliffissaqartitsisutut nalunaarsorsimasut "RSV"-mik nalunaaqutserneqartarput.

Taamaalilluni suliffeqarfiit suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaata akuerineqarnissaanik qinnuteqarsimasut akuerineqarsimasullu kisimik taaguut "suliffeqarfittut innuttaasunik ikiortarialinnik suliffissaqartitsisutut nalunaarsorsimasoq" suliffeqarfiup atiani nittarsaanneranilu "suliffeqarfittut innuttaasunik ikiortarialinnik suliffissaqartitsisutut nalunaarsorsimasutut" imaluunniit "SIISN" atorsinnaavaat.

Suliffeqarfik nalunaarsorsimasoq suliffeqarfinnut innuttaasunik ikiortarialinnik suliffissaqartitsisunut siunnersuummut pineqartunut ilaasunut immikkut piumasaqaatinik suliffeqarfiup naammassinninneranut immikkut ilisarnaatitup uppersaaititullu taaguummik "suliffeqarfittut innuttaasunik ikiortarialinnik suliffissaqartitsisutut nalunaarsorsimasoq" imaluunniit "SIISN" atuisinnaavoq.

"Suliffeqarfittut innuttaasunik ikiortarialinnik suliffissaqartitsisutut nalunaarsorsimasutut" taaguutip atornissaanut pisinnaatitaaneq, kisermaassisusaaatitaanermut ilaangilaq. Taaguut taaneqartoq taamaalluni suliffeqarfinit nalunaarsorsimangitsunit atorneqarsinnaangilaq, tassami taamatut nalunaarsugaaneq eqqaaneqartoq innuttaasunik ikiortarialinnik suliffissaqartitsinerup iluani suliffeqarfinnik aalajangersimasunik immikkoortiterinermut tunngasuummat.

Aalajangersagaq taanna malillugu nalunaarsuineramik aaqqissuussinermut kisermaassisusaaatitaanermullu nalinginnaasunik siunertaavoq, ilaatigut aningaaserivinni, suleqatigisinnaasani soqutigisaqartunilu allani innuttaasunik ikiortarialinnik suliffissaqartitsisunut suliaasaqarfiup ilisimaneqarnerulersinnissaa. Tamatuma saniatigut "suliffeqarfittut innuttaasunik ikiortarialinnik suliffissaqartitsisutut nalunaarsorsimasutut" taaguummik eqqunngitsumik atuinissamut illersuilluni, kisermaassisusaaatitaanermi sullitat, aningaasaliisartut allallu soqutiginnittut suliaasaqarfimmuut tatiginninnissaat qulakkeerqarpoq. Tunisassiorlut suliffeqarfiillu ilaatigut unammilleqatigiinnermi iluaquserneqarnissaq anguniarlugu, allaniit suliffeqarfimmuut "suliffeqarfittut innuttaasunik ikiortarialinnik suliffissaqartitsisutut nalunaarsorsimasutut" taaguummik eqqunngitsumik atuillutik akikinngitsumik unammillerneqarnissamut illersorneqassapput.

Akunermuliullutik niuertut, suleqatigisartakkat ilaalu ilanngullugit suliffeqarfiup "suliffeqarfittut innuttaasunik ikiortarialinnik suliffissaqartitsisutut nalunaarsorsimanera" innersuussutigalugu suliffeqarfimmik imaluunniit taassuma nioqqutissiaanik kiffartuussineranilluunniit nittarsaassinerinut aalajangersagaq aamma atuuppoq.

Taaguutip "suliffeqarfittut innuttaasunik ikiortarialinnik suliffissaqartitsisutut nalunaarsugaasoq" imaluunniit "SIISN" ingerlatseqatigiiffinnut inatsisitigut imaluunniit aningaasaateqarfinnut inatsisitigut suliffeqarfiup aqqa taarsinngilaa, aamma siunnersuummi inatsisit allat malitsigisaannik suliffeqarfinnut ataasiakkaanut piunasaqaataasinnaasunut sunnerneqanngillat. Siunnersuut taamaallaat taaguutip aalajangersimasup atorneqarnissaanut pisinnaatitaanermut tunngassuteqarpoq, suliffeqarfik qanoq iluseqartoq pineqarnerasoq tassungalu atasut pissutsit apeqqutaatinnagit.

Siunnersuut malillugu taaguutip "suliffeqarfittut innuttaasunik ikiortarialinnik suliffissaqartitsisutut nalunaarsugaasoq" atorneqarnissaanut kisermaassisusaaatitaaneq pillugu piunasaqaatinik suliffeqarfiit innuttaasunik ikiortarialinnik suliffissaqartitsisut naammassinninnissaat, nalunaarsuisarnermut aaqqissuussinermut aamma suliffeqarfiit innuttaasunik ikiortarialinnik suliffissaqartitsisutut nalunaarsorsimasut tusaamaneqarnerannut annertuumik pingaaruteqarpoq. Taamaattumik taaguummik "suliffeqarfittut innuttaasunik ikiortarialinnik suliffissaqartitsisutut nalunaarsugaasoq" imaluunniit "SIISN" eqqunngitsumik atuisoq siunnersuummi § 25 malillugu akiliisitsinermik pineqaatissinneqarsinnaavoq.



Tamanna suliffeqarfinnut nalunaarsorsimasunut, nalunaarsorneqarnissamut piunasaqaatinik naammassinnikkunnaartunut, suliffeqarfinnut nalunaarsorsimanngitsunut, taaguummik atuisunut, aamma akunnermuliullutik niuertunut, suleqatigisanut ilaalu ilanngullugit, suliffeqarfik "suliffeqarfittut innuttaasunik ikiortarialinnik suliffissaqartitsisutut nalunaarsorsimasuusoq" innersuussutigalugu suliffeqarfimmik imaluunniit taassuma nioqutissiaanik nittarsaasunut, atuuppoq.

Imm. 2-mut

Aalajangersakkami allassimavoq, suliffeqarfik siunnersuummi § 4 malillugu nalunaarsorneqarnissamut akuerineqarsimappat aamma siunnersuummi kapitali 4 malillugu suliffeqarfinnut innuttaasunik ikiortarialinnik suliffissaqartitsisutut nalunaarsuiffimmi sulii nalunaarsortissimappat, taaguutip "suliffeqarfittut innuttaasunik ikiortarialinnik suliffissaqartitsisutut nalunaarsorsimasoq" atorneqarnissaanut suliffeqarfik taamaallaat pisinnaatitaasoq.

Suliffeqarfik nalunaarsorsimasutut akuerineqarsimanngippat, suliffeqarfiup taaguut "suliffeqarfittut innuttaasunik ikiortarialinnik suliffissaqartitsisutut nalunaarsorsimasoq" atorsinnaangikkaa, erseqqissarneqarnissaa aalajangersakkami ilaatigut siunertaavoq. Tamatuma saniatigut suliffeqarfiup nalunaarsorneqarnissamik akuerineqarsimasup, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsortinneqareernerani aatsaat taaguut "suliffeqarfittut innuttaasunik ikiortarialinnik suliffissaqartitsisutut nalunaarsorsimasoq" atorsinnaagaa, erseqqissarneqarnissaa aalajangersakkami siunertarineqarpoq.

Parlattuani aalajangersagaq malillugu, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissaanut akuersissuteqarneq Atuisartoqarnermut Unammilleqatigiinnermullu Aqutsisoqarfimmit utertinneqarpat, takuuk siunnersuummi § 5, imm. 2, suliffeqarfiup taaguummik "suliffeqarfittut innuttaasunik ikiortarialinnik suliffissaqartitsisutut nalunaarsorsimasoq" atuisinnaatitaanera atorunnaassaaq.

#### *§ 12-mut*

Suliffeqarfimmi innuttaasunik ikiortarialinnik suliffissaqartitsisutut nalunaarsorsimasumi qitiusutut aqutsinermi oqartussat akisussaaffiitut pisussaaffiinullu aalajangersagaq tunngasuvoq. Aalajangersagaq malillugu qitiusumik aqutsinermi oqartussat oqartussanut paasissutissanik tunniussinermi paasissutissanik eqqortunik naammattunillu aamma paasissutissanik siunnersuut malillugu pissutsinut tunngasunut nalunaarsuinermit suliffeqarfiup tunniussinissaanut akisussaasuupput. Akisussaanermit ilaatigut ilaapput suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamik qinnuteqarnerani, suliffeqarfiup suliffeqarfinnut innuttaasunik ikiortarialinnik suliffissaqartitsisutut nalunaarsuiffimmi suliffeqarfittut innuttaasunik

ikiortarialinnik suliffissaqartitsisutut nalunaarsortinnerani, pissutsit siunnersuummi pineqartunut ilaasut pillugit oqartussanut nalunaaruteqarnermi suliffeqarfiup paasissutissanik tunniussinera aamma pisortat suliffeqarfimmik nakkutilliinerani aamma pissutsit ingerlatallu siunnersuummi pineqartunut ilaasut pilugit paasissutissanik tunniussineq.

Aalajangersakkami siunertaavoq, paasissutissat Atuisartoqarnermut Unammilleqatigiinnermullu Aqutsisoqarfiup suliamik sularinninneranut siunnersuullu malillugu aalajangiineranut atugassat eqqortuunissaannut iluaqusiinissaq. Aalajangersakkami aamma siunertaavoq, paasissutissat qinnuteqarnermi, nalunaarsuinermi kingusinnerusukkullu nalunaarsuioqarnermi nalunaarutigineqartut eqqortuunerisa qulakkeernissaannut qitiusumik aqutsinermi oqartussat immikkut pisussaaffeqartut erseqqissaanissaq.

Taaguut "qitiusumik aqutsinermi oqartussat" ingerlatseqatigiiffiit pillugit inatsisip Kalaallit Nunaannut atuutilersinneqarnera pillugu peqqussummi kingusinnerusukkut allanngortinneqartumi § 5, imm. 1, nr. 4-mut naapertuuttumik nalinginnaasumik paasineqassaaq. Qitiusumik aqutsinermi oqartussat tassaapput suliffeqarfinni pisortaaneqartuni siulersuisoqartunilu siulersuisut. Suliffeqarfinni taamaallaat pisortaaneqarfeqartuni qitiusumik aqutsinermi oqartussat tassaapput pisortaaneqarfik. Suliffeqarfinni pisortaaneqarfeqartuni nakkutilliisoqartunilu qitiusumik aqutsinermi oqartussaq aamma tassaavoq pisortaaneqarfik.

Aalajangersakkami allassimavoq, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsuiffimmi, tamanna pillugu § 10-imi aalajangersakkat malillugit suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaarsinnissaanut, takuuk kapitali 5, suliffeqarfiup nalunaarsorsimasup qitiusumik aqutsisuini oqartussat akisussaasuusut.

Aalajangersakkami siunertaavoq suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsuiffimmiinnissamut, siunnersuummi piumasaqaatinik suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorsimasup eqqortitsinissaata, qulakkeerneqarnissaa. Aalajangersakkami aamma siunertaavoq, suliffeqarfiup suliffeqarfittut innuttaasunik ikiortarialinnik suliffissaqartitsisup siunnersuummi piumasaqaatinik eqqortitsinissaanut suliffeqarfimmi qitiusumik aqutsinermi oqartussat akisussaasuusut, erseqqissarneqarnissaa.

### *§ 13-imut*

Imm 1-imut

Suliffeqarfiup innuttaasunik ikiortarialinnik suliffissaqartitsisutut nalunaarsorsimasup nalunaarsorneqarnermiit aammalu nalunaarsorsimasuunermut piffissaq tamaat

nalunaarusiornissamut, paasissutissanik nalunaaruteqarnissamut uppersaatinillu nassiussinissamut pisussaaffiit § 13 tunngassuteqarpoq.

Imm. 1-imi aalajangersagaq malillugu suliffeqarfik innuttaasunik ikiortarialinnik suliffissaqartitsisutut nalunaarsorsimasoq ukiumut naatsorsuutit pillugit inatsisip Kalaallit Nunaannut atuutilersinneqarnera pillugu peqqussut kingusinnerusukkut allannguuteqartoq naapertorlugu ukiut tamaasa ukiumut nalunaarusiamik saqqummiussisussaavoq, aammalu suliffeqarfiup minnerpaamik naatsorsuusiortermi immikkoortiterineq B pillugu malittarisassat malittussaallugit.

Ukiumut naatsorsuutit pillugit inatsit malillugu ukiumut nalunaarusiortermi maleruagassani, katitertakkatut ilusiliinermik taagorneqartoq aallaavigneqarpoq, tassani maleruagassanut suliffeqarfiup malissallugit pisussaaffigisaannut, aallaaviatigut suliffeqarfiup angissusaa apeqqutaalluni. Tassa imaappoq, suliffeqarfiit mikisut piumasaqaatit ikittut pingaarnerusunullu tunngasut malissavaat, suliffeqarfiit anginerusut piumasaqaatit amerlanernit sukumiinerusunullu malissallugit.

Ukiumut naatsorsuutit pillugit inatsit malillugu aallaavisoq tassaavoq ingerlatseqatigiiffiit suulluunniit tamarmik killeqartumik akisussaaffeqartut ukiumut nalunaarusiamik tunniussissasut. Takukkit ukiumut naatsorsuutit pillugit peqqussummi § 3, imm. 1, nr. 1-5. Taamaattoq peqqussummi § 4, imm. 1-imi angissutsimut killiliinerit malitsigisaanik ukiumut nalunaarusiamik tunniussinissaq pillugu piumasaqaammut suliffeqarfiit innuttaasunik ikiortarialinnik suliffissaqartitsisut ilaatinneqanngissinnaapput.

Peqqussummi § 4, imm. 1 malillugu suliffeqarfiit inuussutissarsiummik ingerlataqartut aalajangersimasut pillugit inatsimmi § 3-mi (suliffeqarfiit peqatigiiffiillu killilimmik akisussaaffeqartut) aamma § 4-mi pineqartunut ilaasut (piginneqatigiinnikkut ingerlatseqatigiiffiit killilimmik akisussaaffeqartut), angissusissanut killiliussatut allasimasut ataaniikkunik, ukiumut nalunaarusiamik tunniussinissamut pisussaatinneqassanngillat.

Suliffeqarfiup piffissami oqimaaqatigiissitsinermi ukiuni naatsorsuusiortermi tulleriinni marlunni angissutsinit makkunanga pingasuusunit marluk qaangersimangippagit, ilaatitsinnginneq atuutissaq:

- 1) Aningaasat oqimaaqatigiissinnerisa inerneranni 7 mio. kr.-it
- 2) Ilanngaattissat ilanngaatigereerlugit 10 mio. kr.-it
- 3) Ukiumi naatsorsuusiortermi agguaqatigiissillugu ulloq naallugu sulisut 10-t

Ilaatitsinnginnerli taamaallaat ukiumut naatsorsuutit pillugu peqqussummi § 4, imm. 1-imi erseqqissumik taaneqartunut atuuppoq.

Suliffeqarfiit allat, ilanngullugit aktiaatileqatigiiffiit aamma piginneqatigiinnikkut ingerlatseqatigiiffiit killilimmik akisussaaffeqartut aamma aningaasaateqarfiit inuussutissarsiummik ingerlataqartut, imm. 1-imi angissusissanut killiliussanik allatigut naammassinninersut apeqqutaatinnagu, ukiumut naatsorsuutit pillugit peqqussut malillugu ukiumut nalunaarusiamik saqqummiussisussaapput, tassami suliffeqarfiit taakkua minnerpaamik naatsorsuuserineq B pillugu malittarisassanik malinnittussaammata. Takuuk ukiumut naatsorsuutit pillugit peqqussummi § 7.

Taamaalilluni pisoqarsinnaavoq suliffeqarfik innuttaasunik ikiortarialinnik suliffissaqartitsisutut nalunaarsorsimasoq ukiumut naatsorsuutit pillugit peqqussut malillugu ukiumut naatsorsuutininik tunniussinissamut pisussaaffeqarnani. Taamaattoq siunnersuummi § 13, imm. 1 malillugu taanna apeqqutaatinnagu suliffeqarfik innuttaasunik ikiortarialinnik suliffissaqartitsisutut nalunaarsorsimasoq ukiumut naatsorsuutit pillugit inatsit naapertorlugu ukiumut naatsorsuutininik saqqummiussinissamut, minnerpaamillu naatsorsuuserineri B-mi malittarisassanik malinninnissamut, pisussaaffeqarpoq. Siunnersuummi imm. 1-imi taamaalilluni aalajangersarneqarpoq suliffeqarfiit innuttaasunik ikiortarialinnik suliffissaqartitsisutut nalunaarsorsimasut, ukiumut naatsorsuutit pillugit inatsit malillugu naatsorsuutininik saqqummiussinissamik pisussaaffeqarnermut ilaatinneqanngitsut, minnerpaamik naatsorsuuserineri B malillugu naatsorsuutininik saqqummiussissasut.

Naatsorsuuserineq B taamaalilluni "suliffeqarfinnut mikisunut" piffissami oqimaaqatigiissitsineri ukiuni naatsorsuuseriorfiusuni tulleriinni marlunni angissutsinit makkunanga pingasuusunit marluk qaangersimangikkaat suliffeqarfinnut nassuiaassutigineqarpoq:

- 1) oqimaaqatigissitsinerup inenera 36 mio. kr.
- 2) ilanngaattissat ilanngaatigereerlugit kaaviaatitat 72 mio. kr.
- 3) ukiup naatsorsuuseriorfiusup ingerlanerani piffissaq tamaat atorfeqartut agguaqatigiissillugu 50-inik amerlassuseqartut, takuuk ukiumut naatsorsuuseriorneri inatsimmi §7, imm. 2, nr. 1.

Suliffeqarfik innuttaasunik ikiortarialinnik suliffissaqartitsisutut nalunaarsorsimasoq killiliussanik taaneqartunik qaangiisimappat, ukiumut naatsorsuutit pillugit peqqussut malillugu ukiumut naatsorsuutininik naatsorsuusereriaatsini malillugu saqqummiussiinnassaaq.

Suliffeqarfik innuttaasunik ikiortarialinnik suliffissaqartitsisutut nalunaarsorsimasoq aamma tamanit takuneqarsinnaasunik naatsorsuuteqassaaq. Tamatumani siunertaavoq suliffeqarfiit innuttaasunik ikiortarialinnik suliffissaqartitsisutut nalunaarsorsimasut pillugit ersarissuutinnissaat, ilanngullugu suliffeqarfiup aningaasaqarnera sinneqartoorutillu atornerarneri. Tamanut saqqummiineq siunnersuummi imm. 2 malillugu ukiumut

nalunaarusiat nassiunnerisigut pissaaq, tamatuma kingorna taakku tamanit pissarsiarineqarsinnaalissallutik. Nalinginnaasumik siunnersuummi § 13, imm. 2 tassungalu nassuiaatit innersuussutigineqarput.

Imm. 2-mut

Aalajangersakkami allassimavoq suliffeqarfittut innuttaasunik ikiortarialinnik suliffissaqartitsisutut nalunaarsorsimasoq ukiumut nalunaarusiani kingusinnerpaamik, ukiumut naatsorsuutit pillugit inatsisip Kalaallit Nunaannut atulersinneqarnera pillugu peqqussummi kingusinnerusukkut allanngortinneqartumi, tamanna pillugu aalajangersakkat naapertorlugit suliffeqarfiup ukiumut nalunaarusiamik Inuussutissarsiornermut Aqutsisoqarfimmut nassiussinerata peqatigisaanik, Atuisartoqarnermut Unammilleqatigiinnermullu Aqutsisoqarfimmut nassitissavaa.

Aalajangersagaq suliffeqarfik innuttaasunik ikiortarialinnik suliffissaqartitsisutut nalunaarsorsimasoq tamanut ammasumik naatsorsuuteqassasoq, piumasaqaammut atatillugu isigineqassaaq. Tamatumani siunertaavoq suliffeqarfiit innuttaasunik ikiortarialinnik suliffissaqartitsisutut nalunaarsorsimasut pillugit ersarissuutitsinissaq. Tamanut saqqummiussineq siunnersuummi imm. 2 malillugu ukiumut nalunaarusiat nassiunnerisigut pissaaq, tamatuma kingorna tamanit pissarsiarineqarsinnaasunngortinneqassalluni.

Ukiumut nalunaarusiaq, kingusinnerpaamik suliffeqarfiup ukiumut nalunaarusiami Inuussutissarsiornermut Aqutsisoqarfimmut nassiunnerata peqatigisaanik, Atuisartoqarnermut Unammilleqatigiinnermullu Aqutsisoqarfimmut nassiunneqassaaq. Taamaattoq Atuisartoqarnermut Unammilleqatigiinnermullu Aqutsisoqarfimmut nassiussineq akuersissuteqarnerup kingorna tunngavissaqarani kinguarsaanertaqanngitsumik pissaaq. Ukiumut nalunaarusiaq ukiumut naatsorsuutit naammassineqarnerinit kingusinnerpaamik qaammatit 6-t qaangiutsinnagit tiguneqareersimassaaq. Ukiumut nalunaarusiaq, ilaatigut aamma § 7, imm. 1, nr. 5-imik aammalu paasissutissat § 1, imm. 2, nr. 7 malillugu nalunaarsuinermit suliffeqarfiup tunniussassaasa kingorna piumasaqaatinik suliffeqarfiit naammassinninnissaat qulakkeeriniarlugu, Atuisartoqarnermut Unammilleqatigiinnermullu Aqutsisoqarfiup misissugassanik tigusilluni misissuinerani, atorneqassaaq.

Suliffeqarfik siunnersuummi §§ 6-8-imi piumasaqaammik ataatsimik arlalinnilluunniit naammassinninngippat, ukiumut nalunaarusiamik Atuisartoqarnermut Unammilleqatigiinnermullu Aqutsisoqarfimmut nassiussinermit, siunnersuummi § 5, imm. 1 malillugu suliffeqarfik innuttaasunik ikiortarialinnik suliffissaqartitsisutut nalunaarsorsimasoq Atuisartoqarnermut Unammilleqatigiinnermullu Aqutsisoqarfimmut ingerlaannartumik nalunaaruteqarnissamik pisussaaffeerutsinneqanngilaq. Suliffeqarfik siunnersuummi §§ 6-8-imi piumasaqaammik ataatsimik arlalinnilluunniit naammassinnikkunnaartoq ukiumut naatsorsuutinit takuneqarsinnaanersoq apeqqutaatinnagu, tamanna atuuppoq.

Imm. 3-mut

Suliffeqarfiit innuttaasunik ikiortarialinnik suliffissaqartitsisutut nalunaarsorsimasut ersarissuutinnissaannik qulakkeerinissaq, aalajangersakkami siunertaavoq, ilanngullugu suliffeqarfiup aningaasaqarneranut sinneqartoorutinillu atuinerannut tunngasut.

Imm. 1-imi aamma 2-imi aalajangersakkat assigalugit, aalajangersakkami erseqqissarneqarpoq, suliffeqarfiup innuttaasunik ikiortarialinnik suliffissaqartitsisutut nalunaarsorsimasup ukiumut naatsorsuutit pillugu peqqussut malillugu ukiumut nalunaarusiamut piunasaqaatit naammassisimassagai. Imm. 2-mut atatillugu eqqaaneqartutut, suliffeqarfik ukiumut naatsorsuutit pillugit inatsit malillugu ukiumut naatsorsuutininik saqqummiussinissaq pillugu malittarisassani pineqartunut ilaatinneqarnerisq apeqqutaatinnagu, tamanna atuuppoq. Takukkit siunnersuummi § 13, imm. 1-imut nassuiaatit matuma siulianiittut.

Tamatuma saniatigut siunnersuummi imm. 3-mi allassimavoq, ilaatigut pissutsit suliffeqarfiup aningaasaataanik iliuseqarfiginninnermut tunngasut, ukiumut naatsorsuutinit takuneqarsinnaanngitsut, pillugit suliffeqarfiit innuttaasunik ikiortarialinnik suliffissaqartitsisutut nalunaarsorsimasut ukiumut nalunaarusiortassasut. Siunnersuummi § 13, imm. 3 malillugu ukiumut nalunaarusiamik nassiussinermut atatillugu suliffeqarfik innuttaasunik ikiortarialinnik suliffissaqartitsisutut nalunaarsorsimasoq pissutsit makku pillugit nalunaarusiussaaq:

Nr. 1-imut

Suliffeqarfiit innuttaasunik ikiortarialinnik suliffissaqartitsisutut nalunaarsorsimasut aalajangersagaq malillugu ilaatigut maannakkut siusinnerusukkullu aqutsisuni ilaasut sulinerminnut akissarsiaat tamarmiusut aqutsisuni oqartussanut tamaginnut immikkut agguarlugit immaqalu aamma suliffeqarfiup pilersitsisunut piginnittuinnillu akissarsiat, ukiumoortumik nalunaarutigisassavaat.

Imm. 3, nr. 1-imi aqutsisunut taaguummi pineqartunut ilaapput suliffeqarfimmi oqartussani ilaasoq kinaluunniit, pingaarnertigut ulluinnarniluunniit aqutsisuusoq. Ilaatigut tassaapput pisortaaneqarfik, siulersuisut nakkutilliisullu. Pilersitsisut piginnittuulluunniit akissarsiaqartinneqarpata, tamanna aamma nalunaarusiornermi imm. 3, nr. 1-imi takuneqarsinnaassaaq.

Pilersitsisunut, piginnittunut aqutsisunulluunniit akissarsisitsinermi siunnersuummi § 8, imm. 1-imi iluanaarutitigut killiliinermik suliffeqarfiup innuttaasunik ikiortarialinnik suliffissaqartitsisutut nalunaarsorsimasup avaqquassinnginnissaanik qulakkeernissaq, aalajangersakkami siunertaavoq.

Suliffeqarfiup akissarsiat tamarmiusut ilaallu ilanngullugit paasissutissiissutigissavai, ilagalugit soraarnerussutisianut akiliutit soraarnermilu ajunngitsorsiassat, ukiumi naatsorsuusiorfiusumi nalunaarusiornermut tunngasumi, maannakkut siusinnerusukkulluunniit aqutsisuni ilaasortanut akiliutit imaluunniit akiliutaasimasut. Paasissutissat suliffeqarfimmi aqutsisoqarfinnut ataasiakkaanut agguarneqassapput. Inuk ataaseq aqutsisoqarnermi oqartussanut arlalinnut ilaappat, ilanngullugu assersuutigalugu pisortaaneqarfimmi siulersuisunilu, aammalu pineqartoq aqutsisuni inissisimaffiit marluk isumaginerinut akissarsiaqartinneqarluni, inuup pineqartup akissarsiai tamarmik aqutsisuni sulianut agguarneqassapput aammalu pineqartuni aqutsisutut sulinerni paasissutissiissutigineqarlutik. Inuk ataaseq aqutsisuni arlalinnik suliaqarpat, ilanngullugu assersuutigalugu pisortaaneqarfimmi marlunnik inissisimaffeqarluni, pineqartup akissarsiffigisartagaannik, tamanna naatsorsuinermit takuneqarsinnaassaaq aammalu atorfinnut ataasiakkaanut piffissamut suliffiusumut agguarneri itisilerneqassallutik.

Nr. 2-mut

Imm. 3, nr. 2-mi aalajangersagaq malillugu ukioq naatsorsuusiorfiusoq tamaat suliffeqarfiup qanimullu suleqatigisap akornanni isumaqatigiissutaasimasut suulluunniit pillugit paasissutissat ukiumut nalunaarusiamit takuneqarsinnaassapput. Isumaqatigiissut paasineqassaaq, suliffeqarfiup aamma qanimut suleqatigisap akornanni kiffartuussinikkut paarlaasseqatiginerit suulluunniit, ilanngullugu ilaatigut aamma suliffeqarfiup pigisaanik nalilinnik tunisineq.

Nr. 3-mut

Aalajangersakkami pineqarput aningaasat tigoriaannaat imaluunniit pigisat nalillit allat suulluunniit, inummut imaluunniit inatsisitigut pisussaaffeqartumut pisinnaatitaasumullu agguagarsitisinerit imaluunniit tunniunneqartut, ilanngullugu siunnersuummi § 7, imm. 1, nr. 5, litra a-b malillugu aningaasaliisunut aningaasaliinernullu iluanaarutitut agguagarsiat. Ukiumit naatsorsuusiorfiusumit tamarmit tamanna pillugu paasissutissat ukiumut nalunaarusiamit takuneqarsinnaassapput.

Nr. 4-mut

Imm. 3, nr. 4-mi nalunaarusiornissamut piunasaqaammi siunertaavoq, Inatsisartut inatsisaanni § 7, imm.1, nr. 1, nr. 3 aamma nr. 4-mik suliffeqarfiup naammassinniinnarnissaata, aamma § 1, imm. 2, nr. 2, nr. 5 aamma nr. 6 malillugit naleqquttumik annertussuseqartumik paasissutissat tunniunneqartut nutarterisarnissaata allanngortitsisarnissaatalu qulakkeerneqarnissaa. Aalajangersakkat taaneqartut taakkunungalu nassuiaatit takukkit.

Aalajangersakkap atuunnerani, suliffeqarfik innuttaasunik ikiortarialinnik

suliffissaqartitsisutut nalunaarsorsimasoq, politikkinik suleriaatsinillu, suliffeqarfiup pisortanut attuumassuteqanngitsumik innuttaasunik ikiuinissamik siunertaqarnermik naammassinninneranik aammalu akuutitsisumik akisussaassusilimmillu aqunneqarneranik qulakkeerisussanik, nassuiaassasoq. Taaguut politikit nassuiarneqassaaq aamma atituumik atuutsinneqassalluni, taamaalilluni ilaatigut suliffeqarfiup malittarisassai, suliffiup iluani najoqqutassat, anguniakkat, periusissiat allallu uppernarsaatit suliffeqarfiup qanoq sulineranik allaaserinnittut pineqartunut ilaatinneqarlutik. Suliffeqarfiup tamatuma saniatigut politikkit iliuuserisanut qanoq piviusunngortinnerlugit, nassuiaassaaq. Assersuutigalugu aqutsisut nalunaarsuiffianik atulersitsinikkut, ingerlatanik suliaqarnikkut, siunnerfigineqartunik akuutitsinikkut, sinneqartoorutit iliuuseqarfiginerisigut imaluunniit suliffeqarfiup niuernikkut periusissiaani aamma niuernikkut ingerlataanni suleriaatsit allat atorlugit, tamanna pisinnaavoq. Suliffeqarfiup aamma siunissami sulinissamut pilersaarutit naatsorsuutigisallu paasissutissiissutigissavai.

Pisortanut attuumassuteqannginnissamut tunngatillugu, suliffeqarfiup nalunaarsuineri paasissutissat taamaallaat nutartertassavai, takuuk siunnersuummi § 1, imm. 2, nr. 5.

Imm. 4-mut

Suliffeqarfiup innuttaasunik ikiortarialinnik suliffissaqartitsisutut nalunaarsorsimasup iluanaarutit tunniunneqarnissaat toqqarpagu, taanna siunnersuummi imm. 4 malillugu Atuisartoqarnermut Unammilleqatigiinnermullu Aqutsisoqarfimmut naatsorsuineranik nassiussissaaq, tassani aningaasaatit aningaasaliissutaasimasut qanoq ernialersugaallutik iluanaarutit akilerneqartut aningaasaliisimasunut ataasiakkaanut naapertuunneri takuneqarsinnaassalluni. Aammattaaq ernialersuineq taanna naammaginartutut isigineqarsinnaasoq, sooq suliffeqarfik isumaqarnersoq aamma tunngavilersorneqassaaq.

Aalajangersagaq siunnersuummi § 7, imm. 1, nr. 5-imut aamma § 8-mut atatillugu nassuiarneqassaaq atuutsinneqassallunilu. Aalajangersakkat malillugit suliffeqarfimmik innuttaasunik ikiortarialinnik suliffissaqartitsisutut nalunaarsorsimasumik piginnittut, aningaasaliissutigineqaaqqaarsimasut ukiumut naammaginartumik erniamik tapilerlugit aningaasaliissutaqqaasimasunut naapertuuttunik, piffissami suliffeqarfimmik piginnittuunerminni agguagarsianik ataatsimoortunik taamaallaat tiguisinnaatitaapput. Aalajangersakkat taaneqartut aamma taakkununga oqaaseqaatit takukkit.

Taamatut naatsorsuisinnaanissamut suliffeqarfiup aningaasaliissuteqarsimasunut ataasiakkaanut makku suussusersissavai:

- 1) Aningaasat qassit aningaasaliissutigineqarsimanersut.
- 2) Iluanaarutitik tunniussineq ukiumut sorlermut tunngasuunersoq. Ukioq iluanaarutitik akiliiffioreersoq naatsorsuineri ilaatinneqassanngilaq.
- 3) Piffissami pineqartumi aningaasaatit naammaginartumik ernialersorneri. Ukiumut



ernialersuineq ukiumut ataatsimut aningaasaliinerup atuuffigisaanut, aningaasaliisumik iluanaarutininik akiliiffiusimannngitsumut naatsorsorneqassaaq. Taamaalilluni siunissami piffissaq aningaasaliiffiusoq imaluunniit piffissaq iluanaarutininik akiliiffioreersoq aningaasaliiffiusoq ilanngullugu naatsorsorneqassanngilaq.

Nassiussinerup kingorna ernialersuineq pineqartoq naammaginaruunersoq, suliffeqarfiup tamanna pillugu tunngavilersuutaa tunuliaqutaralugu, Atuisartoqarnermut Unammilleqatigiinnermullu Aqutsisoqarfik naliliissaaq.

Suliffeqarfiup siunnersuummi § 7, imm. 1, nr. 5-imi piumasagaatinik naammassinninneranik, aamma paasissutissanik suliffeqarfiup nalunaarsuinermit tunniussimasaannik nutarterisarnissaanik, takuuk siunnersuummi § 1, imm. 2, nr. 7, qulakkeerinnissaq, aalajangersakkami ilaatigut siunertaavoq.

*Imm. 5-imut*

Suliffeqarfiit innuttaasunik ikiortarialinnik suliffissaqartitsisutut nalunaarsorsimasut paasissutissanik assigiinnik arlaleriarlutik nalunaaruteqartannnginnissaat siunnersuummi nr. 5-ip qulakkeerneqassaaq. Paasissutissat siunnersuummi imm. 3-mi allassimasut suliffeqarfiup ukiumut nalunaarusiaanit takuneqarsinnaappata, suliffeqarfik paasissutissanut pineqartunut nalunaaruteqarnissaq pillugu piumasagaammik naammassinnittutut isigineqassaaq. Suliffeqarfik taamaalilluni ukiumut nalunaarusiap saniatigut paasissutissat taaneqartut pillugit immikkut nalunaarusiussanngilaq.

*Imm. 3 malillugu nalunaarusiorneq ukiumut nalunaarusiami aqutsisut nalunaarutaanniitineqarpat, takuuk imm. 5, aamma suliffeqarfik ukiumut naatsorsuutit pillugit inatsimmi maleruagassat malillugit kukkunerisiorneqarnissamut pisussaaffeqartinneqarpat, ukiumut naatsorsuutit pillugit inatsisip Kalaallit Nunaannut atutilersinneqarnera pillugu peqqussummut nalunaarummi kingusinnerusukkut allanngortinneqartumi tamanna pillugu aalajangersakkat malillugit aqutsisut nalunaarutaannut tunngatillugu kukkunerisuiisup oqaaseqaataanut nassuiaat ilaatinneqassaaq. Ukiumut naatsorsuutininik immaqalu suliffeqarfissuup naatsorsuutaanik kukkunerisuiinermit atatillugu aqutsisut nalunaarutaanni paasissutissat ukiumut naatsorsuutini immaqalu suliffeqarfissuup naatsorsuutaani paasissutissanut naapertuunnersut, kukkunerisuiisup misissortussaavai. Kukkunerisuiisooq tamanna pillugu oqaaseqaateqassaaq.*

#### *§ 14-imut*

Aalajangersakkami allassimavoq suliffeqarfiup innuttaasunik ikiortarialinnik suliffissaqartitsisutut nalunaarsorsimasup ukiumut nalunaarusiaa aamma aalajangersakkami imm. 1-5 malillugit allatigut nalunaarusiaa suliffeqarfittut innuttaasunik ikiortarialinnik

suliffissaqartitsisutut nalunaarsuiffimi, takuuk kapitali 4, nalunaarsorneqassasoq.

Aalajangersakkap malitsigisaanik suliffeqarfiit innuttaasunik ikiortarialinnik suliffissaqartitsisutut nalunaarsorsimasut taakkunanilu qitiusumik aqutsisuni oqartussat, suliffeqarfiup ukiumut nalunaarusiaanik aamma aalajangersagaq malillugu allatigut nalunaarusiamik, suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi, takuuk siunnersuummi kapitali 4, nalunaarsuinissamut pisussaaffeqarput.

#### *§ 15-imut*

Aalajangersagaq, suliffeqarfinmi innuttaasunik ikiortarialinnik suliffissaqartitsisutut nalunaarsorsimasumi qitiusumik aqutsisutut oqartussat akissarsianik tunniussinermut tunngatillugu pisussaaffeqarnernut, tunngassuteqarpoq.

Taaguut “qitiusumik aqutsinermi oqartussat”, ingerlatseqatigiiffiit pillugit inatsisip Kalaallit Nunaannut atuutilersinneqarnera pillugu peqqussummi kingusinnerusukkut allanngortinneqartumi § 5, imm. 1, nr. 4-mut naapertuuttumik nalinginnaasumik paasineqassaaq. Qitiusumik aqutsinermi oqartussat tassaapput suliffeqarfinni pisortaaneqartuni siulersuisoqartunilu siulersuisut. Suliffeqarfiit taamaallaat pisortaaneqarfeqartut qitiusumik aqutsinermi oqartussat tassaapput pisortaaneqarfik. Suliffeqarfinni pisortaaneqarfeqartuni nakkutilliisoqartunilu qitiusumik aqutsinermi oqartussat aamma pisortaanerupput.

Isumannaatsumik aqutsinissamik aamma aqutsisunut sulisutullu atorfeqartunut allanut akissarsisitsinermi suliffeqarfiup aningaasaataanik aqutsinermik qulakkeerinissamik, qitiusumik aqutsinermi oqartussat pisussaaffeqarput. Siunnersuut malillugu akissarsiarititassanik tunniussinermi, atorfiup suunera suliallu annertussusaa malillugu nalinginnaasutut isigineqartut aningaasat qaangissanngilaat, aamma suliffeqarfiup innuttaasunik ikiuiniarnermik siunertaanut tunngatillugu illersorneqarsinnaasutut isigineqartut malillugit, aningaasartai nalinginnaasutut isigineqartunit annertuneroqqusaanngillat. Pisuni ataasiakkaani pissutsinik attuumassuteqartunik tamaginnik ataasiakkaatigut naliliineq malillugu allanneqartut aalajangiiffigineqartariaqarput.

Akissarsiat atorfiup suunera annertussusaalu malillugit nalinginnaanersut pillugu naliliinermi, suliffeqarfinni sanilliunneqarsinnaasuni suliassanut taamaaqataannut akiliutitut aningaasat suut akilerneqartarnersut, ilaatigut pingaartinneqassaaq. Tamatuma saniatigut suliffeqarfiup innuttaasunik ikiortarialinnik suliffissaqartitsisutut nalunaarsorsimasup innuttaasunik ikiuiniarnermik siunertaa, akissarsiat illersorneqarsinnaasutut isigineqarsinnaanersut naliliinermi, isiginiarneqassaaq. Tamatumunnga pissutaavoq, suliffeqarfiup innuttaasunik ikiuiniarnermik siunertaanut naapertuuttumik atorfinitsitsinermi politikimik

ingerlatsinissamik aqutsisut pisussaaffeqarnerat.

Qitiusumik aqutsinermi oqartussat akissarsititsinerit tamarmik siunnersuut naapertorlugu pinissaannut akisussaasuupput. Peqatigiiffinni aningaasaateqarfinnilu assersuutigalugu siulersuisut akissarsianut nalinginnaasumik akisussaasuusarput.

Siunnersuummi § 5, imm. 2 malillugu, suliffeqarfiup siunnersuummi §§ 6-8-imi piumasaqaatit naammassisimangippagit, suliffeqarfiup innuttaasunik ikiortarialinnik suliffissaqartitsisutut nalunaarsorsimasutut akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangisussaavoq.

Suliffeqarfiup siunnersuummi § 15 imaluunniit siunnersuummi piumasaqaatit allat suliffeqarfiup naammassisimangikkai aqutsisoqarfimmit ilisimaneqalerpat, pissutsinik suliffeqarfik iluarsisassaq suliffeqarfimmi innuttaasunik ikiortarialinnik suliffissaqartitsisutut nalunaarsugaasumi qitiusumik aqutsinermi oqartussanut, siunnersuummi § 20, imm. 1 malillugu Atuisartoqarnermut Unammilleqatigiinnermullu Aqutsisoqarfik peqqusisinnaavoq.

#### *§ 16-imut*

Imm. 1-imut

Suliffeqarfiup atorunnaarsinnerani sinneqartoorutit atorneqarnissaannut suliffeqarfiup innuttaasunik ikiortarialinnik suliffissaqartitsisutut nalunaarsorsimasup pisussaaffeqarneranut, aalajangersagaq tunngassuteqarpoq.

Siunnersuummi § 16-imi siunertaavoq, siunnersuummi § 7, imm. 1, nr. 5-ip avaqqunnissaanut periarfissat killeqartinnissaat.

Siunnersuummi § 16, imm. 1-imi allassimavoq, suliffeqarfiup innuttaasunik ikiortarialinnik suliffissaqartitsisutut nalunaarsorsimasup atorunnaarsitsinermi sinneqartoorutaasimasinnaasut siunnersuummi § 7, imm. 1, nr. 5-imut naapertuuttumik atussagai.

Sinneqartoorutaasimasinnaasut taamaalillutik suliffeqarfiup atorunnaarsinnerani makkua arlaat ataaseq arlallilluunniit periaaserlugit atorneqassapput:

- 1) Suliffeqarfinni innuttaasunik ikiortarialinnik suliffissaqartitsisutut nalunaarsorsimasuni allani aningaasaliineq imaluunniit tunissuteqarneq
- 2) Nalinginnarmik iluaqutaasussanik imaluunniit nalinginnarmik ajunngitsuliornermik siunertaqartunut suliniaqatigiiffinnut tunissutit
- 3) Suliffeqarfimmi piginnittut akornanni iluanaarutinik killeqartumik tunniussineq allatigulluunniit sinneqartoorutinik avitseqatigiinneq.

Aamma siunnersuummi § 7, imm. 1, nr. 5-imi tassungalu nassuiaatit takukkit.

Imm. 2-mut

Aalajangersagaq siunnersuummi § 7, imm. 1, nr. 5-imut aamma § 8-mut tassungalu nassuiaatinut atatillugu isigineqassaaq.

Siunnersuummi imm. 2-mi suliffeqarfiup innuttaasunik ikiortarialinnik suliffissaqartitsisutut nalunaarsorsimasup aningaasaataasa atorneqarnissaannut tunngatillugu aningaasaatit appartinnissaat ilaatilerlugu, killiliineq annertusineqarpoq. Suliffeqarfiup innuttaasunik ikiortarialinnik suliffissaqartitsisutut nalunaarsorsimasup taamaalilluni, aningaasaatinik appartitsinermi agguagarsisitsinerup killiliussat § 7, imm. 1, nr. 5-imi aalajangersarneqartut iluaniitsinnissaat, qulakkiissavaa.

Siunnersuummi § 25, imm. 1, nr. 5 malillugu § 16, imm. 1-istik aamma imm. 2-mik unioqutitsineq akiliisitsinermik pineqaatissiivigineqarsinnaavoq.

Siunnersuummi § 16, imm. 1 aamma 2 inatsisini allani aningaasaatinik appartitsinermut atuuttunut malittarisassanut atuutereersunut, aamma inatsisini allani aningaasaatinik appartitsineq pillugu malittarisassanut allanut sukkulluunniit atuuttunut tapertaassaaq, taamaalillutillu aningaasaatinik appartitsinermut atatillugu aamma malinneqartussaallutik.

Imm. 3-mut

Aalajangersakkami allassimavoq, aningaasaatit appartinneqarneranni inatsisini allani aningaasaatit pillugit maleruagassat sukkulluunniit atuuttut naammassineqarsimassasut.

Imm. 4-imut

Suliffeqarfiup innuttaasunik ikiortarialinnik suliffissaqartitsisutut nalunaarsorsimajunnaarnerata kingorna siunnersuummi § 7, imm. 1, nr. 5 aamma § 8 naapertorlugu suliffeqarfiup nalunaarsorsimanerata nalaani isertitaasimasunik sinneqartoorutininik atuinissamut pisussaaffeqarneq, aalajangersakkami aalajangersarneqarpoq. Siunnersuummi § 16, imm. 4 suliffeqarfiup sinneqartoorutininik innuttaasunik ikiuiniarnermik isumaginninnissamut pisussaaffeqarnera aamma § 10 malillugu suliffeqarfiup nalunaarsorsimajunnaarnerata kingorna atuuttussanngorlugu annertusitinneqarpoq.

Pisussaaffeqarneq suliffeqarfiup suli nalunaarsorsimanerata nalaani suliffeqarfiup isertitarisimasaanit sinneqartoorutit ilaannut atuuppoq. Suliffeqarfiup nalunaarsorsimajunnaarnerata kingorna isertitaanit suliffeqarfiup sinneqartoorutaannut, siunnersuummi § 7, imm. 1, nr. 5 malillugu suliffeqarfik pisussaaffeqanngilaq.

Siunnersuummi § 7, imm. 1, nr. 5 malillugu sinneqartoorutininik innuttaasunik ikiuiniarnermik isumaginninnissamat suliffeqarfiup pisussaaffeqarnera, suliffeqarfiup suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaarnerata kingorna, aamma suliffeqarfiup nalunaarsorsimanerata nalaani isertinneqartunit sinneqartoorutit ilaannut atuuppoq.

Aalajangersakkami siunertaavoq, suliffeqarfiup nalunaarsorsimajunnaaginnarluni tamatumalu kinguninnguaq suliffeqarfiup piginnittuinut iluanaarutininik tunniussiinnannginnissaanik qulakkeerinnissaq. Aalajangersakkami taamaalilluni, sinneqartoorutit innuttaasunik ikiuiniarnermut iliuuseqarnissaq pillugu siunnersuummi maleruagassanik avaqqutsisoqannnginnissaa, qulakkeerneqarpoq.

Imm. 1 aamma 2 assigalugit suliffeqarfiup § 16, imm. 4-mik unioqquutitsinera akiliisitsinermik pineqaatissiivigineqarsinnaavoq, takuuk § 25, imm. 1, nr. 6.

#### *§ 17-imut*

##### *Imm. 1-imut*

Aalajangersakkamiippoq siunnersuut malillugu suliffeqarfiit suliffeqarfittut innuttaasunik ikiortarialinnik suliffissaqartitsisutut nalunaarsorneqartarnerannut atugassamik Naalakkersuisunut nammineerlutik nalunaarsuinermit nalunaarsuiffimmik pilersitsinissaannut ingerlatsinissaanullu inatsimmi tunngavissaq.

Aalajangersagaq ilaatigut § 18-imi aalajangersagaq peqatigitillugu nassuiarneqarlunilu atorneqassaaq, tassaniilluni nalunaarsuiffimmik tassungalu atasunik pissutsinik attuumassuteqartunik tamanik pilersitsineq ingerlatsinerlu pillugu aalajangersakkanik erseqqinnerusunik Naalakkersuisut aalajangersaanissaannut tunngavissaq.

Siunnersuut malillugu suliffeqarfiit nalunaarsorneqarnerannut atugassamik nalunaarsuinermit nalunaarsuiffimmik Naalakkersuisut nammineq pilersitsiniarlutik ingerlatsiniarlutillu toqqarpassuk, tamanna assersuutigalugu taamatut nalunaarsuinermit nalunaarsuiffimik pilersitsineq ingerlatsinerlu naalakkersuisoqarfimmut imaluunniit Naalakkersuisuni oqartussatut immikkoortortamut allanut Naalakkersuisunit isumagisassanngortinneqarluni, tamanna suliaqarnermit pisinnaavoq.

##### *Imm. 2-mut*

Aalajangersagaq malillugu, imm. 1-imi taaneqartut Naalakkersuisut sullillugit oqartussap imaluunniit suliffeqarfiup nalunaarsuiffimmik pilersitsinissaa ingerlatsinissaalu pillugu Kalaallit Nunaanni imaluunniit Danmarkimi pisortani oqartussat imaluunniit pisortat suliffeqarfiutaata isumaqatigiissuteqarnissaannut Naalakkersuisunut inatsimmi

tunngavissaliisoqarpoq. Aamma isumaqatigiissut malillugu Naalakkersuisut sullillugit nalunaarsuiffimmik taamaattumik oqartussat suliffeqarfilluunniit taamaallaat pilersitsisinnaallunilu imaluunniit ingerlatsisinnaavoq.

Imm. 1-imi taaneqartutut nalunaarsuiffimmik Atuisartoqarnermut Unammilleqatigiinnermullu Aqutsisoqarfik pilersitsissasoq ingerlatsissasorlu imaluunniit Naalakkersuisunit pilersinneqartumik nalunaarsuiffimmik taamaattumik Atuisartoqarnermut Unammilleqatigiinnermullu Aqutsisoqarfik ingerlatsissasoq, Naalakkersuisut assersuutigalugu Atuisartoqarnermut Unammilleqatigiinnermullu Aqutsisoqarfimmut isumaqatigiissuteqarsinnaapput.

Aalajangersagaq ilaatigut § 18-imi aalajangersakkamut peqatigitillugu paasineqarlunilu atorpeqassaaq, taanna tamatumunnga atatillugu nalunaarsuiffimmik pissutsinillu tamanit attuumassuteqartunik pilersitsinissaq ingerlatsinissarlu pillugit ersarinnerusumik aalajangersaanissamut Naalakkersuisunut piginnaatitsinermik imaqarpoq.

Imm. 2 malillugu nalunaarsuiffimmik pilersitsineq ingerlatsinerlu oqartussanut allanut suliffeqarfimmulluunniit Naalakkersuisunit isumagisassanngortinneqarsinnaavoq. Imm. 1 malillugu Naalakkersuisut nalunaarsuiffimmik pilersitsisimappata, imm. 2 malillugu nalunaarsuiffiup ingerlanneqarnera oqartussanut suliffeqarfimmulluunniit allanut Naalakkersuisunit isumagisassanngortinneqarsinnaavoq.

Imm. 3-mut

Siunnersuut malillugu suliffeqarfiit innuttaasunik ikiortarialinnik suliffissaqartitsisutut suliffeqarfiit nalunaarsornerinut atugassamik oqartussat suliffeqarfiullu nalunaarsuiffiata atorpeqarnissaa pillugu Kalaallit Nunaanni Danmarkimiluunniit pisortani oqartussanik imaluunniit pisortat suliffeqarfiutaannik isumaqatigiissuteqarnissamut Naalakkersuisut inatsimmi tunngavissinneqarput.

Aalajangersagaq ilaatigut imm.1-imut aamma 2-mut ataqatigiissillugu isigineqassaaq. Periarfissaq alla taamaalilluni tassaavoq, siunnersuut malillugu suliffeqarfiit innuttaasunik ikiortarialinnik suliffissaqartitsisutut nalunaarsorneqarnerannut atugassamik oqartussat suliffeqarfiullu nalunaarsuiffiannik pioreersumik atuinissaat pillugu Kalaallit Nunaanni Danmarkimiluunniit pisortani oqartussanik imaluunniit pisortat suliffeqarfiutaannik Naalakkersuisut isumaqatigiissuteqarsinnaanerat. Taamaattoq taanna aamma nalunaarsuiffiusinnaavoq nutaaq.

Piginnaatitsissut aamma IT atorlugu nalunaarsuiffimmik toqqaanissamut tunngatillugu eqaatsumik periarfissiivoq, aammalu assersuutigalugu taanna tulluartutut isigineqarpat, Inuussutissarsiornermut Aqutsisoqarfiup IT atorlugu nalunaarsuiffiata atorpeqarnissaa

periarfissaalluni. Siunnersuut malillugu suliffeqarfiit innuttaasunik ikiortarialinnik suliffissaqartitsisutut nalunaarsorneqarnerinut atatillugu assersuutigalugu Danmarkimi CVR-nut nalunaarsuiffiup imaluunniit nalunaarsuiffiup allap atorneqarnissaa pillugu, aalajangersagaq malillugu Danmarkimi Inuussutissarsiornermut Aqutsisoqarfimmik Naalakkersuisut isumaqatigiissuteqarsinnaapput. Taamaaliornikkut suliffeqarfiup innuttaasunik ikiortarialinnik suliffissaqartitsisutut nalunaarsorneqarnera, CVR normutaarniarluni nalunaarsuiffimmi tassani pisinnaassaaq. Suliffeqarfik taamaalilluni sumiiffimmi ataasiinnarmi nalunaarsorneqassaaq, suliassaqarfimmilu Inuussutissarsiornermut Aqutsisoqarfiup ilisimasai misilittagaalu atorluarneqassallutik.

Aalajangersagaq ilaatigut § 18-imi aalajangersakkamut peqatigitillugu paasineqarlunilu atorneqassaaq, taanna tamatumunnga atatillugu nalunaarsuiffimmik pissutsinillu tamanit attuumassuteqartunik pilersitsinissaq ingerlatsinissarlu pillugit ersarinnerusumik aalajangersaanissamut Naalakkersuisunut piginnaatitsinermik imaqarpoq.

#### *§ 18-imut*

Aalajangersagaq siunnersuummi § 17, imm.1-3 malillugu nalunaarsuiffimmik tassungalu atasunik pissutsinik attuumassuteqartunik tamanik pilersitsinissaq ingerlatsinissarlu pillugit aalajangersakkanik erseqqinnerusunik Naalakkersuisut aalajangersaanissaannut nalinginnaasumik piginnaatitsissummik imaqarpoq. Naalakkersuisut ilaatigut siunnersuummi § 18, nr. 1-8-imi pissutsit eqqaaneqartut pillugit aalajangersakkanik erseqqinnerusunik aalajangersaasinnaapput. Taagorneqartut tamakkiisuunngillat. Naalakkersuisut taamaalillutik siunnersuummi § 17, imm. 1-3 malillugit nalunaarsuiffimmik pilersitsinermut ingerlatsinermullu tunngasunik aalajangersakkanik allanik aamma aalajangersaasinnaapput.

Nalunaarsuinermit aaqjissuussinermik allaffissornikkut aqutsineq pillugu aalajangersakkanik Naalakkersuisut aalajangersaasinnaatinnissaannut aalajangersagaq nalinginnaasumik siunertaqarpoq. Aalajangersakkat taamaattut nalunaarutini aalajangersarneqarsinnaapput. Tamanna assersuutigalugu tassaasinnaavoq inatsit taanna malillugu sumi nalunaarsuisoqassanersoq, pissutsit suut suliffeqarfiup nammineq nalunaarsussanerai, kiisalu paasissutissat uppernarsaatillu suut tamanut saqqummiunneqassanersut pillugit aalajangersakkat.

#### *Nr. 1-imut*

Nalunaarsuiffimmik pilersitsineq ingerlatsinerlu pillugu aalajangersakkanik erseqqinnerusunik Naalakkersuisut ilaatigut aalajangersaasinnaapput. Aalajangersagaq ilaatigut siunnersuummi § 17, imm. 1-3-mut, nalunaarsuiffimmik pilersitsinissamut ingerlatsinissamullu periarfissanut assigiinngitsunut tunngasumut, ilanngullugit Kalaallit Nunaanni imaluunniit Danmarkimi nalunaarsuiffimmik pioreersumik atuisinnaaneq,

ataqatigiissillugu isigineqassaaq.

Nr. 2-mut

Nalunaarsuiffimmut periarfissaqarneq atuinnissarlugu Naalackersuisut aalajangersakkanik aalajangersaasinnaapput, ilanngullugu suliffeqarfiit inuillu siunnersuummi pineqartunut ilaasut qanoq nalunaarsuiffimmut isersinnaanersut atuisanersullu.

Naalackersuisut assersuutigalugu Naalackersuisuni oqartussatut immikkoortumiit imaluunniit Atuisartoqarnermut Unammilleqatigiinnermullu Aqutsisoqarfimmiit tamanna pillugu emailkkut paasissutissanut uppersaatinullu assigiinngitsunut suliffeqarfiit inuillu siunnersuummi pineqartunut ilaasut taamaalillutik isersinnaassapput.

Suliffeqarfiit inuillu siunnersuummi pineqartunut ilaasut taamaalillutik Naalackersuisuni oqartussatut immikkoortumiit imaluunniit Atuisartoqarnermut Unammilleqatigiinnermullu Aqutsisoqarfimmiit tamanna pillugu emailkkut qinnuiginnillutik paasissutissanut uppersaatinullu assigiinngitsunut isersinnaalissapput. Taakku assersuutigalugu tassaasinnaapput suliffeqarfittut innuttaasunik ikiortarialinnik suliffissaqartitsisutut nalunaarsorsimasutut akuerineqarneq pillugu paasissutissat, suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaarneq, ukiumut nalunaarusiamik nalunaarsuineq aamma nalunaarusianik paasissutissanillu allanik nalunaarsuineq, tamanna pillugu Naalackersuisut aalajangersakkanik aalajangersaasimappata.

Nittartakkami atuisunngortinneqarnikkut aamma nittartakkami atuisutut ateq atorlugu isernikkut siunnersuummi pineqartunut ilaasut suliffeqarfiit inuillu nalunaarsuiffimmut periarfissaqarnerat atuinnissaallu pillugit Naalackersuisut aamma aalajangersakkanik aalajangersaasinnaapput. Suliffeqarfiit inuillu siunnersuummi pineqartunut ilaasut nittartakkami isernerinut atatillugu isumannaallisaanikkut suleriaatsit pillugit ilaatigut aalajangersakkanik Naalackersuisut aalajangersaasinnaapput. Tamanna assersuutigalugu pisinnaavoq NemID-ip assigisaaluunniit atsiornermik elektroniskimik ilisarinissaannut aaqqissuussinerup atorneratigut.

Suliffeqarfiit inuillu siunnersuummi pineqartunut ilaasut nittartakkami aaqqissuussineq paasissutissanut uppersaatinullu assigiinngitsunut qanoq atuisinnaanerat pillugu Naalackersuisut aamma aalajangersaasinnaapput. Taakku assersuutigalugu tassaasinnaapput suliffeqarfittut innuttaasunik ikiortarialinnik suliffissaqartitsisutut nalunaarsorsimasutut akuerineqarneq pillugu paasissutissat, suliffeqarfittut innuttaasunik ikiortarialinnik suliffissaqartitsisutut nalunaarsorsimajunnaarneq, ukiumut nalunaarusiamik nalunaarsuineq aamma nalunaarusianik paasissutissanillu allanik nalunaarsuineq, tamanna pillugu Naalackersuisut aalajangersakkanik aalajangersaasimappata.



Imm. 3-mut

Siunnersuummi § 18, imm. 3-mi siunertaavoq, siunnersuummi §§ 10 aamma 12, imm. 2 malillugit suliffeqarfik qaqugu qanorlu nalunaarsussanersoq nalunaarsorsimajunnaassanersorlu pillugu malittarisassanik aalajangersaanissamut Naalakkersuisut piginnaatinneqarnissaat. Tamanna aamma siunnersuummi § 13 malillugu nalunaarusiornermut, suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi nalunaarsorneqartussanut, takuuk siunnersuummi § 14, atuuppoq. Siunertaavoq suliffeqarfiit paasissutissanik pisariaqartunik sapinngisamik nammagassiinngitsumik piniarsinnaalersillugit, nalunaarsuiffimik aaqqissuussisoqarnissaa. Nalunaarutiginninnermi nalunaarusiorfissanik assigiissaakkanik imaluunniit immersugassanik maligassiiviusunik suliaqarnikkut tamanna assersuutigalugu pisinnaavoq, taakkunani marluusuni suliffeqarfiup paasissutissanik pisariaqartunik tunniussinissaa qulakkeerneqassalluni. Siunertaavoq suliffeqarfiit IT atorlugu nalunaarsuiffimmi nalunaarsortarnissaat, takuuk 13, tassani aamma taakkua paasissutissat siunnersuummi § 14 malillugu nalunaarutigineqartussat aamma tunniussinnaassallugit. Tamatuma kingorna suliffeqarfiit Inatsisartut inatsisaanni piumasaqaatinik naammassinninnerannik qulakkeerisunik, paasissutissanik tunniunneqartunut tunngatillugu Atuisartoqarnermut Unammilleqatigiinnermullu Aqutsisoqarfik misissugassanik tiguisarluni misissuisinnaavoq.

Nr. 4-mut

Siunnersuut malillugu nalunaarusiortarneq pillugu aalajangersakkanik Naalakkersuisut aalajangersaasinnaapput. Aalajangersagaq ilaatigut siunnersuummi § 13-imut, § 20, imm. 4-mut aamma § 22-mut ataqatigiissillugu isigineqassaaq.

Siunnersuummi § 13, imm. 2 malillugu suliffeqarfiit innuttaasunik ikiortarialinnik suliffissaqartitsisutut nalunaarsorsimasut ukiut tamaasa ukiumut nalunaarusiamik Atuisartoqarnermut Unammilleqatigiinnermullu Aqutsisoqarfimmut nassiussisassapput, takuuk siunnersuummi § 13, imm. 1. Siunnersuummi § 13, imm. 3 malillugu suliffeqarfiit innuttaasunik ikiortarialinnik suliffissaqartitsisut ukiumut nalunaarusiamik nassiussinermut atatillugu, tamanna Atuisartoqarnermut Unammilleqatigiinnermullu Aqutsisoqarfimmit pisariaqartutut isigineqarpat, pissutsit siunnersuummi § 13, imm. 3, nr. 1-4-mi taaneqartut pillugit Atuisartoqarnermut Unammilleqatigiinnermullu Aqutsisoqarfimmut nalunaaruteqassapput. Takukkit siunnersuummi § 13 tassungalu nassuiaatit.

§ 18, nr. 4-imi aalajangersagaq, nalunaarusiorneq pillugu aalajangersakkanik erseqqinnerusunik Naalakkersuisut aalajangersaanissaannut nalinginnaasumik inatsimmi tunngavissamik imaqqarpoq. Assersuutigalugu ilusai, akulikissusissai imarisaalu pillugit malittarisassanik erseqqinnerusunik aalajangersaasoqarsinnaavoq. Tamatuma saniatigut assersuutigalugu nalunaarusiornermut angusallu pillugit isertuussinissaq pillugu malittarisassanik erseqqinnerusunik aalajangersaasoqarsinnaavoq. Taamatut

aalajangersaanerit ilaatigut nalunaarutini Naalakkersuisunit aalajangersarneqarsinnaapput.

#### Nr. 5-imut

Aalajangersagaq IT atorlugu periaatsinik aalajangersimasunik, immikkut digitalikkut angissutsinik, digitalikkut atsiornernik atuineq aamma siunnersuut malillugu nalunaarsuinermi, nalunaarsugaajunnaarnermi nalunaaruteqarnermilu ilutsinik imarisaanullu piumasagaatit allat pillugit aalajangersakkanik Naalakkersuisut aalajangersakkanik aalajangersaanissaannut inatsimmi tunngavissiivoq.

Aalajangersakkami siunertaavoq eqaatsumik maleruagassiinissamik qulakkeerinissaq, ilanngullugu ilaatigut IT atorlugu periaatsimik toqqaanissamut tunngatillugu, aammalu assersuutigalugu taanna tulluurtutut isigineqarpat, Inuusutissarsiornermut Aqutsisoqarfiup IT atorlugu periaasiata atorneqarnissaa periarfissiissutigineqarsinnaalluni.

#### Nr. 6-imut

Paasissutissat nalunaarsuiffimmiittut pillugit aamma paasissutissat qanoq annertutigisumik tamanut saqqummiunneqartarnissaat pillugu aalajangersakkanik Naalakkersuisut aalajangersaasinnaapput. Uppernarsaatinik tamanut saqqummiussineq pillugu siunnersuummi nr. 6-imi piginnaatitsissut siunnersuutigineqartoq assersuutigalugu innuttaasunik ikiuiniarnermik siunertanut tunngasunik malittarisassani allannguinerit suliffeqarfimmit namminermik tamanut saqqummiunneqarnissai imaluunniit nammineq nalunaarsuiffinni, nalunaarsuiffiit taakkununga ineriartortinneqarsimappata, siunnersuummi § 13 malillugu nalunaaruteqarnissaq pillugu malittarisassanik aalajangersaanermit atorneqarsinnaavoq.

Nr. 6-imi siunertat ilaat tassaavoq, suliffeqarfinni innuttaasunik ikiortarialinnik suliffissaqartitsisutut nalunaarsorsimasuni ersarissuutitsisinnaanissamut iluaqusiinissaq. Paasissutissat suliffeqarfiup tunniussai aamma nalunaarsorneqartut tamanut saqqummiunneqartarneri pillugu aalajangersakkanik aalajangersaasoqarneratigut, tamanna pisinnaavoq. Suliffeqarfiup innuttaasunik ikiuiniarnermik siunertaata kiisalu paasissutissat § 13 malillugu suliffeqarfiup nalunaarutigisassaasa tamanit pissarsiarineqarsinnaasuunissaat siunertaavoq.

#### Nr. 7-imut

Siunnersuut malillugu nalunaarsuinermit, nalunaarsorsimajunnaarnermit nalunaaruteqarnermullu akisussaasuuneq pillugu aalajangersakkanik Naalakkersuisut aalajangersaasinnaapput, ilanngullugit ilaatigut nalunaarsuinerup, nalunaarsorsimajunnaarnerup isumaginissaanut peqqissaartumik piginnaatitsinermit aamma tassunga atatillugu uppernarsaatit nassiunneqartut atuuttuunissai eqqarsaatigalugit.

Aalajangersagaq qitiusumik aqutsinermi oqartussat pisussaaffiinut tunngasumut § 12-mut ataqatigiissillugu atorneqarlunilu nassuiarneqassaaq. § 12-mi aalajangersagaq malillugu

oqartussanut paasissutissanik tunniussisoqarnerani aamma siunnersuut malillugu pissutsinut tunngasunik paasissutissat nalunaarsornerini paasissutissanik eqqortunik naammattunillu suliffeqarfiup tunniussineranut qitiusumik aqutsinermut oqartussat akisussaasuupput. Akisussaannermut ilaatigut ilaatinneqarput suliffeqarfittut innuttaasunik ikiortarialinnik suliffissaqartitsisutut nalunaarsorneqarnissamut akuerineqarnissamik qinnuteqarnermi, suliffeqarfinnut innuttaasunik ikiortarialinnik suliffissaqartitsisunut nalunaarsuiffimmi suliffeqarfittut innuttaasunik ikiortarialinnik suliffissaqartitsisutut nammineq nalunaarsortinnermi, pissutsit siunnersuummut ilaasut pillugit oqartussanut nalunaaruteqarnermi aamma pisortat suliffeqarfimmik nakkutilliinerani aamma siunnersuummut ilaasunik pissutsit ingerlatallu pilugit paasissutissanik tunniussinermi suliffeqarfiup paasissutissanik tunniussinera. Takukkit siunnersuummi § 12 tassungalu nassuiaatit.

Siunnersuummi § 18, nr. 7-imi ilaatigut qinnuteqarnermi, nalunaarsuinermi kingusinnerusukkullu nalunaarusiornermi paasissutissat nalunaarutigineqartut eqqortuunerisa qulakkeerneqarnissaannut qitiusumik aqutsinermut oqartussat immikkut pisussaaffeqarnerat, aamma siunnersuut malillugu nalunaarsuinermik, nalunaarsugaajunnaarnermik imaluunniit paasissutissanik nalunaaruteqarnermik tunniussinermillu qitiusumik aqutsinermi oqartussanit taakku isumaginissaannut inummik piginnaatitaasutut akisussaasumut tamanna pingaaruteqanngitsoq pillugu maleruagassanik aalajangersaanissamut Naalakkersuisut piginnaatinneqarput.

Siunnersuummi § 18, nr. 7-mi piginnaatitsissummut siunertaasoq ilaatigut tassaavoq, paasissutissat siunnersuut malillugu Atuisartoqarnermut Unammilleqatigiinnermullu Aqutsisoqarfiup sulianik suliarinninneranut aalajangiineranullu atugassat eqqortuunerinut iluaqusiinissamik periarfissiinissaq.

Nr. 8-mut

Suliffeqarfiit inuillu nalunaarsuiffimmut isersinnaanermut atuisinnaanermullu atatillugu aningaasartuutitik akiliinissaq pillugu aalajangersakkanik aalajangersaanissamut aalajangersagaq Naalakkersuisunut tunngavissiivoq.

Assersuutigalugu, ilaatigut nalunaarsuinermit aamma IT atorlugu periaatsimik atuinermut aningaasartuutitik imaluunniit akiliutitik akiliinernik utertitsisoqarnissaa pillugu aalajangersakkanik Naalakkersuisut aalajangersaasinnaapput. Utertitsilluni akiliinerit akiliutillu nalunaarsuinermi ilaalu ilanngullugit aningaasartuutitut nalinginnaasunik annerpaamik matussusiinnaassapput.

Assersuutigalugu, kingusinaartumik akiliinermi aamma kingusinaartumik akiliinermut atatillugu ernianik akiliinermi allakkanik akileeqqusissutitik nassiussineq pillugu

Naalakkersuisut aalajangersakkanik aalajangersaasinnaapput. Ernianik akiliineq kingusinaarluni akiliinermi erniat pillugit Kalaallit Nunaanni inatsisinut sukkulluunniit atuuttunut naapertuutissapput.

### *§ 19-imut*

#### **Imm. 1-imut**

Aalajangersakkami siunertaavoq, attaveqaqatigiinnerit uppersaatinillu paarlaasseqaqatigiinnerit siunnersuummi pineqartunut ilaasut maleruagassiivigineqarnissaat.

Piginnaatitsinerit ilaatigut kingunerisaannik, siunnersuut malillugu digitalikkut attaveqaqatigiinneq pillugu malittarisassat erseqqinnerusut, teknikikkut aaqqiissutissat inissitsinneqartarneri ilutigalugu, piviusunngortinneqarsinnaapput.

Siunnersuummi § 19, imm. 1-imi, allakkatigut allaganngorlugu attaveqaqatigiinnerup siunnersuummi pineqartunut ilaasup, tamatumunnga taarsiullugu digitalikkut ingerlanneqarnissaa pillugu aalajangersakkanik Naalakkersuisut aalajangersaanissaannut inatsimmi tunngavissiiisoqarpoq.

Siunnersuutip atuutilernerani ilaatigut nalunaarsuinnermut imaluunniit nalunaarusiornermut tunngasunik Atuisartoqarnermut Unammilleqaqatigiinnermullu Aqutsisoqarfimmut allakkatigut saaffiginnissutit, digitalikkut pisussanngorlugu aalajangerneqartumit allaanerumik allatigut nassiunneqarsimappata, pissusissamisoorumik tiguneqartutut isigineqassanngillat.

Siunnersuutip atuutilernerani Naalakkersuisunut, pisortani oqartussanut imaluunniit pisortat suliffeqarfiutaannut taakkunangaaniillu nalunaarutit ilaalu ilanngullugu, nalunaarutip ilaalu ilanngullugit tiguisussamat digitalinngorlugu pissarsiarineqarsinnaalerneraniit, digitalinngorlugit maleqquneqartutut nassiunneqartut isigineqassaaq. Elektroniskimik nalunaarutip qanga nassiunneqarnera imaluunniit tiguneqarsimanagera elektroniskimik nalunaarsuiffimmi uppersaassallugu nalinginnaasumik ajornannginnerussaaq.

Pissutsit taaneqartut pillugit aalajangersakkanik Naalakkersuisut nalunaarummi aalajangersaasinnaapput. Pissutsit suut pillugit aammalu qanoq iliornikkut Naalakkersuisunik, pisortani oqartussanik imaluunniit pisortat suliffeqarfiutaannik digitalikkut attaveqaqatigiinnissamat pisussaaffeqarnermut kikkut pineqartunut ilaanersut pillugu aalajangersakkanik ilaatigut Naalakkersuisut aalajangersaasinnaapput.

Aammattaq allakkatigut attaveqaqatigiinneq aamma digitalikkut ingerlanneqassasoq pillugu aalajangersakkanik aalajangersaasoqarsinnaavoq, assersuutigalugu emaili atorlugu.

Naalakkersuisut assersuutigalugu suliffeqarfik Atuisartoqarnermut Unammilleqatigiinnermullu Aqutsisoqarfimmut saaffiginninnermini, suliap aalajangersimasup suliarineranut atatillugu suliffeqarfiup atassuteqarfiginissaanut emailadresse-mik paasissutissiinissaa pillugu aalajangersakkanik aalajangersaasinnaapput. Tassunga atatillugu, suliap aalajangersimasup naammassillugu suliarineqarnerata naammassineqarnissaata tungaanut suliffeqarfiup emailiata allanngornera pillugu suliffeqarfiup aamma Atuisartoqarnermut Unammilleqatigiinnermullu Aqutsisoqarfimmut nalunaaruteqarnissaa pillugu aalajangersakkanik Naalakkersuisut aalajangersaasinnaapput.

Piginnaatitsissut atorlugu aamma digitalikkut attaveqatigiinnissamut pisussaaffimmit ilaannginnissaq pillugu malittarisassanik aalajangersaasoqarsinnaavoq. Aalajangersagaq oqaasertalerneqarpoq, digitalikkut attaveqatigiinnermik atuisussaatitaaneq pillugu malittarisassanik Naalakkersuisut aalajangersaasinnaalerlugit. Taassuma malitsigisaanik pisuni aalajangersimasuni digitalikkut attaveqatigiinneq pillugu piumasaqaatit saneqqunneqarnissaannut immikkut akuersinissaq periarfissaassaaq.

Inuussutissarsiornermut tunngasut pillugit attaveqatigiinneq pineqarmat, taamaattoq pissutsit immikkorluinnaq ittut tamanna pisussaatippassuk aatsaat, ilaatitsinnginnissamut periarfissaq aallaaviatigut atorneqassaaq. Ilaatitsinnginnissamut periarfissaq eqqarsaatigineqarsinnaavoq danskisut digitalikkut atsiornerup atorneqarnissaa piumasaqaatigineqarpat, attavigineqartorlu danskit digitalikkut atsiornerannik pissarsisinnaangippat. Aammattaaq digitalikkut attaveqatigiinnissaq pillugu piumasaqaat nunani tamalaani pisussaaffeqarnermut akerliuppat, ilaatitsinnginnissamut periarfissaq atorneqarsinnaavoq. Nalunaarsuiffissatut eqqarsaatigineqartumut suliffeqarfinillu attaveqatigiinnermut tunngatillugu, ilaatitsinnginnissamik periarfissiinissamut pissutissaqalersitsisumik, maannakkorpiaq nunani tamalaani pisussaaffeqartunik paasisaqartoqanngilaq. Tamatuma saniatigut najoqqutassat digitalikkut nassiunneqarnissaat tulluarani qanoq issuseqarpata, ilaatitsinnginnissamut periarfissaq assersuutigalugu aamma atorneqarsinnaavoq.

Suliffeqarfik imaluunniit inuk assersuutigalugu qarasaasiamik internettikkullu atassuteqaammik pigisaqanngippat, suliffeqarfiup imaluunniit inuup digitalikkut attaveqatigiinneq pillugu piumasaqaammit ilaatinnginnissaanut aallaaviatigut pissutissaqassanngilaq. Taamaattoqartillugu suliffeqarfik imaluunniit inuk pineqartoq assersuutigalugu atuakkanik atorniartarfimmi qarasaasiamik atuisaaq imaluunniit suliffeqarfik inulluunniit pineqartoq sinnerlugu attaveqatigiinnerup isumaginissaanut siunnersorti qinnuigissallugu.

Imm. 1 siunnersuutigineqartoq malillugu IT atorlugu nalunaarsuiffiit aalajangersimasut, digitalikkut angissutsit aamma digitalikkut atsiornerup assigisaasaluunniit atorneqarnissaat pillugu immikkut piumasaqaateqartoqarsinnaavoq.

Imm. 2-mut

Digitalikkut nalunaarutip qaqugukkut nalunaarummik tiguisussamut apuussimasutut isigineqarnissaanut, aalajangersagaq erseqqissaavoq.

Nalunaarutit Atuisartoqarnermut Unammilleqatigiinnermullu Aqutsisoqarfimmut nassiunneqartut eqqarsaatigalugit, nalunaarummik tiguisussaq tassaavoq aqutsisoqarfik. Nalunaarutit Atuisartoqarnermut Unammilleqatigiinnermullu Aqutsisoqarfiup nassiussai eqqarsaatigalugit suliffeqarfik imaluunniit inuk nalunaarummik nassiffigineqartoq nalunaarummut nassitsivigineqartuuvoq.

Oqaatsimi "digitalikkut nalunaarut" ilaapput digitalikkut isumagineqartut allakkatigut qanorluunniit attaveqaataasut, ilanngullugit aamma aalajangiinerit, emailikkut nassiunneqartut, pisortani digitalikkut nassiussiffikkut allatigulluunniit digitalikkut.

Aalajangersagaq malillugu, nalunaarut nassiussiffigisamit digitalikkut pissarsiarineqarsinnaalerpat, digitalikkut nalunaarut anngussimasutut isigineqassaaq. Pappiaranngorlugit allakkat, allakkat pineqartut nassiussiffigineqartup allakkanik nakkartitsisarfanut ikineqarpata, apuussimasutut isigineqartarnerannut tamanna assinguvoq. Taamaalilluni nassitsiffigineqartoq nalunaarutip imarisaanik aammalu qanga ilisimasaqalersimanersoq apeqqutaanngilaq.

Tunngaviusoq taanna Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersumi § 15, nr. 1-imi oqariartuutigineqarpoq. Aalajangersagaq taaneqartoq malillugu nalunaarutit, allakkerisarneq atorlugu nassiunneqartut, piffissami nassiussivigineqartup allakkerinermut aaqqiussutissami pissarsiarisinnaalerpagu, allaffigineqartumut apuussimasutut isigineqassapput.

Digitalikkut nalunaarut, piffissami nalunaarutip aqutsisoqarfimmit pissarsiarineqarsinnaalernerani, Atuisartoqarnermut Unammilleqatigiinnermullu Aqutsisoqarfimmut apuussimasut isigineqassaaq, tassa imaappoq aqutsisoqarfik nalunaarummik suliarinnissinnaalerpat. Piffissaq taanna nalinginnaasumik tiguisarnermik aaqquussuusaami imaluunniit paasissutissanik nalunaarsuiffimmi ingerlaannartumik nalunaarsugaassaaq. Nalunaarut nal. 24.00-ip kingorna aatsaat pissarsiarineqarsinnaasoq nalinginnaasumik aatsaat ullormit nalunaarutip pissarsiarineqarsinnaanerani tiguneqartutut isigineqassaaq.

Nalunaarut piffissami nalunaarutip pineqartumit pissarsiarineqarpat, nalinginnaasumik suliffeqarfimmut imaluunniit inummut apuussimasutut isigineqassaaq. Tassunga atatillugu nassitsiffigineqartoq nalunaarut pissarsiarisinnaanagu imminut inissisimatilersimanersoq

pingaaruteqanngilaq, assersuutigalugu pisortani digitalikkut allakkanik nassiussissut atorlugu pineqartumut Atuisartoqarnermut Unammilleqatigiinnermullu Aqutsisoqarfiup nassiussaanic nalunaarummik tiguisusaaq pisortani allakkatigut nassiussami nalunaarutiniq tiguisinissamut digitalikkut atsiornermik pisariaqartumik pissarsisimanani, takuuk Pisortani Digitalikkut Allakkerineq, imaluunniit tiguisoq elektroniskimik nalunaarsuiffimini nalunaarutiniq tiguisinnginnissamut aaqqissuussinernik (spamfiltre, firewalls ilalu ilanngullugit) ikkussisimalluni.

Nalunaarut taamaalilluni pineqartup nalunaarut pissarsiarisinnaanngikkaluaraa, tamanna pineqartumut tunngasunik pissuteqarpat, pineqartup (suliffeqarfik imaluunniit inuk) pissarsiarineqarsinnaasaatut isigineqassaaq, ilanngullugu assersuutigalugu pineqartup nammineq qarasaasiaa atorsinnaanngippat, imaluunniit pineqartup digitalikkut atsiornissamut ilisarnaatini annaasimappagu.

Imm. 3-imut

Aalajangersagaq malillugu digitalikkut nalunaaruteqarnek, taanna tiguisusamut digitalinngorluni pissarsiarineqarsinnaalerpat, anngussimasutut isigineqassaaq, takukkit Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersumi § 15, nr. 1-imi tunngaviusut.

#### *§ 20-mut*

Imm. 1-imut

Aalajangersagaq malillugu siunnersuummi pineqartunut ilaasunik pissutsinik Atuisartoqarnermut Unammilleqatigiinnermullu Aqutsisoqarfik nakkutilliisuvoq.

Imm. 2-imut

Aalajangersagaq tamatuma saniatigut suliffeqarfiup immikkoortuinut tamanut ilaalu ilanngullugit aamma ingerlatanut siunnersuummi pineqartunut ilaasunut tamanut nakkutilliinermi oqartussat eqqartuussisumit aalajangiiffigineqanngitsumik pissusissamisoortumik uppersaateqarluni sukkulluunniit isersinnaanerannut, inatsimmi tunngavissiivoq. Nakkutilliinerup ingerlanneqarnissaanut tamanna pisariaqarpat, tamanna atuutissaaq.

Siunnersuut malillugu aalajangersakkat aalajangersarneqartut akuersinermilu piumasaqaatit eqqortinneqarnissaat pillugu aalajangersagaq malillugu Atuisartoqarnermut Unammilleqatigiinnermullu Aqutsisoqarfik peqqussuteqarsinnaavoq. Peqqussuteqarnek suliffeqarfinnut inunnullu siunnersuummi pineqartunut ilaasunut nalunaarutigineqarsinnaavoq.

Imm. 3-mut

Aalajangersakkap malitsigisaanik, paasissutissanik tamaginnik aamma allakkianik tamaginnik, taakkuninnga aamma taakkua suliaqarnerannik aammalu ingerlatanik siunnersuummi pineqartunut ilaasunik oqartussatut suliarinninnissamut pisariaqartunik Atuisartoqarnermut Unammilleqatigiinnermullu Aqutsisoqarfimmut nalunaaruteqarnissamut aamma nassiussinissamut suliffeqarfiit inuillu siunnersuummi pineqartunut ilaasut pisussaaffeqarput.

Aalajangersakkami suliffeqarfiit aamma inuit siunnersuummi pineqartunut ilaasut aalajangersimasunik paasissutissiisussaataitanermik pisussaaffilerneqarput.

Aalajangersakkami paasissutissat sulluunniit, assersuutigalugu siunnersuut manna malillugu akuersissuteqarnissamik qinnuteqaatinik suliarinninnernut atatillugu, oqartussatut suliarinninnermut pisariaqartinneqartut, imaluunniit siunnersuut manna malillugu paasissutissat ingerlatanik tamakkiisumik nakkutilliinermi atorineqartussat, pineqartunut ilaatinneqarput.

Aalajangersagaq naapertorlugu, paasissutissat uppersaatillu Atuisartoqarnermut Unammilleqatigiinnermullu Aqutsisoqarfiup siunnersuut malillugu oqartussatut suliarinninnerup naammassineqarnissaanut pisariaqartitaannik nassiusseqqullugit, suliffeqarfiit aamma inuit siunnersuummi pineqartunut ilaasut, Atuisartoqarnermut Unammilleqatigiinnermullu Aqutsisoqarfiup peqqusinissaa periarfissinneqarpoq. Nassiussineq Atuisartoqarnermut Unammilleqatigiinnermullu Aqutsisoqarfiup pisariaqartitaatut pinissaata iluseqartinnissaatalu aalajangernissaanut, Atuisartoqarnermut Unammilleqatigiinnermullu Aqutsisoqarfik periarfissaqarpoq. Assersuutigalugu tamanna tassaasinnaavoq paasissutissat pappialanngorlugit aamma elektroniskimik nassiunneqassasut, ilanngullugu USB-imi, imaluunniit immikkut angissuseqartillugit, ilanngullugu assersuutigalugu Microsoft Word-imi imaluunniit PDF-imi, imaluunniit oqaatsit aalajangersimasut, ilanngullugu danskisut tuluttulluunniit, atorlugit.

Suliffeqarfiup siunnersuut malillugu suliffeqarfittut innuttaasunik ikiortarialinnik suliffissaqartitsisutut nalunaarsorsimanissamut piumasaqaammik ataatsimik arlalinnilluunniit naammassinninngitsoq Atuisartoqarnermut Unammilleqatigiinnermullu Aqutsisoqarfik ilisimasaqalerpat, tamanna pillugu suliffeqarfimmut pineqartumut Atuisartoqarnermut Unammilleqatigiinnermullu Aqutsisoqarfik peqqussuteqarsinnaavoq. Peqqusissummi pissutsit iluarsineqarnissaannut suliffeqarfimmut piffissamut killissaliussamik naammaginantumik aalajangiisoqassaaq. Takuuk siunnersuummi § 20 imm. 1 tassungalu nassuiaatit.

Imm. 4-mut

aalajangersagaq Atuisartoqarnermut Unammilleqatigiinnermullu Aqutsisoqarfimmut nalunaarusiornissamut tunngasuvoq.



Aalajangersagaq malillugu suliffeqarfiit aamma inuit siunnersuummi pineqartunut ilaasut pissutsit aamma ingerlatat siunnersuummi pineqartunut ilaasunik aamma akuersissuteqarnerit pillugit Atuisartoqarnermut Unammilleqatigiinnermullu Aqutsisoqarfimmut nalunaaruteqarnissamut pisussaaffeqarput.

Tamatuma saniatigut suliffeqarfiit innuttaasunik ikiortarialinnik suliffissaqartitsisutut nalunaarsorsimasut, tamanna Atuisartoqarnermut Unammilleqatigiinnermullu Aqutsisoqarfimmit pisariaqartutut isigineqarpat, § 13 malillugu ukiut tamaasa ukiumut nalunaarusiamik Atuisartoqarnermut Unammilleqatigiinnermullu Aqutsisoqarfimmut nassiussisussaapput.

Nalunaarusiorneq pillugu aalajangersakkanik erseqqinnerusunik aalajangersaanissamut Naalackersuisut inatsimmi tunngavissaannik, aalajangersagaq imaqarpoq. Naalackersuisut aalajangersakkanik taamaattunik ilaatigut nalunaarutini aalajangersaasinnaapput.

Siunnersuut malillugu akuersissuteqarnerni aalajangiinernilu nalunaarusiortarneq pillugu atugassarititaasunik aalajangersaanissamut Atuisartoqarnermut Unammilleqatigiinnermullu Aqutsisoqarfimmut inatsimmi tunngavissamik, aalajangersagaq imaqarpoq. Assersuutigalugu ilusissaa, akulikissusissaa imarisaalu pillugit atugassarititaasut erseqqinnerusut aalajangersarneqarsinnaapput. Tamatuma saniatigut assersuutigalugu nalunaarusiorneq aamma angusat pillugit isertuussinissaq pillugu atugassarititaasut erseqqinnerusut aalajangersarneqarsinnaapput.

#### Imm. 5-imut

Naalackersuisut nalunaarusiortarneq pillugu aalajangersakkanik erseqqinnerusunik aalajangersaanissaannut inatsimmi tunngavissamik, aalajangersagaq imaqarpoq. Naalackersuisut ilaatigut aalajangersakkanik taamaattunik nalunaarummi aalajangersaasinnaapput.

#### Imm. 6-imut

Atuisartoqarnermut Unammilleqatigiinnermullu Aqutsisoqarfiup siunnersuut malillugu akuersissuteqarnerni aalajangiinernilu nalunaarusiortarneq pillugu atugassarititaasunik aalajangersaanissaannut inatsimmi tunngavissamik aalajangersagaq imaqarpoq. Assersuutigalugu ilusissaa, akulikissusissaa imarisaalu pillugit atugassarititaasut erseqqinnerusut aalajangersarneqarsinnaapput. Tamatuma saniatigut assersuutigalugu nalunaarusiornermut angusanullu isertuussinissaq pillugu atugassarititaasut erseqqinnerusut aalajangersarneqarsinnaapput.

### Imm. 1-imut

Aalajangersagaq, siunnersuut malillugu sulianik suliarinninnermut allatullu oqartussat suliarinninnermut atatillugu aningaasartuutunik akiliinissamut suliffeqarfiit aamma inuit siunnersuummi pineqartunut ilaasut akileeqquneqartarnerannut, tunngasuvoq.

Aningaasartuutitut siunnersuut malillugu sulianik oqartussatullu suliarinninnermut atatillugu Atuisartoqarnermut Unammilleqatigiinnermullu Aqutsisoqarfimmit aamma Naalackersuisunit akilerneqartunik akileqqusinissamut aalajangersagaq inatsimmi tunngavissiivoq.

Assersuutigalugu akuersissuteqarnermut atatillugu suliamik suliarinnerinnermut, nalunaarsuinnermut nalunaarsorsimajunnaarsitsinnermullu, ingerlaavartumik nalunaarusiornermut, nakkutilliinnermut allatullu pisortat suliarinninnerannut atatillugu aningaasartuutit, aalajangersakkami pineqartunut ilaapput.

Aningaasartuut sunaluunniit, akiliineq Atuisartoqarnermut Unammilleqatigiinnermullu Aqutsisoqarfiup aningaasartuutaanut imaluunniit Atuisartoqarnermut Unammilleqatigiinnermullu Aqutsisoqarfiup sullissineranut nalinginnaasumik naapertuuppat, akiliutitut imaluunniit aningaasartuutunik utertitsinertut akileqquneqarsinnaavoq. Taamaalilluni suliami pineqartumi suliamik oqartussatullu suliarinninnermut Atuisartoqarnermut Unammilleqatigiinnermullu Aqutsisoqarfiup akilersimasai imaluunniit akiligassaattut naatsorsuutigineqartut sinnerlugit, aalajangersagaq manna tunngavigalugu akiliutunik, akitsuutunik akileeqqusisoqarnissaa imaluunniit aningaasartuutunik utertitsisoqarnissaa, siunertarineqanngilaq. Atuisartoqarnermut Unammilleqatigiinnermullu Aqutsisoqarfiup siunnersuut, ilanngullugu ilaatigut akuersissuteqarnek, nakkutilliineq aamma aalajangiinerit, malillugu oqartussat suliarinninnerani piffissamik atuinnermut nalunaaquttap akunneranut akeqartitsineq tunngavigalugu, suliamik oqartussatullu suliarinninnermut akiliineq pisinnaavoq.

### Imm. 2-mut

Imm. 1 malillugu suliffeqarfiit aamma inuit oqartussat aningaasartuutaannik akiliisarnerat pillugu aalajangersakkanik erseqqinnerusunik aalajangersaanissamut Naalackersuisut inatsimmi tunngavissinneqarnerannik, aalajangersagaq imaqarpoq.

### Imm. 3-mut

Siunnersuut malillugu akuersissuteqarneni aalajangiinernilu imm. 1 malillugu oqartussat aningaasartuutaannut suliffeqarfiit aamma inuit akiliinissaat pillugu atugassarititaasunik aalajangersaanissamut Atuisartoqarnermut Unammilleqatigiinnermullu Aqutsisoqarfimmut inatsimmi tunngavissiinnermik, aalajangersagaq imaqarpoq.

### § 22-mut

## Imm. 1-imut

Aalajangersakkami allassimavoq, ingerlatat aamma pissutsit siunnersuummi pineqartunut ilaasut pillugit aamma ukiup siuliani siunnersuut malillugu Atuisartoqarnermut Unammilleqatigiinnermullu Aqutsisoqarfiup nakkutilliinera aalajangiinerilu pillugit ukiumut nalunaarusiamik Atuisartoqarnermut Unammilleqatigiinnermullu Aqutsisoqarfik Naalackersuisunut nassiussissasoq.

Atuisartoqarnermut Unammilleqatigiinnermullu Aqutsisoqarfiup nakkutilliinera aalajangiisarnerisalu eqikkaalluni allaaserineqarnerinik aamma taakkununga atatillugu pissutsit pingaarutillit aamma tunngaviusunut tunngasut erseqqinnerusumik allaaserineqarnerinik, ukiumut nalunaarusiaq imaqassaaq. Ukiumut nalunaarusiaq aamma suliffeqarfiit innuttaasunik ikiortarialinnik suliffissaqartitsisut nalunaarsorsimasut aamma ingerlatat siunnersuummi pineqartunut ilaasut pillugit paasissutissanik aamma imaqassaaq. Tassunga atatillugu suliffeqarfiit taakkulu ingerlataat innuttaasunik ikiortarialinnik suliffissaqartitsinermik siunertaqarnermik qanoq siuarsaanersut, allaaserineqassaaq. Suliffeqarfimmik innuttaasunik ikiortarialinnik suliffissaqartitsisumik ingerlatsinermik qanoq Kalaallit Nunaanni siuarsaasoqarsinnaanersoq naliliinermik, aamma nalunaarusiaq imaqassaaq.

Ilaatigut siunnersuummi suliassaqarfiup iluani ineriartorerup malinnaaffiginissaanut aamma Naalackersuisut imaluunniit Kalaallit Nunaanni oqartussat allat Kalaallit Nunaanni suliffeqarfinnik innuttaasunik ikiortarialinnik suliffissaqartitsisunik ingerlatsineq siuarsarniarlugu ingerlataqartariaqaraluarnersut naliliinermut, Naalackersuisut nalunaarusiaq atorsinnaavaat.

## Imm. 2-mut

Aalajangersagaq malillugu, ingerlatat aamma pissutsit Inatsisartut inatsisaanni pineqartunut ilaasut aamma siunnersuut malillugu Atuisartoqarnermut Unammilleqatigiinnermullu Aqutsisoqarfiup nakkutilliinera aalajangiisarnerilu pillugit nalunaarusianik allanik aamma paasissutissanillu allanik Atuisartoqarnermut Unammilleqatigiinnermullu Aqutsisoqarfiup Naalackersuisunut nassiussisarnissaa pillugu aalajangersakkanik erseqqinnerusunik Naalackersuisut aalajangersaasinnaapput aalajangiisinnaallutillu.

Ukiumut nalunaarusiamut ilaatinneqanngitsut pissutsit immikkut ittut pillugit nalunaarusianik paasissutissanillu Atuisartoqarnermut Unammilleqatigiinnermullu Aqutsisoqarfik nassiussissasoq pillugu aalajangersakkanik Naalackersuisut ilaatigut aalajangersaasinnaapput. Assersuutigalugu imaassinnaavoq suliffeqarnermi inuit immikkut pisariaqartitsisut ilanngutitinnissaannut tunngasunik suliffeqarfiit innuttaasunik ikiortarialinnik suliffissaqartitsisut ingerlataqarnerat imaluunniit nalinginnaasumik ilinniartitaanermi atorfirmiluunniit nalinginnaasumi atorfeqarnermini piginnaanngorsarsinnaanngitsut, inuit

immikkut ilinniartitaanermi atorfinni piginnaangorsarfiusunilu atorfinitsinneqarnerinut tunngasunik ingerlatanik ingerlataqarnerat pillugu, paasissutissanik erseqqinnerusunik Naalakkersuisut kissaateqartut.

### § 23-mut

#### Imm. 1-imut

Aalajangersakkami allanneqarpoq, siunnersuut imaluunniit aalajangersakkat siunnersuut malillugu aalajangersarneqartut malillugit Atuisartoqarnermut Unammilleqatigiinnermullu Aqutsisoqarfiup aalajangiinerinut, Atuisartut Pisisartullu Maalaarutaannik Aalajangiisartut naammagittaalliortarfittut oqartussaasut. Atuisartoqarnermut Unammilleqatigiinnermullu Aqutsisoqarfiup aalajangiinera pillugu naammagittaalliuuteqarnissamut piffissamut killissaliunneqarpoq, pineqartup aalajangiinermik nalunaarfigineqarneraniit sapaatit akunneri 4-t.

Pappialatigut allakkat, allakkat pineqartut nassiussivigineqartup allakkanik nakkartitsisarfanut ikineqarpata, anngussimasutut isigineqarput. Taamaalilluni nassiussivigineqartoq nalunaarutip imarisaanik qanoq ilinerani ilisimasaqalersimanersoq apeqqutaanngilaq. Siunnersuummi § 19, imm. 2-mi aalajangersagaq malillugu digitalikkut nalunaarut, nalunaarut nassiussivigineqartup digitalikkut pissarsiarisinnaalerpagu, annguttutut isigineqassaaq.

#### Imm. 2-mut

Aalajangersakkami aalajangersarneqarpoq, § 5, imm. 2 imaluunniit § 10, imm. 2 malillugit iluarsiiinissamut piffissamut killissaliussap aalajangersarneqarnera pillugu Atuisartoqarnermut Unammilleqatigiinnermullu Aqutsisoqarfiup aalajangiinera, Atuisartut Pisisartullu Maalaarutaannit Aalajangiisartunut imaluunniit allaffissornikkut oqartussanut allanut suliaassanngortinneqarsinnaanngitsaq.

#### Imm. 3-mut

Aalajangersakkami erseqqissarneqarpoq, naammagittaalliuuteqartup naammagittaalliummi taperserseqarnissaa Atuisartut Pisisartullu Maalaarutaannit Aalajangiisartunit ilimagineqanngippat, naammagittaalliuut imm. 1-imi pineqartunut ilaasoq Atuisartut Pisisartullu Maalaarutaannit Aalajangiisartunit suliariumannginneqarsinnaasoq.

#### Imm. 4-mut

Aalajangersakkami allassimavoq naammagittaalliummi imm. 1-imi pineqartunut ilaasumi Atuisartut Pisisartullu Maalaarutaannit Aalajangiisartut suliarinnissasut aamma aalajangiissasut, taamaattoq takuuk imm. 2 aamma 3. .

Siunnersuut manna malillugu allamik pisoqartussaasimangippat, naammagittaalliutininik imm. 1-imi pineqartunut ilaasunik Atuisartut Pisisartullu Maalaarutaannit Aalajangiisartut suliarinninneranni aalajangiinerannilu, tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaanni (nittarsaassisarnermut inatsit) inuussutissarsiummik ingerlataqarneq pillugu atuisartut naammagittaalliutaat pillugit sulianik Atuisartut Pisisartullu Maalaarutaannit Aalajangiisartut suliarinnittarnerat aalajangiisarnerallu pillugit aalajangersakkat taamaaqataanik atuutissapput.

#### *§ 24-mut*

##### *Imm. 1-imut*

Aalajangersakkami allassimavoq, Atuisartoqarnermut Unammilleqatigiinnermullu Aqutsisoqarfiup aalajangiineranut naammagittaalliut allaffissornikkut oqartussamut allamut suliakkiunneqarsinnaanngitsoq.

##### *Imm. 2-imut*

Aalajangersakkami allassimavoq, eqqartuussivimmi misiliisoqannginnerani Atuisartut Pisisartullu Maalaarutaannit Aalajangiisartuni misiliinermik ingerlatsisoqassasoq. Taamaalilluni aalajangersakkami erseqqissarneqarpoq, aalajangiinerit Atuisartut Pisisartullu Maalaarutaannit Aalajangiisartuni tamatuma siornatigut suliarineqarsimangippata, eqqartuussivinnut toqqaannartumik suliakkiunneqarsinnaanngitsut.

#### *§ 25-mut*

##### *Imm. 1-imut*

Aalajangersagaq malillugu, pisuni nr. 1-9-imi eqqaaneqartuni, siunnersuut malillugu akiliisitsinissaq aalajangersarneqarsinnaavoq.

Nalunaarsuisarnermut aaqquissuussinermut tatiginnitsitsilerniarluni, siunnersuut malillugu iluanaarutininut killiliinerit avaqqutaarneqarnissaasa sapinngisamik pinngitsoortinnissaat imaluunniit killeqartinneqarnissaat, pingaaruteqarpoq. Taamaattumik siunnersuummi § 25, imm. 1, nr. 4 malillugu, § 7, imm. 1, nr. 5-ip sinneqartoortutininut inunnut ikiortarialinnut iliuuseqarfiginninnissamut tunngasup, unioqqutinneqarnera akiliisitsinermik pineqaatissivigineqassaaq.

Suliffeqarfiup innuttaasunik ikiortarialinnik suliffissaqartitsisutut atorunnaarsinneqarnerani imaluunniit aningaasaatinik appartitsinermi iluanaarutininut killiliinissaq pingaaruteqarpoq. Taamaattumik suliffeqarfik innuttaasunik ikiortarialinnik suliffissaqartitsisutut nalunaarsorsimasoq, taassuma suliffeqarfiup atorunnaarsinneqarneranut imaluunniit aningaasaatinik appartitsinermut atatillugu agguagarsititsineranut tunngatillugu § 7, imm. 1, nr. 5 naammassisimangippagu, akiliisitsinermik pineqaatissinneqarsinnaavoq.

Siusinnerusukkut suliffeqarfittut innuttaasunik ikiortarialinnik suliffissaqartitsisutut nalunaarsorsimasuusimasoq tamatuma saniatigut, nalunaarsorsimajunnaareernerup kingorna sinneqartoorutitut suliffeqarfiup suli nalunaarsorsimasuunerata nalaani katersorneqarsimasunut tunngatillugu, siunnersuummi § 7, imm. 1, nr. 5 naammassisimangippagu, akiliisitsinermik pineqaatissinneqarsinnaavoq. Taamaalilluni suliffeqarfik nalunaarsorsimajunnaaruni tamatumalu kingorna siunnersuummi § 7, imm. 1, nr. 5, litra d-imi iluanaarutitut killilersuineramik unioqquutitsilluni, akiliisitsinermik pineqaatissinneqarsinnaavoq.

Imm. 2-mut

Siunnersuummi aalajangersakkanik unioqquutitsinernut Kalaallit Nunaanni pinerluttulerinermi inatsit malillugu akiliisitsinissaq aalajangersarneqarsinnaasoq, pillugu aalajangersakkanik Naalackersuisut aalajangersaasinnaanannut inatsimmi tunngavissamik, aalajangersagaq imaqarpoq.

Imm. 3-mut

Aalajangersakkami erseqqissarneqarpoq, siunnersuummi § 25, imm. 1 imaluunniit 2 imaluunniit aalajangersakkat siunnersuut naapertorlugu aalajangersarneqartut malillugit akiliisitsinissaq, Kalaallit Nunaanni pinerluttulerinermi inatsimmi maleruagassat malillugit inatsisitigut pisinnaatitaasunut pisussaataasunullu peqqussutaasinnaasoq.

Imm. 4-mut

Aalajangersakkami allassimavoq, siunnersuut imaluunniit aalajangersakkat siunnersuut malillugu aalajangersarneqartut naapertorlugit akiliisitsinerit nunatta karsianut tutsinneqassasut.

#### *§ 26-mut*

Aalajangersakkami allassimavoq siunnersuut ulloq 1. januar 2020-imi atuutilissasoq.